

ПЕТӖ 1926 ВОСЯНЬ

ЛЭДЗӖНЫ: КОМИ РЕСПУБЛИКАСА ГИЖЫСЬ КОТЫР, ПЕЧАТЬ ДА ЮӖР
СЕТАН КОМИ РЕСПУБЛИКАСА АГЕНТСТВО

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

12 ӖШЫМ (ДЕКАБРЬ) 2013

ТАЙӖ НОМЕРЫН:

Кытшгъяс	3
Елена АФАНАСЬЕВА. Кад визулас. Кывбургъяс	20
Александр ШЕБЫРЕВ. Куим висът	25
Алексей МИШАРИН. Вильыд ордым. Повесът	38
Алексей ВУРДОВ. Кык висът	56
Иван БЕЛЫХ. КылӖг вад. Висът	66
Иван БелыхлӖн «Коляс-Ӗ чужан кывным?» гижӖдлы йӖлӖга	70
Литература олӖмысь	75
ЙӖзӖдӖма «Войвыв кодзув» журналын 2013 воын	78

6 +

Обложка вылын снимокыс Алексей ПолугрудовлӖн.

© «Войвыв кодзув» («Северная звезда»), 2013 г.

СЫКТЫВКАР

СЕВЕРНАЯ ЗВЕЗДА



***Ежемесячный
литературно-художественный
журнал***



Учредители:

СОЮЗ ПИСАТЕЛЕЙ РЕСПУБЛИКИ КОМИ

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**



АУ РК «ИЗДАТЕЛЬСКИЙ ДОМ КОМИ»



ДИРЕКТОР: БЫКОВСКАЯ Н.Н.



РЕДАКЦИОННАЯ КОЛЛЕГИЯ:

Главный редактор

ЕЛЬКИН М.А.

Ответственный
секретарь

КИЧИГИН И.Н.

ПОЛУТРУДОВ А.В.

УЛЬЯНОВ А.В.

УЛЯШЕВ О.И.

ЛИМЕРОВА В.А.

ТИМИН В.В.



Кытшыяс

Кор лөньсьыс-лөнь и ва веркөсыс пөрө рөмпöштанö, окота видзöдны кытшыяс вылö. Шыбитан ичöтик изтор, и кытшыяс чужöны, найö вочасөн паськалöны, воёны тэ дорöдз, нюлöны кок ув берегсö... И думъясыд сэки кытшыяс кодьöсь. Бытьё став олöмыд и став олöмыс кытшыяс. Шондйыс и, Муыс и кытши бөрся кытши гартöны кадсö, мед мортыс вермис вöчны ассьыс кытши олöмöдыс. И олöмыс мортыслөн кытшиён юклöма вояс вылö, и водзö посньöдчöмөн. Öти коляс, а сэсся и мöд кытши мöдöдчö. Помассё тайö воыс, пансё виль. Кытшыяс... Та понда и нимтём тадзи гижöдсö. Юалём коми литератураён лолалысь войтырöс налөн олём кытши, тöжд-мог, думъяс йылысь, да мый эськö сиисны йöзлы локтан воö:

1. Морт олöмыд пыр вежсё. Быд во аслыспöлс, мыйöнкö торъялана. Öти кольö бур пас, мöд нормöдлö сёлöмтö, а коймöд төв ныр моз лэбыштас дай, вежöрад нинём оз коль. Кыдзи тэ кутан казтьывны мунысь восö?

2. Нёбдинса Виттор на коркö шулис: ни öти морт пö гижысён оз чужлы. Гижан уджыд зэв сёкыд. Ёна лоö зильны, ловнад пессьыны, медым чужис сёлöмтö бурмöдана-вöрзёдана гижöд. Окота тöдны, мый вылын уджалан öнi да кутшöм гижöдъяс көсъян вöзйыны матысса кадас?

3. Виль воö вуджигөн коми войтыр пыр сиёны öта-мöдлы став бурсö. Мый эськö Тэ сиин йöзыслы 2014 воö?

Ставнас тайён и юксям Тэкöд, дона лыддьысьысь. Виль во-öн! Эскöй бурас, а лёксьыс мед Ен видзас!

Владимир ТИМИН,
Коми Республикаса
Народнöй поэт

Ен кө биысь-ваысь...

1. Тулыс-гожём-арсö олі Гарьяын. Усадьбаным ыджыд, но ас вынён бергöдчам. Диана Григорьевна да Валентина Бызова, Куратов музейысь, волісны и шензисны: «Кыдзи ті Тамара Григорьевнакөд та ыжда мусö вермад вöдитны?» Корсюрö отсасьны волöны нывъяс, зятъяс. Сэки удж менам — видзны арён-джынийöна Вика внучкаöс, öти сайын и Владик внукöс.

Сэн эм менам творчество жыр, көні рытланыс нин вуджöда бумага вылö юрын чукöрмöм строкаяс да рифмаяс. Öшиньöй видзöдö рытыввывлань, аддза, кыдзи шондi ньöжйöник дзесбсö джуджыд мыльк сайö. Гөгөр лөнь. И корсюрö менам гижсё.



Шойччыла и нейджыд пруд дорын, сійӧс лӧсьӧдіс Сергей зять да во кык сайын сьавкнитіс сэтчӧ гычпиянӧс. Уялӧны. Колӧ вердны да дорйыны сюсь синма каляясысь, найӧ казялӧ-маӧсь нин гычпиянтӧ. Таво медводдзаысь лэптім ведра джын гырысьджык гычсӧ. Посниджыкыс колины тӧвйыны. Мед рӧд-мӧны. Гожӧмыс вӧлі мича, но вывтӧ нин кос. Прудным тайкӧ эз косьмы, ведраӧн лои ва кыскавны ӧшмӧсысь.

Пывсим лункосмӧсӧн.

Тадзи и коліс тулыс-гожӧм-арыс.

Ог элясь.

2. Дерт, гырысь могъяс ас водзӧ ог нин сувтӧд. Матысма кӧкъямысдаслань. Но водзлань видзӧдны век жӧ колӧ, кызди бать шулывліс: «Ен кӧ биысь-ваысь видзас».


Пӧшти дась нин «Гижысь ёртъяскӧд орччӧн» шмонитан ся-ма висът чукӧр. Лоӧны некымын дас дженьыдик висът — Ил-ля Васьянь талунъя лунӧдз. Гижа быдӧнӧс пыдди пуктӧмӧн.

Гижа кывбуръяс. Найӧ чужӧны менсьым юасьтӧг.

Сэсся... Он ӧд тӧд олӧмтӧ. Нэм джынйысь унджык нин тэ-ча лунысь-лунся пасйӧдъяс. Комиӧн, дерт. Дасьта ёна дженьӧд-дӧмӧн, мед эз дышӧд лыддынысӧ да и лыддяна мед вӧлі. Дасьтан кадсӧ ог куж шуны. Бара жӧ «Ен кӧ биысь-ваысь...».

Ог ӧтдортчы и общественной уджысь — уналаӧ корлӧны.

3. Мый вермас сины йӧзлы морт, коды вӧчисны сьӧлӧмас операция? Дзоньвидзалун! И Ен мед видзас.



Вячеслав БАБИН,
гижысь

Ичӧтторсянь ыджыд чассьӧ

Воыс сера джодждӧра кодъ. Видзӧ-дан да, водзад югыд рӧм, а сылань воськовтан — кыӧминыс быздалӧма, ниятӧн йиджӧма. Коми аньяс джодждӧраястӧ артавлісны отъясӧн, бердъяс-ӧн. И дас кыкнан отыс татшӧм: кыт-чӧкӧ кокни, кыпыд сьӧлӧмӧн сувтсы-ліс, а кӧнкӧ и крукасьлі-конъясьлі.

Сӧмын ас вӧр керкаын коллялӧм лышкыд арыс бурмӧдіс лолӧс. Сы кузя войснад мыйтакӧ сюрӧс и воліс юрӧ выль гижӧдъяс панӧм вылӧ. Темаыс ки пыдӧс вылын быттӧ, а босьтчынысӧ ни ӧтарсянь, ни мӧдарсянь оз артмы. Ӑти пӧрйӧ уджыштӧ пу-сьысӧн вӧрын выль ногӧн пӧрӧдчысьяс дорын. Кык тӧлысь мысти мунӧ — сьӧлӧм эз лэпты, ӧд куб да руб бӧрся вӧтлы-сьысьяс ытшкӧмӧн ытшкӧны менсьым парма-ягӧс, а найӧс ме жӧ и верда. Тайӧ кадколастыс ёна вӧрзбӧдіс-дойдіс. Ӑні на пе-лыын вундалан-тшытшлан пуяслӧн ымзӧм-бӧрдӧмыс.

Сэки жӧ и воис мӧвп видлыны лӧсьӧдны мойд сямаӧс, ӧнія кадсяӧс, мед кӧтъ кызкӧ гӧгӧрвоанаджыка вайӧдны аддзывлӧм-торсӧ талунъя челядьӧдз. Панасыс: чужӧны коми вӧрын кык ичӧтик робот-машина — Хордик да Фордик, а наысь сэсся

быдмёны повзёдчысь гундыръяс, кодъяслы веськодъ мян вёр-
вайд. Шуны кө, быд пёрйё, кор зёля корсьны кутшёмкё дзуг-
йысь петан туй, век медводз кутчыся челядькёд, челядьдыркёд
йитчём серпасъясё. На пыр и гөгөрвоа ёня олёмсё. А ичот
войтыр нинём оз дзебны. Налён асланыс видзёдлас, и дас пöv
вежёраджык верстыё мортысь.

А мый сины АС йёзлы? Быдёнлы, кодлы позьё эскыны, за-
видьтыны, вежавидзны, сиа:

Мед лёк кө лоо — тэ эн кор,
Мед кусыньтчан, а кут на астыё.
А сьёкыд либё дзескыд кор,
Тэ ассыд челядьдыртё казътыв
Да тёд, мый водзё вылё дась тэ
Век лоны челядьён, көть дзор.
Од ичотторсянь ыджыд чассьё.

Михаил ЕЛЬКИН,
поэт, «Войвыв кодзув»
журналса главнóй редактор

Олёмын тайö и эм

1. Енмыс меным нöшта öти во козь-
наліс овны — таысь нин ыджыд аттьö.
И омöльтны кольём восö ог кут да и
оз позь — грек тайö. Гожöмыс бур
сулаліс — тырмымөн шондіа и тыр-
мымөн зэра. Быдсикас вотöснас вöрыс
нимкодъмöдіс. Петіс менам выль кни-
га — «Кодзула эжа» кывбур чукөр.
Уна бур йöзкөд аддзысьлі, вөрö-вадорö
ветлі, гижсис-уджавсис... Мый нöшта колö? Кызди коркö ачым
кывбурын гижлі: «Олёмын тайö и эм». Тайён и шуда.

2. Ноябр тöлысья журналын петіс «Воас на кадыс» кывбур
чукөр. Панöма выль кывбур чукөр, но мый артмас, кымын
кывбурыс лоö да кутшöм нима — ог на тёд. Кута уджавны.

3. Дзоньвидзалун. Ме ачым дыр и ёна висьлі и тöда: шуд —
сійö кор некыті оз вись. А дзоньвидзалуныд кө эм — ставсö
верман и ставсö судзöдан. И нöшта: мед коми йöз оз вунöдны
чужан кывнысö, радейтасны ассыныс чужан мунысö, литерату-
расö, судзöдасны да лыддясны «Войвыв кодзув».



Николай ЧУГАЕВ,
гижысь

Ло шудаён, коми морт!

1. Дзик сідз. Мунысь воясыд быттё численниклөн лист
бокъяс: выльлун мунö зэв нин кузя, пекнича, шойччан лунъяс
водзад, быттё чань, дуригмоз и шутёвтас-эштас... Сідз и вояс-

ыд. Воас сьолём вылад — коляс вежорад сөмын радлунөн. Но, кыз шулөны, радлуныд пө волас кокни воськолөн да и мунас, сөмын вуйөн мавовтас ловтө, а лёкыд да шогыд лёк пиня агасөн моз кырлөдлас-сэрасасяс, да дыр кезлө, мудзөмөн, сапырасяс этшад.

Лыдди ныргорулөномоз гижөдторйөс да джөм сувтi: пөръялөма лои, көчамачлөн, ставыс сорассьом... Рөмпөштанө син чөвтлөм кодь: шуйгавыв петкөдчө сәні, рөмпөштанас, дзик мөдарөн, гугө-банөн... Воода мөвпөс, кужа кө.

Дзөля кад... Ставыс — муыс и ваыс — сөстөм да лада, ворсө-ымралө уна пөлөс рөмөн. Сырчик бөж кузя олөма кадыс, кагуктө лунысь-лун тетькөдө радлунөн да водзө вылө лачаөн... Кадыс быттьө дудөма, сетө, майбыр, чөс-масьны Енмөн сетлөм олөмнас... Гожомыс посни челядыдлөн пом ни дор, весиг эштылан помланыс мудзны купайтчыны, кыйны чери да и видз вылын уджыштны. Сидз тай өні кажитчө-а. Гожом помланыс весиг зөлитөмөн бөр нин кыскө школаө, ёртъяс дорө.

Со и бөръя звөнок... Бара на том мортыд асьсө нёръялө: кодыр нин армияө босьтасны?.. Кор бара нин верстамман, медым некод эз шу: тэ дзөляник на этайө ли, мөдтор вылө ли... Гажлун, но сәтшөм кузь да нюз, пом ни дор...

Пөрысьмыштан, мыйтакө исыштан олөмыслысь көрсө, да кор вөляника кутас «ёртасьны» быдсикас төжд-дойыс, сэк нин мөдарө — вояс, быттьө повзөдөм пөтка котыр, мөдасны жбырөдны-лэбны төв нырөн. Сөмын удит аслыд кевмысьөмөномоз шуавны: «Лөньлөй, воясөй! Энлөй вай зырнытө! Со этайөс эг на эштөд, пу на эг быдты, пи на эг чужты». (Серала дерт, аслам куим ныв, да сы кузя ли...)

Он удит лөньөдны ловшытө — сәні нин пенсия вылө петан кад. (Вылъысь нюмгөвтсис: во джын нин, Ен отсөгөн, «пензионерала» да). Сөмын оз тай сәтшөма нин кыпөд ловтө тайө дыр виччысяна кокньөдыд. Абу, тыдалө, прөста сидз чина йөз перө увсьыд петавлөма наян ли, тешитчан ли гижөд: «пенсия — годы дожития». Комиөдны кө — олан кад пом...

Со өд кытчөдз шыбөлитис мөвпъясөн, да ещө чужөм нюкраланаөн. Эн дивитөй весь больгөмысь. Бара на нюмдi...

Мый казътыла мунысь восьыс? Дерт жө, сөмын бурсө. Лөксө уна пөв казътивны кутан — он и казав, лемасяс бердад.

Мөдысь нин вичмылис веськавны Удораө, «Коми небөг» гаж вылө. Кутшөма өд воис сьолөм вылө! Топыд чукөрөн олө удораса войтырыд, веж петмөн топыда. Дивъя жө нин: йөзыс шань бобув кодьось, авъяось. Олөны крепыд йитөдөн ас костаныс и челядныскөд. Томуловыд, быттьө мазі позйын, өтвыв гызьө верстьө войтыркөд и сцена вылад, и быдсикас уджас долыд лолөн пырөдчө. Майбыр жө нин, кодыр тадз! Сидзкө, оз вун челядыслөн мам йөв көрыс.



Гожом горулас нин аслам муса сиктын, Гриваын, тшөтш жө пестылим «Зымгыштам» гаж. Быть лой сәні вежнясыштны йөзөс гажөдөм ради, эг тай бара варды-а... (серала). Гажтөгыд өд ок и гажтөм... Со и пырөдчывла, кызди кужа, спектаклясын легыштла.

2. Гижом йылысь. Ошйысьныс пөшти нинөмөн. Позьё шуны, кузьёсь мөвпгясөй да гижөдыс дженьыд. Некедз ог вермы гө-гөрвоны ачымөс, кутшөм мути-лявут тешитчө лов вылын, панө теш... Гашкө, джөмдөдлө сійө, мый ас кадө эг тыр-бура пырөд-чыв велөдчан грамотаас да? Либө ола зэв нин букыша, өтдортча йөзсьыс? Ог төд. Мамөй пыр тайө кайтліс: польөпиянтө* пө пыр гозйөн лөсьөдны колө. Найө пө, өта-мөдныс вылө видзөдіг-моз, ок и азымөсь лооны да бура быдмөны-вынсьөдчөны. Дерт жө, топыда олигад и топыда сөвман... Бара на нюмгөвті, лешакө...

Өні помаланвыйын эм висьт, Енмыс кө сетас, регыдөн видла йөзөдны. Пөжа мөвп гижны дзюлюкъяслы мойд визя пьеса. Ставыс ас сайын.

3. Виль, 2014 во... Дерт жө, ме думысь, лоө шудаөн. Эска, мый став Омөлыс коляс важас, оз сөдзтысь водзө вылө. Тыр-мас кө нин-а, шань! Колө өд коркө и бурас овмөдчывны. Крепыда да нэм кезлө. Медым важыся пөль-пөчным вылісянныс, югыд завидьөн ли, ошйысяна ли, вермисны шуны: со пө челядь-ным кутшөм авъяөсь да слөяөсь лоөмны. Олоны — зык ни грөз да сөмын бур вылө рөдмөмны. Медым быдөн, да эськө быд асыв, коставтөг, вольпасысь кок бовкйөдтөдз на, кыпыда аттёбаліс бөрө кольөм лунсө шань да мелі кывйөн. Сэсса шев-кыда нюмгөвтіс аслыс да эскөдана, крепыда шуис: «Ло шудаөн, коми морт!»

Со и ставыс. Кыдз шуасны, мый кылі — сійөс и сьылі. Матыстчысь Виль воөн ставнытө! Став бурсө!

Алексей ПОПОВ,
гижысь



Мед виль воыс лоас бурджык важсьыс

1. Бөръя каднас мыйлакө и кад бөрсяыс эг кут видзөдны. Челядьдыр-йиыд да том кадад нимлунтө виччы-сьомыс вөлі! А өні быттё он и көсйы төдны сійөс. Эм көть абу. Воястө бө-жөдыс он кут. Квайтымын бөрад кө шуасны, тэ пө чужөм вылад ветымын өкмыс арөса кодь на — сөмын нюмыд петас. Дзик өд нин өткодь. Кызь арөса кодь кө эськө вөлін — сэки мөд сёрни. Кольысь во бөрсяыс кө сюсьджыка кыйкнитлы-ны, то быттё эг жө весьшөрө ов. Мыйкө лой гижөма, уджөс кутшөмсюрө донъялөмъяс на вөліны. Шуам, «Гөтрась, пиө, гөтрась» пьеса серти спектакль, кодөс петкөдлө Сыктывкарса

* Польөпи — порсьни.

шылада да драмаа театр, май төлысын босьтис медводдза места Болгарияса Габрово карын мунысь фестиваль вылын.

Ачымос такөдөм могысь ли мый казялі, мый арлыднад кутшөмсюрө вежөртөр нин босьтчө көвъясьны. Шуоны, мый мортыд вочасөн сюсьмө. Ме тай ог тадз чайт-а. Тыдалө, мортыс наянмө кө-а. Тайө абу жө бур.

Тадз кымын, тэрмасьтөг, ставсө артыштөмөн, и олі восө. Водзө кызди лоас? Видзөдлам.

2. Мый йылысь кө тай пыр на мөвпала-а. Водзвыв висьтавыны сьөкыд. Вермас өд и мыйкө дзугсьыны. Медсясө көсья пьесаяс водзө гижны. Рочөдны водзтіджык гижөмаяссө. Дерт, бөръя кадө театръясас мыйкө не сідз кутө ставыс мунны. Режиссёръясыд пьесаястө оз лыддыны. Найө кызвыныс асьнысө нин драматургъяснас шуоны. Босьтасны кодлыськө, ёна нин важөн олома гижысьлысь, уджсө да ас ногныс вөчасны. И пуктасны спектакль. Либө жө нималана мортлөн олөм йылысь сценарий манера вөчасны, да бара жө спектакль артмас. Тайө оти-кө. Мөд-кө, Россия пасьтала ыльөбөн во кызь нин муно сідз шусяна «Виль драма». Сэтчө пырысь гижысьяс петкөдлөны олөмсьыс став лёксө, пеж сёрнияссө сюялөмөн и быдөн. И тайө кельөбсө быд ногыс йөткалөны, ошкөны. Найө зэв өтчукөраөсь, весиг өткымынөн уджалөны кыкөн-кыкөн. Оз өд прөста шуны, мый ракаяс лэбалөны өтчукөрөн, а кутшъяс — өткөн. А кутшөм олөмыс, ми асьным аддзам. Мыйла сійөс сцена вывсьянь нөшта петкөдлыны? Мед пө эз сэтшөмөн ло, йөзыс пө асьнысө боки-сянь аддзөм бөрын вежсясны, вочавидзөны та вылө. Бытьтөкө видзөдысьөс личкөмөн вердөны кутшөмкө иска сёянөн, мед сэсся сійөс вомас некор оз босьт. Сійө өд и сідз оз сөй, мырдөн вердны оз ков. Коркө өтчид веськавлі налөн семинар вылө. Лыддисны сөткана-матькана кывъясөн тыр гижөдъястө да босьтчисны видлавыны. Сетісны и меным кыв. Мися, позьө, на йылысь висьтала сійө жө кывъяснас, кызди ті гижанныд. Оз пө позь, абу мича. Мися, сцена вывсьянь позьө ставсө шуны, а меным оз? Тайө «Виль драмаыс», шуа тай, муно нин во кызь. Кад нин мөд выльджыктор мөвпыштлыны. Мукөддырйыс кажитчө, мый миян веськөдлысьяс оз на төдны, кытчө йөзсө нуөдны, да чайтөны, мый татшөм гижөдъяснас вермасны войтырсө вежны. Позяс, дерт, но кажитчө, мый сөмын лёкланьө сетчасны. И бара жө мукөддырйиыс чайтсьө, мый гашкө тайө налы и кивыв да. Зэв вежөра да олөмсө кужөмөн донъялысь йөзнад веськөдлыны өд ок сьөкыд!

3. Став бурсө, пыдди пуктана войтыр! Мед виль воыс лоас ёна бурджык важсьыс, көть эськө и сійөс лёкөдны нинөмысь. Но бурджыкыд век на бурджык...

Анжелика ЕЛФИМОВА,
гижысь

Лолі коланаөн вольной сьветас!

1. Öні, олөмсө неуна гөгөрвоыштан нин бытьтө да, казялан — быд лоөмтор, лёк ли бур, чуйдөдө-велөдө тэнө мыйөкө.

Таво тулыс ёна дойдіс коксө мамөй. Кык төлысь чөж куйліс

больничаын, сэсся выльысь надзöни-көн велöдчис ветлöдлыны. Ковмис чуктöдны кад, мед тшöкыдджыка лоны дiнас. И тайö неминучаыс, позьö шуны, «пöртiс» менö збыльвывса «мам нылö». Мам нылөн ме медводдзаысь тырвыйö сибöдi аслам мамлысь челядь понда шог-дойсö, на вöсна нимкодълунсö, натöг öткалунсö.

И нöшта... Таво со мамукöй велöдiс: кымын водздзык пондан бергöдны уджйöзтö матыссаясыдлы, сымын öдйöджык лоан прамöй мортөн.

2. Кöть и шуöны, мый кывбур гижöмыд тайö абу проза вылын нускöмыд — мыйкö парсыштiн дай ставыс дась, а менам кывбур гижöмöй — быттö оломсö лöсьöдöм: öтпырейö и доя, и кыпид, сьöкыд и майбыр, полöм и окотитöм. Быд кыв дорö, кызди быд воськов дорö, вежавидзöмөн да пыдди пуктöмөн нин матыстчан. Кывкутан лыддысьысь водзын. Мыйкö артмö, а мыйкö и öнöдз на оз. Ыджыдтор вылö ог на лысьт ыштыны. А поснитортö, дерт, гижа и йöзöда.

3. Сиа быдöнлы дзоньвидзалун! Ся понда кö оз ло майшасьöм, сiдзкö, унджык вын-эбöс-кад вичмас оломнас нимкодясьöм вылö. Сиа, мед быдөн кодлыкö да вöли колана тайö вöльнöй сьветас! Сиа мывкыдлун да сям видзны-лелькуйтны мам кывнымöс!



Николай ВАХНИН,
книга лэдзысь

Гижысь гижö, а ми лэдзам...



1. Мунысь воыс сетiс унатор, но и лишнöйыс эз жö вöв. Ас водзö сувтöдöм могъяс лой пöртöма. Гортын да и удж вылын лючки ставыс. Ёртасян удж эз нормыв, быд вежон пансьылис сёрни-удж. Унаөн шыöдчылисны отсöгла, но кодсюрöлы кад судзсьытöм вöсна лой öткажитны. Артмис лэдзны дасысь унджык коми да роч книга.

2. Гижан уджыд сьöкыд, сы вöсна и ачым ог гиж. Ёнджыка артмöдча да отсала лэдзны гижöмаясöс. Унаөн тай босьтчисны гижны: художествоа гижöд, казътылöмъяс, очеркъяс. Оз быдөн судзны вылыс тшупöдöдз. Редакторъяслы ёна колö шыльöдны-мольöдны налысь гижöдъяссö, но тшöтш и авторыслөн руыс гижöдас мед кольö. Унаөн гижöны кывбур, кöть кывбур тэчан ладсö оз тöдны. Шылад тэчысь аддзас татшöм кывбуртö да öдйöджык нин босьтчас аслас уджö. Сыланкывйид дась, а гижöдыд омöль. Донъявтöг, ме серти, оз позь. Колö петкöдлыны да юасьны, донъявны гижöдъяссö.

Лөсьөдны бур книгатö абу кокни. Уна вын лоö пуктыны гижысьлы, редакторлы, книга-макет лөсьөдысьлы, серпасалысьлы, корректорлы.

Медбур козинöн лыддысьысьяслы лои «Кола» издательство-öн кык юкöна коми сёрнисикасьяса кывчукöр лэдзöм.

3. 2014 воö сиа унджык чужны коми войтырлы. Газет, журнал да книга мед водзö петöны. Гижысьяс да лыддысьысьяс мед оз чинны. Быдмысь войтырыс мед водзö сöвмас, уджалысь войтырлöн содас чöжöсыс, пенсионеръяс мед эз висьны да дыр олісны.

Любовь АНУФРИЕВА,
гижысь

Быд здук олöмас тöдчана

1. Мунысь восö кута казътивны, дерт жö, бурöн. Тайö воыс меным кöть эськö и эз вöв кокниöн — кöнкö коліс тэрмасьны, кöнкö чöла овны, кöнкö чотöмöн кыссьыны... Но век жö став туйсö муні. И аттьö Енмыслы быдпöлөс туйсьыс! Натөг эськö унатор эг гөгөрво, эг во аслам шудöдз.

2. Неважөн помалім гижысь Елена Афанасьевакöд повесыт-диалог www.Кык.ю.гу. Повесытсö гижим öтув. Быттьö öти ловшыöн. Медводдза юкöныс петаліс «Арт» журналын, мöдсö тшöтш сэтчö дасьтам. Сідзжö уджала паськыда тöдса путешественник Сергей Семяшкинлöн олан туй серти очеркъяс вылын. Эмось и кывбуръяс, но эз на чукөрмы подборка вылö.

3. А локтан 2014 воын йöзыслы сиа, мед лоланыс век пуксьылас бобулöн радлун и чöвлун. Мед быд здук олöманыс лоас тöдчанаöн, шаньöн. И медым ставлөн вöлі дзоньвидзалун. Выйим кö дзоньвидзалуныд — ставыс артмас.



Александр ШЕБЫРЕВ,
гижысь

Надеяөн да эскöмөн

1. Мунысь воыс эз торъя ёна повзбöдчы. И тайöн кöть бур. Кызь арöсөн тэ öзъян на, ыджыда-паськыда кöсьян, комынöн — унаторйö на эскан, а ветымын бöрад корсян нин лöнин... Мед ачыд да матысса рöдвужыд дзоньвидзаöн вöлісны, мед верстыö-яслы удж сюрис, мед челядыд да нукъясыд этшаджык тöжд-мог тöдлісны. Мунысь воас мян чужис нöшта öти нучка, и тайö — ставыслы радлун. Эскан, мый олöмыс оз на помась, оз на джöмды. Творчествоын воыс абу жö лёк, чужис да петіс вель уна висьт. Сідзкö, нярöдчыны нинöмла. Ставыс öд — ас

саяд. Нинөм оз вежсы, ачылд кө он пессы. Эн дышөдчы, ас вылад ёнджыка надейтчы, юнард да ки-кокнад уджав, и сөмын сэк мыйкө артмас.

2. Бөръя кадас ёнджыкасö гижависьтъяс, «романтической поэзиялөн» кад неуна ылыстчис. Окота лои гижны «психологической деревенской» проза. Ачым ола сиктын, төда, мый вөчсө тан, төда сиктса мортөс. Менө интересуйтө сылөн лов пытшкыс, сылөн видзөдласыс, сылөн көсийомыс да төжд-могыс. Мыйөн олө? Кыдзи сьокыдсыс петө? Кутшөм өнiя коми мортлөн этшыс, характерыс? Торъя тема: вөр-ва да морт. Коми морттө да вөртө сира гезйөн көрталөмаөсь. Вөрыс — сылөн олан местаыс, и буретш зумыш парма сетө подуvsө коми характерлы. Воча ныр: вөр да тэ. Надейтчыны некод вылө. Талун тэ вөрыслы — бокөвөй, сылы тэ он ков, сийөс тэ парскан-жугөдан...

И сийө тэд петкөдлас пуж, слабмыштан кө. Колө быд здук помнитны та йылысь, колө вежны видзөдластө вөр-ва дорө, колө дугдыны лыддыны асьтө «көзяинөн». Збыльвылас морттыд — вывтi слаб. Но мыйлакө вылын ныра, тшөкыда вунөдө та йылысь.

Өнi гижав куим неыджыд висьт вөрсав пемөсьяс йылысь. Гашкө, и мөдөда коркө «Войвыв кодзулө», шогмасны кө.

3. Дерт, медпервой — дзоньвидзалун да тыр шуд. Тайө кывъясыс шымыртөны став олөмтө. Коми йөзлы торъя вөзийом — эн вунөдөй чужан кывтө. Мортлы лолавны колө сынөд, а вужвойтырлы — аслад чужан кывйид. Бырас кө сийө,— бырас и вужвойтыр. Колө тайө? А кыз вылісяньыс видзөдласны миян вылө прапөльяс да прапөчъяс, кодъяс чужтылісны ас кывсө? Одвакө найө прөститасны. Надеяөн, эскөмөн — став бурсө тiяны! Мед выль воыс шаньөн лоас.



Елена КОЗЛОВА,
гижысь, Коми Республикаса
гижысь Котырөн веськөдлысь

Шоныд керка да судзсяна олөм

1. Арлыд содөмкөд тшөтш мөдi казъяны: кадыс өдийөсыс-өдийө лэбө. Пыр тэрыбджыка и тэрыбджыка. Казьтыла да, велөдчигөн сы мыйта прөст кадыс вөлі, а өнi нинөм вылө оз тырмы. Колө пыр кытчөкө мунны, мыйкө вөчны, а окота эськө пукалыштны да мөвпа-лыштны, муртавны-казьтивны кольөмасө.

И мунысь восө тшөтш. Воыс гижысь Котырлы эз вөв шондiа. Вөліны и сьөд лунъяс. Куим гижысь быри тайө воө. Ухтаса

роч поэт Александр Журавлёв, коді зэв бура да лёсыда гижис челядьлы кывбурьяс. Коми выло сылысь гижодъяссё вуджодліс Николай Щукин. Ухтаын жё овліс роч поэт Анатолий Пашнев, пенсия выло петом бёрас мунліс Анапа дорса Витязево посёлокё, но миян котырысь эз пета, эз вуджлы краснадарса гижысьяс дорё. Эз и дыр ов лунвылас, во вит-ё-квайт.

Коми лыддысьысыслысь, дерт, ёна сёлөмсё вөрзёдіс Александра Петровна Мишариналон кувсьомыс. Шонъянөй, югыдін да шоныдін модарьюгыдас. Сылон енбиа кывбурьяс-ыс колины коми литературалон «зарни кудйö» — быдон, коді көсьö, вермас гумовтны-лыддыны сылысь сөстөм да югыд гижодъяссё.

Бурторйыс вөлі жö тайö онас. Уна гижысьлон петіс выль книга, ставыс найö воисны библиотекаясö, поэö босьтны да тöдмасьны.

А менам сёлөмö да вежөрö коли октябр төлысын Россияса гижысьяслон XIV съезд выло Калугаö ветлөм.

2. Важонкодъ нин босьтчылі гижны пьеса, да сідз помавтөг и эновті. Но темаыс оз лэдз ас дорсьыс. Буракö, кытчөдз ог гиж помөдз да йөзөд, сэтчөдз мөдторйö босьтчыны ог вермы. Öні нин мөвпала, гашкө, повесътö вуджөдны. Повесът ли пьеса лоö, а нимыс — «Туйдор бадъ».

3. Ме зэв ёна радейта коми войтырсö да став сёлөмсянь сиа быд бурсö. Мед быдöнлön вөлі шоныд керка да судзсяна олөм, мед челядь быдмасьны дзоньвидзаөсь да шаньöсь, мед пöрысьяс оз кольны öткаөн, а ставон лоам вежавидзысьон да öта-мөдöс модам пыдди пуктыны.

Василий ЛОДЫГИН,
гижысь

Быд асыв нюмды луныслы!

1. Төд выло кө босьта ог сöмын гижан уджөс, а ставнас олөмөс, то медбур, мый 2013 воын ставыс вөлі шань семьяпытшса олöмын. Ме — ем, гөтыр — сунис, пьян, видзöда да, вежөраөсь, ашпөр олөмаөсь, кывзысьöны-отсасьöны.

Босьтны кө гижан удж, то ачимöс видны нинöмысь. Районса газетын редакторалөм — зэв ыджыд юр висьом, а вель на уна гижі кывбурсö да висьтсö, кодъясöс лэдзöны республикаса газет-журналъяс, на лыдын и «Войвыв кодзув». Медыджыдторйыс — «Звёзды Севера» пас улын бөрйөм гижөдъяса «Лöсас» книга лэдзöм. Шуöны, бура пö артмöма.

Син улын кута ассьыным Эжва йывса том гижысьясöс. 2013 воын бара на чукөртлім найöс да велöдыштім, кывбурьясависьтъяса книгатор лэдзим, витөдöс нин. Зэв лöсялö отсöгыс республикаса гижысь Котырлөн, национальной туйвиза министерстволөн, асланым районын тайö уджыскөд йитчөм йөзлөн.



Тайо уджыслы подуво кольом нэмлөн квайтымынөд воясын пуктыліс газетлөн сәксә редактор, висьтәяс гижысь Николай Трофимович Пунегов, и ме лыддя коланаон водзо нуодны тайо зэв тодчана уджсө. Вовлом велөдчысыясыс унаон лоины гижысыасөн. Тайо Александр Лужиков, Эдуард Тимушев, Вячеслав Бабин, Алёна Ельцова, Александр Шебырев. Бура тодсаос нимъясыс Виталий Уляшевлөн, Иван Ногиевлөн, Анжела Ильиналөн, Артур Уляшевлөн.

Сәсся өд менам эм нөшта өти «кага» — өния выль коми сыланкывъяслөн «Василей» фестиваль-конкурс, кодос мөвпыштлі 20 во сайын, а кок йылө отсаліс сувтодны зэв енбиа морт, Коми республикаыс культураса заслуженной уджалысь, «Эжваса дзоридзяс» нималана народной хорон веськөдлысь, композитор Василий Яковлевич Гуцин. «Василей» век мунө чужанінас — Куломдінын, а 2013 воын, сы вөсна мый дзоньталөны вөлі районаса культура керка, «лэччыліс» Сыктывкарө. Сылөны и менсым сыланкывъясос. Лэдзи нин компакт-диск. Чайта, кытчөдз лоам сыланкывъясөс, сэтчөдз и колям вужвойтырөн. Та вөсна «Василейос» пыр кута сьолөм бердын.

2. Дерт, медводз артмөны кывбуръяс. Ме найос «гига» юрын да дасьсө нин вуджөда бумага вылө. Поэма — мөд делө, сійос лоө гижны пызан сайо пуксьомөн. Гига ручкаон, сәсся компьютерө өкта, бөрыннас нөшта лөсьодыштала. Öнi уджала «Ярө вуж» поэма вылын. Гижөдөй аслам зиль да йөзөн пыдди пуктана рөд йылысь, а паскыдджыка кө — ичөт грездлөн сыланкывйөн и бөрдөмөн олөм йылысь. Мына редакторлөн уджысь да пукся роман сайо, немыын юкөн эм нин. Локтан во кежлө сеті лэдзны челядьлы книга. Кывбуръясөй — кык сборник вылө. Артмө нин и висьтәяс книга. Мед сөмын лэдзөны.

3. Коми йөзлөн сиөмыс өти: кузь нэм да бур шуд! А ме эськө кори медводз тодны удж. Тайо өд дзик ньөти оз лөсяв, кор сиктса морт асьсө вердмөн оз вөдит град йөр, оз видз некутшөм скөт, оз лөсьөд төв кежлө пес, оз кыйсыс ни вотчы. Удж и сөмын удж могмөдө мортос став коланаторйөн. А небыдджыка кө помавны вочакывъясос — мед быд асыв чеччин да нюмдін луныслы!

Иван БЕЛЫХ,
гижысь

Коми горыс мед шыаліс

1. Оз позь өти ногөн донъявны мунысь вояссө. Найо морт олөмын век уна рөмаось. Кольом 2013 воын тырмис жө шогыс и радлуныс.

Шог сысыс, мый эновтіс шондіувса олөмсө 88 арөс тыртігөн менам мамлөн ичөтджык чойыс, Агния ичиньö. Палыын чужлом-быдмылом Васька Петрө Пашө Öсьөлөн Агния ныв вөлі



миян рѡдвужлѡн воддза кѡленаысь медбѡрѡяѡн. Сыктивкарса медучилище помалѡм бѡрын сійѡ пыр вийсис-пессис йѡзлѡн дзоньвидзалун вѡсна и От гѡра вылысь Погостса, и Емдінса больничаясын уджалігѡн. Кѡть ыджыд наградаясѡн сылысь зі-льѡмѡяссѡ эз пасйивны, но авѡя ань колис сійѡс тѡдысьяслѡн сѡлѡмѡясын ас йывсьыс сѡмын бур казѡтылѡмѡяс. А менам паметьѡ медѡѡна йиджтысисны От гѡравывса Сюлатуй грездын, Паль сиктын, Ивадор грездын, Студенеч посѡлокын ѡти вуж-йысь петѡм войтырлѡн уна лыда аддзысьлѡмѡяс, кѡні торйѡн бура петкѡдчис менам ичиньѡлѡн, Агния Иосифовна Сизевалѡн, бурлуныс, вежавидзѡмлуныс, йѡзѡс пыдди пуктѡмыс. Сійѡ вѡлі збыльысь ыджыд сѡлѡма коми аньѡн. И мед жѡ мѡдарѡюгыдас, эм кѡ кѡнкѡ сійѡ, ставыс бур вѡлі сылѡн.

А медыджыд радлунсѡ меным вайисны роч кыв вылын ги-жысь менам ѡртѡяс Андрей Канев, Алексей Иевлев, Галина Маркова. Менам унаысь нин петавлісны роч кыв вылын висѡтъ-яс торѡя альманахѡясын, газет-журналѡясын. И со найѡ чукѡр-тѡмаѡсь да лѡдзѡмаѡсь роч кыв вылын менсьым висѡтъясѡс меным водзвыв висѡтавтѡг, асланыс сѡм вѡлѡ неыджыд тира-жѡн, «Геопринт» издательство отсѡгѡн. «Формула вечного огня» вѡль небѡгас пыртѡма 33 висѡт, кодѡясѡс гижлі бѡрѡя воясѡ. Ѳні наѡн вермасны тѡдмасьны и роч лыддѡысьысѡяс. И меным таысь, дерт жѡ, нимкодѡ. Вѡськыда шуѡма роч пѡслѡвичаын, мый зептад сѡ шайтысь ѡна бурджык сѡ бур ѡрт. И со тайѡ воас ме нѡшта ѡтчыдысь гѡгѡрвои бур ѡртѡяслысь донсѡ.

2. Бѡрѡя кадас аслам челядьдыр йылысь кутшѡмскюрѡ ги-жѡдѡяс йѡзѡді «Йѡлѡга» газетын. И водзѡ на та йылысь гижѡ. Кодкѡ бытѡѡ тойлѡ менѡ мышсянь да вашкѡдѡ пельѡ: гиж, гиж, мѡдысь ѡд челядьдырыд оз нин во, а ѡніѡ лыддѡысьны радейтысь нывкаяслы да зонкаяслы найѡ лоасны дѡна козинѡн да кутасны велѡдны бура овны.

И тїѡн журналлы вѡзїи сиктса олѡм йылысь некымын ги-жѡд. Кѡть и нѡм чѡж ола карын, но карсаѡн сїдзи эг и ло. Менам кызвын гижѡдыс сиктса олѡм-вѡлѡм йылысь. Ас сиктѡ волѡмыс меным быдысь ыджыд праздник кодѡ, кодї сетѡ содтѡд вын-ѡбѡс. А сѡні олысьясыс меным лоѡны медся матысса войты-рѡн. На йылысь и водзѡ кута гижны. Сѡсся мойвиас кѡ, кѡсьѡ лѡдзны йѡзѡдлѡм нин гижѡдѡяссѡ торѡя небѡгѡн.

3. «Войвыв кодзув» журналлѡн 2012 вося ноябр тѡлысьѡ «Коляс-ѡ чужан кывным?» гижѡдын майшасѡмпырысь пасйы-лі, мый 2002 да 2010 воясса переписьѡс коласын коми войтыр чинѡма 65 сюрс морт вѡлѡ, 293 сюрссянь 228 сюрсѡдз. И со вѡль, 2014 во водзвылын меным бара лои окѡта юавны ассѡым, а коляс-ѡ коми войтырыс, шуам, 50 во мысти кымын. И эг аддзы вѡчакывсѡ. Но век жѡ чайта, мый кызвыныс миян пиысь пыдди пуктѡны да радейтѡны мам кывнысѡ. Со и окѡта сины ас коми войтырлы вѡль, 2014 воын, медем найѡ эз ѡтдортны, эз кедзѡтны чужан кывнысѡ, пѡль-пѡчьясѡн на лѡсьѡдѡм бур оланногнысѡ, кѡні кѡтъ эз вѡвны. Мед челядь кок вѡлѡ сувтѡм-сяньыс гѡраа варовитїсны ас костаныс комиѡн, мед петїсны коми кыв вылын газет-журналѡяс да небѡгѡяс, юргисны коми радио-телепередачѡяс, мед комиѡн чѡлѡмасисны ас костаныс миян войтыр. Ѳд вунѡдам кѡ ассѡыным вужѡясынымѡс, миянѡс

оз кутны пыдди пуктыны и мукöд сёрниа йöз. И окота сины, медым чужан сиктъясын коми горыс шыаліс уна-уна во.

Алёна ШОМЫСОВА,
гижысь

Мед йöзыс эскисны öта-мöдныслы

1. Эз вывтi кокниа тайö воыс мун: визув паныд быттö каті, уна коськöм вуджи. Но сэсса вочасöн бөр ставыс ладмыны кутіс, олöмыс бара пондіс веравны югыд рöмъясöн. Воыс көть и вайис уна вежсьöм, лёкөн сійöс казъывны ог кут.

2. Бөръя кадас менö пыр ёнджыка кыскöны челядьлы гижöдъяс. Та вöсна и босътчи лöсьöдны челядьлы посни серпасъяс да кывбуръяс. Нöшта заводиті гижны челядьлы мойд сяма повесът, но помыс сылөн оз на тыдав...

3. Сии эськö, мед йöзыс пыр колисны шань сьölöмаөн, эскисны öта-мöдныслы да отсалісны сьöкыд здукö! И мед воыс быдöнны ваяс ыджыдсьыс-ыджыд шуд!



Валентина ТРОШЕВА,
книга лэдзысь

Дзоридзав Коми му да чужан кыв



1. Бара кольö бөрö во. Быд во помын ми пыр вöчам сылы кутшöмкö кывкöртöд. Быдтор, дерт, лолö вобыднад: и бурыс, и лёкыс, и быдпöлöс мытшöдыс. Но ставыс тайö вунö, кор ме аддза «Анбур» книга лэдзанінлысь выль книгаяс. Буретш во помнас найö унджыкыс и чужöны. Зэв нимкодъ, мый таво миян петіс вель уна небöг. Медводз, дерт жö, велöдчан книгаяс дасьтiм да лэдзим. Сідзжö петісны и художествоа гижöдъяс. Василий Лодыгинлөн «Звёзды Севера» пас улын «Лöсас» кывбура öктöд, рочөн «Белый

бор» литературнöй альманах да Александр Суворовлөн «Дальный свет» прозаа книга, Александра Мишариналөн «Чужанінын, гортын» кывбура öктöд да мукöд небöг. Эгö вунöдöй и посни войтырöс, налы йöзöдім А.В.Мишаринлысь «Кармылькйын гожöм» да Н.Н.Курастовалысь «Пöльöлөн мойд» книгаяс. Медся поснилы петіс Нина Обрезковалөн «Петук Васьö» кывбура книга.

2. Ми, «Анбурын» уджалысьяс, книга лэдзысьяс, дерт жö, öнi нин выль во вылö уджалам. Дасьтам выль велöдчан небöгъяс, дзоляяслы — мичаа серпасалöм книгаяс, верстыöлы лыддьöм вылö выль гижöдъяс. Планъяс миян ыджыдöсь. Эскам, мый ставыс артмас.

3. Сиа быдöнлы шуд, дзоньвидзалун да выль воын ыджыд вермöмъяс! Мед водзö сöвмас да кутас дзоридзавны Коми муным да коми кивным!

Алексей ВУРДОВ,
гижысь



Сиа дзоньвидзалун да шуд

1. Гөгөрвоны асьтö — сийö и выйим олöм. Быд кадлөн — аслас ру, а быд мортлөн — аслас кылöм. Веськыда кö, кызди да мый мортыс вуджöдö ас вывтыс, сийö мукöдыслы ставсö некор оз висьтав. Менам видзöдласöй: öти-кö, став бурыс — быдöнлөн ас пытшкын, а мöд-кö, бурсö вöчны да сийöс мукöдлы сетны — тайö радлöм да шуд. Быд

во ме ачымöс быттö бокисянь видзöдла, юала ассьым: «А мый ме вöчи? Кутшöм сьölöм биөн «сотчи» мукöд вöсна? Кодлы кутшöм бурсö вöчи?..»

Шуам, мунысь воыс меным эськö сьöкыд вöли, но ме колльöда сийöс нюмөн, öд мамö, ен сыкöд, ловъя на, кöть и пöрысь нин да висьöмъяс йитшкöдöны. Шулöны тай, «дзуртысь пу — сийö абу сись, сы понда и дыр олö». А сідз, став шöр могъясöс артмöдi: и документальной фильм вöчи, куим пьеса гижи, кык висът, кык сыланкыв, дзоньталi вөр керкаöс, вөр-вакöд сьölöмсянь сывъяси...

2. Квайтöд во нин «Му пытшкöсса морт» нима роман гижа. Нöшта сиктса олöм йылысь öнi пьеса да повесът. Во помöдз думайта помавны.

3. Олöмсö гөгөрвоны да гөгөрвоöдны вермас сöмын ачыс мортыс асьсö кылöмөн. Та понда колö лоны честнöйөн, медым ас водзад и мукöд водзас эз ло яндзим. Быдöнлы сиа эскöм да надея. Сиа дзоньвидзалун да шуд. Выль воыс — сийö выль вежсьöмъяс, а сідзкö, выль могъяс да мытшöдъяс, выль тöждъяс да бурторъяс. Видзöй асьнытö! Став бурсö!

Елена АФАНАСЬЕВА,
гижысь

Ыджыд көсиймөн олöй-уджалöй

1. Мый колис тайö воыс меным, ставсö висьталас гижöдöй. Дерт, ас кежысь мöвпалан, казътылан колян воын лöмторсö, но кор панан гижöд, сийö ставсö эрдöдас, весиг сийöс, мый йы-

лысь тэ эн на удит мөвпыштны. Сідзкө, кута виччысьны выль кывбуръяс, висьтъяс, мед тōдмавны бурджыка тайō восō да сыōн вайōм Кывсō.

2. Люба Ануфриевакōд водзō гижам «Кык ю» повесът. Воддза юкōнсō йōзōдлīm «Арт» журналын. Йōзыс лыддьōмаōсь и корōны нōшта гижны. Ми-анōс тайō ёна ышōдiс. Мōд юкōныс, ме чайтōм серти, лои вынаджык воддзасъяс. Татшōмсяма гижōдыс (ōта-мōдкōд варовитōм) сетō позянлун унатор йылысь панны сёрни, восьтыны пытшкōсса кылōмъяс, бергōдчывны важас — казъывны мыйяскō, юксыны ёрткōд казялōмторъясōн.

Таво лои панōма и выль гижōд: сийō лоō дневник сяма. Тайō пасйōдъясыс — пытшкōс сёрни. Ловпытшкōсса гусяторъяс... мый он висътав быдлунъя олōмас и та йылысь некодкōд весиг кыв он веж.

Нōшта тайō гижōдсō позьō шуны висътасьōмōн. Но кодлы? А кодi кылас. Сылы и лоō. Тайō гижōдыс, чайта, эрдōдас адзъитōм туй — ловлысь туй. И сийō тшōтш абу шыльыд.

3. Пансьō выль во. Дерт, быдōн виччысьō мыйкō буртор, а мед бурыс артмис, колō таво нин ыджыд вын пуктыны могсō олōмас пōртōмō. А мōд ног оз овлы.

Сиа тiянлы, дона войтыр, мед вōлi ыджыд кōсйōм овны-уджавны, мед тырмис дзонъвидзалун. И мед чужисны выль югыд мōвпъяс, а найō мед эз сōмын дзирдавны кодзувъяс моз, а олiсны да бурмōдiсны тiянлысь сьōлōмнытō.



Иван НОГИЕВ,
гигысь

Видзōй ōта-мōдтō!

1. Кольōм восō меным оз позь лēкōн казъывны. «Войыв кодзулын» петiс «Виччысьтōм шуд» повесът, зэв ыджыд аттō редакциян уджалысьяс-лы, мый эз бōрыньтны да йōзōдiсны сийōс. Пилōн семьяыс ипотека отсōгōн вермис нōбны квартира да ōнi оз нин ков частнōйын овны да вōтлōмысь повны-тiравны. Внуклы сетiсны садик-ыс места, оз нин ковмы гортын видзны. Сiдзсō менам куим внук да кык внучка. Ыджыд надеяōн кута виччысьны выль, 2014 во.

2. Ōнi помаланыйын «Кирō Васълōн фото» повесът, сәни лыддьысьыс бара паныдасяс тōдса нин детинка Евлог Лыюровкōд (дерт, воас кō сьōлōм вылас повесътыс гырысь гижысьяслы



да йӱзӱдасны кӱ журналын). И кӱсъя заводитны выль по-
весът, кодлы ӱнӱ кешлӱ «Ёма» ним пуктӱ. Ог тӱд, тырмас оз
сямӱй?

3. Став сӱлӱмсянь сиа коми войтырлы, «Войвыв кодзув»
лыддысяслы, кузь нӱм да бур шуд! Мед тӱян семьяын пыр
вӱлӱ радейтӱм, пыдди пуктӱм, ставныд лӱйӱ дзоньвидзаӱсь да
видзӱй ӱта-мӱдтӱ! Мед ылӱтӱ кытшлаласны тӱянӱс шогыс да
лӱкыс, мед ыджыдаласны шудлун да радлун! Сӱрнитӱй да лыд-
дысьӱй комиӱн, ӱн ӱтдортӱй мам кыв!



Олег УЛЯШЕВ,
гижысь, учӱнӱй

Видзӱй асьнытӱ да матыссаястӱ

1. Таво коми енъяс видзисны ма-
тысса йӱзӱс воштӱмысь: ставыс коли-
ны дзоньӱн-бурӱн. Гортын ставыс жӱ
тырмӱ. А сӱдзкӱ, и бӱрлань исковтысь
восӱ лӱкӱдны некыдз оз позь. Дерт
эськӱ, ыджыд уджъяс ӱз ло пакӱритӱ-
ма, но век тай водзӱ мунан, кӱтъ вось-
ков джын, да водзлань.

2. Думъяс ӱмӱсь лӱдзны Николай
Вахнинлӱн «Кола» издательствоын ко-
милӱн важ олӱмлы сӱӱм неыджыд книгатор. «Излань зыран,
зарни зыран» ним улын петас кӱим висът: «Комдорсянь Ком-
мӱӱ», «Пан туй» да «Енколаяс йылысь сӱылан». Серпасавны
босътчи ачым.

3. Локтан воас меным тырӱ нӱм джын, да верстьӱ морт чи-
нӱн нин, велӱдыштӱмӱн позьӱ шуны: «Бур войтыр, коми вой-
тыр, ӱтшаӱн колим. ӱта-мӱдтӱ ӱн пурӱй. Видзӱй асьнытӱ да
матыссаястӱ. А мукӱдторйыс сӱсся ачыс локтас, он кӱ дышӱдчы
да лов серти олан».

Валентина ЛИМЕРОВА,
литература туялысь

Выль керкаыс мед унджык лыбӱ

1. 2013 вонас быдторйыс меным вичмис. ӱткымынторсӱ
ог и куж, кыдзи донъявны. Со, шуам, Вера Алексеевна Латы-
шевалысь Америкаӱ овны мунӱмсӱ. Вера Алексеевнакӱд ми
тӱдсаӱсь важӱнсянь, комын воӱ маталӱ. Велавсьӱма сы дорӱ:
вежань кодӱн нин сӱйӱ мянлы, томджык коллегаясыслы,
лоис. И сытӱг гажтӱм — он нин паныдав сӱйӱс улич вылысь,
пӱттӱдзыд он варовит. Но письмӱясас гижӱ, мый океан саяс
олӱ шаня, ставыс гӱгӱр мича, горт дӱнас ӱм ичӱтик сад, кӱнӱ
ассыыд киподтӱ позьӱ петкӱдлыны. Быдлаын дзоридз, карас

йöзыс öта-мöдныслы нюмъялöны. Но и бур, сідзкö. Радла, мый Вера Алексеевна эз повзъы ни кузь туйысь, ни тöдтöм муысь. Виль олöм на олас.

Нöшта öти ыджыд вежсьöм менам олöмын: другысь нюжаліс-верстыммис ичöтджык нылöй. Меным ёртöн лоис. Бур.

2. Некымын во сайын босътчи тöдмавны, кысянь заводитчöма, пестысьöма коми проза. Колö сигөрöдз вайöдны тайö уджсö, кöть и казяла, мый зэв ёна кыскö öнiя литература йылысь сёрнитыштны-гижыштны. XIX нэмся öти краевед гижліс, мый зыряналөн некутшöм история абу. Талун ачыс XIX нэмыс лоис историяөн. Важсö туяліг-восьтіг ми лоам войтырөн, кодлы эм мый йылысь казътивны, сідзкö, и эм мый сёрсыным босътны аскиас.

Нöшта зэв окота вöчны челядьлы лыддьöм вылö коми культура да литература йылысь мича нига — тайö, дерт, ёртъяскöд.

3. Мый эськö ме сия коми йöзлы? Чужан грездын йöзыс бырны кутісны. Важся йöзыс на шулöмаöсь, грезд пыддиным пö кыддза рас лоö. А таво гожöм том семья лэптіс виль керка, и эз дачникалöм могысь, а олöм вылö. Гашкö, сідзкö оз на рассяв чужаніной. Тайöс и сия став коми грездыслы — мед унджык виль керкаыс лыбö, унджык том йöзыс овмöдчöны, быдтысьöны-олöны!



Кад визулас (Бу вывса олöмьсь)

Уна сьölöм пыр
визувтö Бу,
шогсö сэсь кылöдö...
Вермас и мöдарö —
мыня-изсö тэчас
мыйта оз ков.
Быдöнлөн тайö олöмас
аслас сям.
И юыслөн тшöтш.

Блджыд мамлөн чойыс,
Априк Палэй,
вöлі молитчысь баб,
старöверка.
Орччөн сувта ськөд ичöt ныв
да тшöтш юрбита.
Образъяс —
джадж пасьталаыс...
Кымын Ен...
Налы копрасьö.
А öшиньын —
выльöн на мыччысьöм
тöвся
гöрд шондi...
Ме и сылы копыртчыла...

Выльвидз,
Паспом,
Кудин,
Катша,
Митьöv,
Канач,
Тыйыв...
Бу пöлөн мыйта деревня вöлі
(эг на ставсö и казьтышт),
да нöбöдöма-нуöма кадыс.
Но эмöсь на йöз,
код пытшкын налөн олан руыс.
Горöда Катша кыр йывсянь:
көнöсь нö-ö ti-i-i?...
Шыасяс йöлöга,

и быттё став бур войтырыс тани,
некод некытчö абу мунлöма.

Меным кө,
енэжыс медмича
Важгорт весьтын...
Кымөръясыс кывтöны улiтi,
некытчö тэрмасьтөг...
Кыпыдöсь,
быттё тулысын воалысь лэбачьяс.
Татшöмöсь-ö нö
мöвпъясыс пöгöстса йöзыслөн...
Öнiя кадö...

Сиктсьыным важ вичкосö кылöдöма ю.
Мöд вичкосö сотiс би.
Видзöй коймöд вичкосö
биысь и ваысь,
лэк синмысь,
лэк думысь,
лэк кывйысь.

И тальöй сы дорö туй.

Шулöны, оз пö позь
керка дорад вайны льöм
(пуктыны ас киöн).
А Öльга бабö вайлöма.
И эз кө вöв тайö пуыс,
чайта —
ни öти кыв эськö эг гиж:
öта-мöднымкöд сёрнитам нэм;
льöмйыс — быд вожөн, быд чалльөн.

Ку* мöдлапöлас вуджалам
Априк пöль да Öдэй баб гу вылö...
Кодöртны найöс.
Келам юсö — ваыс йи.
Юр вемöдзыд волас көдзыдыс,
пожйыштас и сьöлöмтö...
Став лөксö сэсь öти здукөн
мыськас...

Путшкымдiн весьтын,
Ву талапöлас,
лэптöмаöсь кык вичко —
вöтөн аддза.
Регыд и эз лоны
кыкнан вокö —
Сашкö да Геня.

* Ку — ю, усьö Вуö.

Мича Агнейөн йёзыс нывбабаёс төдісны...
А олөмыд олөм.
Нель йылөм ковмис быдтыны өтнәсөн:
ю вомөн төвся туй кариг
Ваачөв Петя верөсыс вөйи,
да став сьөкыдсө нәм чөжыс
өтнәсөн нуис ань.
Вөлі шонді кодь мелі
Агней тьөтө,
скөравны эз кужлы...
век бурөн.

Карысь воа,
пета горт уличө
да асья лысванас мысся...
Мөд муын
лысваён он мыссьыв.

Томдырийыд и тулысыс мөд нога...
И пөтічыс* нач морөс пытшкәд тәпкө,
сывдө төвся веськодълунсө.
Сәсся регыд и чукөстчас муслун,
босьтас аслас сывбордйө
да енәжөдз кыпөдлас...
Мый сәсь и корсян,
енәжсьыс...
А лолыд ләбө.

Кор шогсян,
быд пу тшөтш тәкөд шогсьө.
А кор лолыд тырлө радлунөн,
мөвпыштлан-ө пуяс йылысь...
Сәк өд найө пуяс,
и сөмын...

Берба балясө окышта,
кутла кыздз пусө...
мена́м му вылын тулыс,
и муслуныс сы мында...
морөс пытшкө оз төр...
да тадзикөн сәсь
солькнитчө...

Демьян Ванька Анкей тьөтө
бара и горөдас
ассьыс сыланкывсө:
«Виж улөсо, сьөд улөсо,
Тә вылад ме пуксьыла,
Милөё, желаннөё да,
Тә вылад надейтчыла...»
А мый сійө виж улөсыс, сьөд улөсыс?..

* Пөтіч (уд.) — *войтва*.

А сэсся коркё и тачкис юрам:
тайё од лун да вой.

— Сутшыкё, сутшыкё,
тэ сикт гөгөр,
а ме сарай гөгөр,
кодным водзджык воам?..—
бабё тшөктё шуавны,
менё сутшык босьтома да.
Шуала, шуала,
а сутшыкыс пыр водзджык воё...
Но коркё сэсся и ылалас кытчөкё...
Дай вунёдан сы йылысь,
быттё некор абу и вёлёма.

Мамлён челядьдырысь

— Кытчё нё, слабудкаясыс*, мөдісны?—
Гурей Марей горзё бөрсяньод.
— Гурей-марей** вотны,
гурей-марей вотны...—
дөзмөдыштам сійёс.

Мыйла сэтшөма колё качайыс ичөтнад?..
Лолыд кокни,
да лэбавны вөйысьё?..
Сы понда и дзайган?..

«Тайё шогсьыс
Чиркын***
сизим морт нин кулёма»,—
шуласны,
кор казяласны весьшөрё шогсьөмтё.
И збыль,
тайё кывъяс бөрас
шогыд пакталё.
Гашкё, и Чиркё шывксьөдө.

Асъя кыа Мария...
Рытъя кыа Нина...
Ягсиктысь кык чой...
Верёс сайё петісны, олём панісны...
Өтиыслөн чужис нель ныв
да дыр виччысяна пи.
Мөдыслөн чужис нель пи
да дыр виччысяна ныв.
Кыдзи сэсся шогмис йылөмныслөн олөмыс —
тайё нин виль висът.
А меным өні
асъя кыаыс — Мария...
рытъя кыаыс — Нина...

* Слабудка (уд.) — бур ныв.

** Гурей-марей (уд.) — намыр.

*** Чирк — Ву вылын грезд.

Эг важөн на өд и шулй:
Юдинъяслөн керка дорын пелысьыс кызди таво
ыпнитіс —
сэтшөм розъя.
А бөръя вояснас
вотöсыс пыр этшаджык и этшаджык пондіс лоны.
Косьмө пуыс.
Лэбач-кадыс кокаліс пелысьлыс став вирсö.

Мамöлы

Нярмисны гожся дзоридзяс...
Но содзнысö восьталöны астраяс...
Мед оз сэтшөм гажтөм ло пемыд арыс
төв йылын öтка сьölөмлы.

Ме гажтөмтча
ичөтдырся сьölөмысь.
Сійö йөгзысь шонді югөр койд...
Мукöд ичөт сьölөмö пыралас вöлі кортөг.
А öні — вояс колины да —
сійö сьölөмъяслөн öдзöсьясыс пöдсаöсь.
Торкөдчан,
да оз восътны.

— Сёкатö-нылö,—
шуалö бабö,—
кула да,
меысь ин пов.
Кулөм мортсьыд оз ков повны.
Ловъя мортысь повны колö.

Кепысь серөдöма бабö.
Серыс сьöда-еджыда.
Кык рөм сöмын,
а ставсö шуöма:
пемыд войсö и югыд лунсö.



Куим висът

Кын Опонь

Сиктын кывсис, Кын Опонь пö чорыда висъмöма, куланвыйын, шой кодьон карö лэччöдöмаöсь. Кодсюрö мортсö эз и жалитыштны: сідз пö и колö... Горшасьöмыс пö лыөн тасасис. Эз жалит Опоньöс и Гриш Миш. Кулас кö пö, гу вылас ог и ветлы, кöть эськö Опонь и ылысса рöдня на... Мед, йöзыс кö дивитасны...

Кын Опонь... Квайтымын арöса, метрөн-джинйöна торскун кодь на мужичöй. Квайт челядя бать (мед кö тушанас Енмыс öбöдитöма, мöдторйөн тай вына). Кодзувкот кодь зіль, öтарö мыйкö ноксьö, вöчö, дугдывтöг колскöдчö, кытчöкö быттö тэрмасьö, тэрмасьö... Чери кыйны, вöравны, вотчыны — век йöзыс водзын. Шондікöд водö, шондікöд чеччö, сійөн ставсö и удитö...

Быдсяма йöзыс сиктад эм. Кодкö завидьтö Опоньлы... Мый вöчан... Завидьыд тай мортсьыд водзджык чужлöма. Завидьыд — лов пытшкöслөн пемыдлун вöсна. Кыпыд да югыд лола мортыд — сійö оз завидьты, сійö бокöвöй мортлөн олöм вöсна сьölöмнас радлö, бурсö сиö. А вот пемыд ловшыаыд... Орччаяссö векджык зильö няйтöсьтны, лёкөн, урöсджыкөн петкöдлыны, мед ачыс (кöть збыльысьсö и сьöд сьölöма) кöть ним вылас, но мыйöнкö на пövстын «югъялыштис». Но сиська да карасина биясьыд — торъялöны. Бөръяыс соляркаөн öвтö... Карасиныс быри... Йöзтö он ылöд, синмаöсь да пеляöсь. Но овлö и мöдарö...

Водзын сиктсаяс Кын Опоньöс ёна пыдди пуктылісны. Бурьыс и нимтылісны — Зіль Опоньөн. Сöмын ветымын вит арöсöдзыс, пенсия вылас петтöдз. Тайö олöм тшупöдас Опонь быттö кутшöмкö мырйö крукасис, тімбыльтчис, увланыюрасис... Кодкö быттö вежис мортсö. Видзöдан да, эськö и воддза кодыс жö: кык киа да кык кока, паськыд, куш плешка, оз чирк моз чеччалысь, а вот... Кын Опоньөн лои. Корсюрö сьмекайтчыны йöз водзас кутіс. Матö воисны. Арнас матігöгöрысь йöзыслы вотчыны оз сет. Торйөн нин пув да турипув. Кутшöм местаö он пыр вотчыштны, — Опонь сэн нин. Пурк-парквöчöма, прамöя абу вотчöма, но гöгөр парсалöма. Броткыны, а сэссия и лöгавны мöдісны ас сиктса. Торйөн нин — горшдджык да зільджык йöз, кодыас пув-чöдсö коммерсантъяслы сдайтöны. Люкасьліс Опонькöд и Гриш Миш. Коркö локтіс Ёкыша Ягö пув вотны, а Опонь сэн нин луасьö. Помöдз скöрмöдіс Мишöс.

— Тэ пытш кодь и эм, а чери лы моз ставныслы горшас тасасин! — горзис Опонь ылö. — Быдлаын тэ! Быд розьын! Кын пувсö бара вотан, урсаян тан! Тэ — Кын Опонь, абу Зіль

Опонь! Тэд меуна колө? Он пов, мый ки-кокто чегъяласны да вöрас гуаласны?

— Ог,— лабутнöя шуис Опонь.— Менам повсьöма нин. Некөн абу гижöма, мый Ёкыша Ягыс — тэнад вотчан места. И тэнö тась некод оз вöтлы... Этшаджык узь, водзджык чеччы...

— Да тэ он вотчы, сöмын пувсö парсалан, муас уськөдлан!— водзö горзис Гриш Миш.— Меж кольк кодь наберушка киад новлөдлан, а ас гөгöрыд гектар парсалöмьд! Тэ нарошнö йöзыслы пакöсьтитчан али мый? Төдöмөн? Ме тэ бöрся важөн видзöда, тэнсьыд сьöд пытшкöстö аддза, менö он ылöд! Дыр видзöдны ог кут, сöптöй потас да, сьылдзиртö коркö бергöда!

— Видлы...— ёсь синмөн келснитис сэк Мишöс Опонь.— Видлы...

Сьöлыштис Миш да Поповка месталань (сэни пувйыс век эм) төдса ордымöд вөр пырыс веськыдалис. Та бöрын Опоньлы вьль нимыс и öшйис. Гриш Мишсянь. Кувтöдзыс нин, надейнö...

И со, шуöны, Кын Опонь висьмöма. Кутшöмкö сьöкыд висьмöмөн. Кодкö жалитö, кодлыкö веськодь, а кодкö и дзебсясьтөг шуö, сідз пö и колö, эн горшась, эн пакöститчы...

Тöлысь чöж куйлөдісны Опоньöс карса больничаян. Коркö сэсся лэдзисны жö. Стöчджыка кö — тодышкалісны. Мый пö вермим — вöчим. Мукöдыслы куйлыны сет, став вылö койкаыс оз тырмы. А тэныд öнi гортад лöсьыдджык! Рак...

И та йылысь кывсис сиктын. Гусьöник бöрдис рöдвуж, синва чышкалісны бабаяс, зумыштчисны мужичöйяс, медпервой — Опоньлөн тшöтшгьяс. Кымын пуд сов öтлаын сөйöма! Век жö ас морт, сиктса, абу бокöвöй... Вочасөн прöщайтчыны мөдісны. Öти пыралас висьöмысь нюкыртчöм, бадь кор моз косьмөм Опонь дорö, мөд...

Локтис коркö и Гриш Миш. Кыдз он лок? Тшöтшгья. Да и рөдня көр. Водзын ёнакодь на ёртасьлісны, öтлаын сплавын уджавлісны, вөр пöрөдлісны... Бурсö и лёксö юклісны. Кольöма тай кадыс... Пукалö Миш Опонь крöвать дорын, варовитö:

— Тэ, этия... тэ висьöмыдлы эн сетчы, ерöмакань!.. Эн копытчы, юртö улö эн лэдз! Мед висьöмыс ачыс гөрбсö копыттас! А сэсся сылы сьылас — жботь! Паличөн! Нöшкөн! Öтчыд, мөдысь! Кытчöдз оз жуяв, оз пагав. И некутшöм врачлы эн верит! Еджыд халат пасьталöмаöсь да медся вежöраөн асьсö лыддьöны. Ещö ставныс öчкиаöсь! Сöмын мортöс повзьöдлыны кужöны... Больницаад дзоньвидзаөн пыран да водзөн кокөн петкөдасны. Молодеч, мый сэтысь ачыд пышйин!

(Миш, дерт, төдіс, мый Опоньöс больничасыс «корисны» мунны). Видзöдлы ас вылад! Сувтлы, рөмпöштаныс орччөн! Да тэ сөн поз кодь, висьöмыслы прöстö öшйынысö некытчö, лишнöй сьöкта ни кыз рушку тэнад абу. Кутшöм висьöм? Мый тэ?! Чеччыны колö, чеччыны... Мед сьöкыд кö, мед доймö кö... А то куйлігад збыльысь слабман, вирыд сукмас. А тайö — лёк. Гожöм пом ывлаас, вотчан кад матыстчö, Ёкыша Ягад бара на ризнитлан!

— Ризнитсьöма... Вотчыссьöма...— слаб гөлөсөн шуö Опонь.

— Тэ, этійö...— водзö сёрнитö Гриш Миш.— Ме вылö лөг

эн кут, мый сэк Ёкыша Ягас гөлөсөс кыпөдлі. Сідз артмис. Кыдзкө төддытөг...

— Вунөд... Кын Опонь кө и Кын Опонь...— шөпкөдө Опонь.

Гриш Мишлөн мыш сайын кодкө вуджөртис. Өдзөс сайыс тыдовтчис Клавдия, Опоньлөн гөтырыс. Кывлөма, буракө, кык мужик костса сёрнитө...

— Кын Опонь! Кын Опонь!— синва сорөн горзис Миш вылө Клавдия.— Тайө тэ нимсө өшөдін, пывсянын корось кор моз мортислы ляскин! Ылөсас! Юрыд уджалө оз? Опонь төдөмөн матигөгөрсә вотчан местаяссө парскөдліс... Мед ті, мутивөйяс, асланыд быдсяма «комбайнъясөн» бөръя пув коръяссө да заяссө эн урөсмөдөй. Саранча чукөр! Комбайн бөрад мөд онас нин став кустыс нюкыртчө, рыжөймө, чусмө, а вит мысти пувсө йөзыслы некытыс вотны лоө! Өти сө шайт вөсна вөр-васө дасьөс пузувтны, вины! Аскиа лун йылыс тай он думайтөй! Мыйся йөз?! Морт көрыс тіян вошөма. Пөль-пөчъяс водзад абу яндзим? Мый найө кольісны, да мый ми вөр-ваыскөд ас киөн вөчим и водзө вөчам? Төдөмөн ставсө, садь вежөрөн, водзвыв думайтөмөн! Мый челядьлы колям, пөчөн-пөльөн шуысыяслы? Некор эн думыштлы та йылыс, Миш? Миян Опонь өти пув чут Ёкыша Ягыс да матигөгөрыс гортө өнөдз эз вайлы, век бокрыс, сьод вөрыс наберушка-мөд вотыштө, ас кинас, а оз комбайнөн... Став кустыс ловйөн кольө! А тэ — Кын Опонь! Абу яндзим? Ачыд коді? Кокни тай мөдлы нимтө өшөдны, мыжтөгыд морттө мыждыны. А буртор вөчны — тасасям, пыксям...

Гриш Миш шемөса видзөдіс Клавдия вылө. Мужик быттө нюкыртчис, тушанас ичөтджыкөн лои...

— Тэ вылө ог лөгав, Миш,— лөньджыка нин шуис Клавдия.— Опоньлы аслыс коліс правдасө висьтавыны, но топыд вома сійө... Абу мукөд моз быргандаръя. Таыс сійөс олөмыс эськө унаыс и зутшкөдліс да. Но эз и вежсьы. И мед эз вежсьы! Вит пиөс да нылөс вот чужтім, быдтім-лелькуйтім, а посни йылөмыс миян өні өти садикө оз төрны! Сы мында! И ставыс — ас вир! Ставыс — Опоньсянь! Кутшөм сійө Кын Опонь!? Векни пельпомыс, да паськыд тай мышкыс, век стен сайын моз сы сайын вөлі, татшөм мужиксө корсьны на колө. Ой! А мый ме төрытъя каднас сёрнита? Свят-свят...

— Тырмас, Клавдия... Ыззин...— лөня өлөдіс гөтырсө Опонь.

— Тэ, этія... Опонь... Тэ прөстит менө...— мыжа гөлөсөн шыөдчис Гриш Миш.— Мөмөтөн өні ачымөс кыла. Тупичаөн. Колө вөлі шуны, збыльсө висьтавыны... Мыйла дзебны... Ёкыша Ягад... Олан-олан да, морттө тай помөдз он и төдмав... Кутшөм нин боковөй... Весиг матысса морттө... Мыйкө олөмас... Абу бур. Абу ставыс лючки-ладнө. Олам торйөн, быдөн ачыс... Ас ку пиас. Сьөлөмөс ог восьтөй... Завидьтам, өта-мөд вылө зыртчам, орччаөс өбөдита... Торксим, буракө. Абу нин важ йөзыс кодьөс. Вот сэк өтулөн овлөмаөс. Быть. Өтинад парма-матушкаыд нылыштас, оз и виньды, а өтув водзад и юрсө на копыртас... А өні... Тэ прөстит менө, Опонь...

— Дугды...— кинас өвтыштис Опонь.— Аддзөмыд сёрни... Кутшөм өбидә! Абу ва челядь ме, гөгөрвоа... Тэ менө нинөмөн

торъясö эн дзерöд... А мый öшйöдöм нимыд? Сöмын кышыс... Кын ли, зиль ли... Тан главнöй — мортыс... Сюрöсыс. Мортöн колö лоны, мортöн...

Вазьöм синъясөн петис Опонь дорыс Миш. Керка кильчö вылас сьöкыда пуксис, чигарка вомас суйис. «Да... Олём-олём... Ружтан, ружтан... И мый вöсна ружтан? Медем öта-мöдöс дой-давны?..»— мөвпалис Миш. Сьölём вылас сылы збыльыс деливö вöли.

Казялис, кильчö дорö Кöсьта Миколай матыстчö, Гриш Миш-лөн суседыс. Опоньöс видлыны жö, буракö, локтö...

— Но, кыдзи Кын Опоньыс асьсö кылö, сайдас на?— быттö нюмъялигмоз шыöдчис Миколайыс.

— Кутшöм сийö тэд Кын Опонь?!— варыш моз уськöдчис сусед вылас Миш.— Кутшöм тэд сийö Кын Опонь? А тэ код!? Сийö ми тэкöд — кынъяс! Кылан! Ме шуа, кылан??! А Опонь... Сийö — морт! Тэыс да меыс — морт! Мортджык! А ме — Кын! И тэ — Кын!!!

Гриш Миш зьвирк чеччыштіс кильчöвывса скамья вылыс да төв нырөн уськöдчис Опонь йöрыс.

Кольча синмөн видзöдіс сы вылö Миколай. «Вошласьö али мый?— чуймаліс.— Кутшöм пытш сылы öти местаö пырöма, да ещö садь юрөн?»

...Коркö сиктын разалис юөр: Кын Опонь кувсьыштöма, лолыс сувтöма жö. Кодсюрö шогалисны, кодсюрöлы веськодь... Öта-мöддыс юасисны: кор гуаласны да шойна лунбокö али войбокö? Ветлыны — колö... Ветлыны — быть... Бөръя туй...

А сэсса чужис да ылькнитіс мöд шензьöдана юөр: Кын Опонь пö дзоньвидза, йöрас нин тагьялö, шонді улын бокъяссö шонтö. Чудеса да и сöмын...

...Опонь кык вежон мысти збыльыс кок вылас сувтіс. Став чöртыслы, став мутивöйыслы, став вөрöгыслы тшöкмунöм вылö. Мед чуймалöны врачяс, мед водзö завидьтöны найö, кодъяслы татöг оз узьсы, мед радлöны рöдвуж да бур йöз, мед, мед, мед... И мед кö кольö сийö кызвын йöзыслы Кын Опоньөн. Кодкö вомгорулас пыр на броткö: «Кын Опоньöс тайö му вылас нинöм оз босът! Весиг лёк висьöмыд. Сир гаг...»

А кодкö сьölөмсянь радліс: «ен ськöдөн...» На лыдын вöли и Гриш Миш. Öні помöдз нин — на лыдын.

Мам вын

Вит лун юём-кодалём бöрын тошсялём, гудыр синма кызь квайт арöса мужик нисьö зон Терень Митрей (тадз Куръя грез-дын рöд кузяыс шуисны) кыз синваён бөрдіс. Пукаліс Ырым туйбокса вөр ді бокын да синва пырыс видзöдіс аслас коркö радейтана грезд вылö. Веськодьпырыс видзöдіс матысса эрд вылын йирсьыс «шленъяслөн»* сюра да сюртöм мөсьяс вылö. Митрей видзöдіс, видзöдіс... Колökö — бөръяыс. Видзöдөмпы-рыс — бөръяыс. Мортыслы дышöдіс олөмыс. Митрей воштіс асьсö, сийö талун некоды оз ков, сийöс талун некод оз виччыс. Сі-

* Сиктса йöзлөн, абу совхоз-колхозлөн.

йö кыліс асьсö сё арöса синтöм да пельтöм пöльöн, важысла рутш-кысьöм мырйöн, пракмунöм овтöм керкаöн. Кыліс кө мыйкö-а... А коркö быттö ставыс сълöн вöлі! Прамöй морт моз помавліс школа, сэсса шоперö велöдчис, армияö муніс. Контрактöн кольччис, куим во Чечняса да Дагестанса гöраясын «чехтяс» бöрся вöтлысис, тэрыб джейран моз котраліс, ёрттяс пöвстын да весиг командиртяс водзын пыдди пуктанаöн вöлі. Сьöкыдысь некор эз пов, плешсö пуляысь тортъя эз жö дзед, но и эз чургöдлы, кор оз ков. «Мый выліас шуöма...» Но овны ёна көсйис! Томтяс-лы — овны... Мича ныв сійöс армиясьыс виччысис, пединститутын географ выlö велöдчысь Маша. Машенька... Медся радейтанатор. Му вылас öти. Сълöн. Митрейлöн.

Но мортыд мöвпалö, а Енмыд... Ставыс артмис кызкö люкибуки, тöлктöг. Быттö увлань юрöн... Ловйöн эськö локтіс гöраясьыс том молодец Митреюшко, да öдйö тай мыйлакö юсис. Вина гагйыс кыйис. Ачыс эз тöдлы, кызз увлань гöгыльтчис. Первой ёрттяскöд стöкан-мöд, а сэсса... Стöканас тай и пырис, сэн овмöдчис, öтнасөн поздысис. Регыдөн татшöм оласногнад ставсö воштіс, и ачыс вошис. Уджавны эз көсйы, весиг вахта выlö мукöдтяс моз эз медасьлыв. Мам да бать сьылі вылас и öшöдчис. Грездсаянь пыдди пуктöмыд, дерт, асья ру моз öдйö и сьлі (кодлы колö нййт гуранö усьöм, лэдзчысьöм мортыд?). Эновтчис да пышйис Митрей дорысь карлань матöджык му вылас медся мича нылыс, Маша. Эк, Маша... Көсйис эськö сійö велöдны Митрейöс, унаысь синва сорөн кевмысьліс, мед мортыс вежсяс, юöмысь дугöдчас... Но эштöма тай! Эз нинöм артмы. Эз кывзы некодöс Митрей, юас да — йöй нисьö прöсуж лоас. Кулакътяссö зэвтас, котралö руа вежöрас пырöм «духтяс» да «чехтяс» бöрся. Палялас — юрсö öшöдас, юртъяндзим став водзас. Куим лун гортсьыс оз петавлы. А сэсса стöкан водка горшас кыштас, и бара мöд морт. Гөгөрвотöм, скөр, абу ас, абу матысса... Мöд.

...Кызкö öдйö пöрысьмис, вежсис Митрейлöн мамыс, Педот Людмила. Öтарö бöрдіс, бöрдіс... Кевмысис. Юрбитіс. Вичкой ветліс. Медічот пиыд — медся жаль (кык вок да кык чой быдмисны семьяын, ставныс нин асланыс позйöн олöны). Зумышмис тшöтш и батыс, Иван Толей, гоз-мöдысь чорыдакодь сёрнитліс Митрейкöд, гортсьыс вöтлыны грöзитчис. Янöдісны ыджыджык вок да чойяс. Весиг вöвлöм ёрттясыс вочасөн öтдортчисны вошöм мортысь. А тöрыт на нимöдлісны, геройöн шуисны! Нинöм эз прöймит... Öти морт сöмын Куртъя грездын жалитіс Митрейöс — сьöд юрсиа Нина, лавкаын вузасьысь. Митрейкöд тшöтштъя, коркö орчча сиктын, öти школаын на велöдчисны. Некутшöм баръялöм на костын томдырйи эз вöв, Митрей сöмын Маша выlö видзöдіс. А вот Ниналысь сьölöм увсö зонмыс, буракö, важөнкодь вöрзöдлöма... Армияс ветлігкості Нина чурка нин удитöма вайны, кутшöмкö карса донжуансянь. Мый сэсса... Олöм эм олöм. Нинöм да некодöс дивитны.

Корсюрö Нина Митрейлы вина-водкатö уджйöзөн сетліс, жалитігмоз... Но бурыс тан абу жö. Кытысь усьöм мортыдлы сьöмыс? Вештысьлісны бöрыннас мамыс да чой-вокыс. А батыс кулаксö сöмын петкöдліс: во тэныд, а абу вештысьöм! Нажöвит ачыд! А Митрей öтарö усис, усис... Водзö сэсса некытчö.

Эз и тōдлы, кызд кувсис мамыс. Шома юра Митрейōс шошу-кōдыс вайōдлсны сōмын гуасигас нин. Бōрьяыс прōщайтчыны. Бōрдс Митрей, чорыда сэк бōрдс. Сьōлōмсяныыс (сидзсō нор мортыс, войнаыс эз чорзьōд). Прōща мамыслыс корис. Тōдс: сы понда медся дона мортыс кадыс водз мōдарьюгыдас исковтс. Таōдз ёнасō эз и вислы. А со тай — сьōлōм... Кōсийсис винаыс сэк Митрей дугōдчыны, мортъяммыны. Бать водзас на кыв сетс. Куим лун косōн олс. А сесся... стōкан пидōс аддзис да бара сэтчō пырис, овмōдчис.

...Пукалō ōнi Митрей Ырым туйбокса вōр дi бокын, бара бōрдō... Думсыс прōщайтчō Курья грездкōд, рōдвужкōд да тōдсаяскōд. Тōдō: грездас оз нин лок. Тырмас аслыс да бур йōзыслы шогсō вōчны. Тырмас нидзув моз тайō му вылас веглясьны. Нидзулыдлōн местаыс — му улын, му пытшкын, кōдзыдiнын да пемыдiнын. Олōм чашкаыс Митрейлōн тырис, солькъясьō нин... Медся ыджыд мыж — мамыс водзын. Вушйытōм. «Чужтылiн, удлiн, быдтылiн, лелькуйтлiн, бōрья няньтортō сетлiн... Прōститан он, мамук? Примитан он менō вылас, эм кō быттō мыйкō сēнi? Он кō — муна улiас. И кызд артмис мекōд татшōмторйыс? Кутшōм мути менō кōрталс, гōрддзалс, кусыньтс, няйтас шыбитс? Прōститōй ставныд, некодлы лēксō эг силы. Быд боксянь ачым мыжа. Слабиник морт ме... Гōраясын сōкōл-варышōн лэбалi, а гортын со уси... Ōнiя гōгōрвотōм олōмас, буракō, эг лōсяв. Мыйла либō и чужсьōма...»

Думайтō Митрей, мōвпалō. Казытылō. Ичōтдырсō, иння-того да биа-бордъя кадсō. Мамсō да батьсō, воксō да чойяссō. Маша-ōс... Вōльнōй сьветсō... Со и янсōдчан кад воис... Со и воис...

Дыркодь нин видзōдс Митрей орчōн быдмысь гут кулан тшакъяс вылō. Синмыс сэтчō и кыскō. Август помад тай, майбыр, быдсяма тшакыс гōгōр размунōма. И гут кулан тшак нырсō мыччōма мусьыс. Быдса куим тшак. Налы овны жō колō. Быдōнлы тайō му вылас овны колō. Митрейыс ѓтдор... Торскун кодъōсь со, гōрд юраōсь, еджыд чутаōсь... Колōкō, чужтысисны буретш танi, медым Митрейōс паныдавны, мортыслы сьōкыд кадас отсыштны? Вот и аттō, гут кулан тшакъясōй, менō гōгōрвоысьясōй... Прōститōй... Ставныд прōститōй...

Митрей донаторйōс моз босьтс киас ѓти пелькиник тшак. Быттō вежавидзōмōн, быттō полiгтырйи... Мича тшак... Вом улад крутшкō... Прōститōй... Прōщайтōй... Мам...

Мам... Сы водзын — мамыс. Тōвруōн летысь еджыд юрсиа, гōгрōсиник чужōма, томиник на, кутшōмкō му вывсьыс аддзывтōм дзоридзьясōн серпасалōм мича сарапана... Гожōм... Нюмъялō шондi. Нюмъялō мам... Мелiа сёрнитō:

— Тэнад талун чужан луныд, Митреюшко... Чолōмала! Талун тэ чужин, выльысь му вылас чужин... Кылан? Тэ шудаōн лоан! Быть лоан! Вай кōть сывйыштла да окыштла тэнō, Митреюшко!

Митрей кōсийō шуны, мый сылōн чужан луныс — тōв шōрнас, но оз вермы... Сийō чōла видзōдō мам вылас. Сылōн сьōлōмыс ойдо кутшōмкō радлунōн, кутшōмкō шудōн... Митрей аддзō, кызд матыстчō сы дорō мамыс, кызд сывйыштō да окыштō бан бокас... Окыштō...

...Сырмуніс Митрей. Синсö восьтіс. Мыйкö сылы öні мешай-тіс, мыйкö не сідз... Син водзас — нор синъяс. Сарөгöсь кыв... Чужöмсö кодкö нюлö... Митрей ымöстіс, сьöкыда пуксис. Кась-титчö али мый? Орччөн сулаліс да сы вылö видзöдіс... мös. Тöд-маліс Митрей: Лида чойыслөн Сударушкаыс, раминик да лагун кодь вöраа, сьöда-еджыда рöма пельясыс... Дувгöдчöм да быттö чуймöм синмөн öні видзöдіс сійö Митрей вылö, ышлолаліс, быттö көсйис шуны: чеччы, мый куш му вылас базгысьöмьд? Нинöм вöчнытö? А сэсся Сударушка юрсö бергöдіс да... крум-крам нятшкис Митрей дорысь кольöм кык гут кулан тшаксö. Бөр бергöдчис мортлань, бара дувгöдчис, видзöдіс...

Кинас юрсö шамыртіс Митрей. Бара бöрдіс, бöрдіс, мöскысь тай эз яндысь. Мыйла... Мыйла? Мый тэ кыссин татчö, Сударушка?! Код тэнö корис?! Мыйла эн лэдз?! Вош татысь!!!

Ырыштчис Сударушка вылö. Гөгөрвоысь пемös здук мында кын чурка моз сулалыштіс, сэсся чепösйис бокö, йирсьысь стадалань. Обидитчис, буди...

Митрей чеччис. Катласьöмөн довгис ачыс эз тöд кытчö, ылö-сас. Мыйкö синнас мусьыс корсис. «Он на... Он на босьтöй... Шуи кө — вöча. Ме Митрей, мед кө абу китрöй... Помöдз вöча...» — войлалісны думъяс.

Митрей бара корсис тшак. Гут кулан тшакысь кө эз пагав — мöдтор коряс. Бледнöй пöганка — еджыд понтшак. Сійö тан быдмö, виж уртшак кодь... Со, буди... Кокыс быттö зонтика ли, бантика ли... Тайö мен и колö...

Кватитіс тшаксö, тэрмасьöмөн вомас сүйис (быттö кодкö сылысь мырддяс!), някляліс, някляліс... Тусяпу куст дорö водіс. Синсö кунис. Виччысис, кор син водзас пемдас, лолыс горшас тасасяс. Öні — пом... Öні — дзик нин пом... Мамук...

И бара сы водзын сулаліс мамыс. Сійö жö сарапана, кыз водзыннас. Бара нюмъяліс, бара меліа сёрнитіс: «Талун тэнад чужан луныд, пиук. Эн вунöд некор та йылысь. Ме дінö волігөн кутан висьтасьны, кыз да мый олан, мый выльыс... Чужан луннөн, пиук!»

...Лолаліс, лолаліс Митрей. И лолыс эз тасась. Еджыд понтшак места уртшак веськаліс. Гөрбыльтчöмөн пуксис тусяпу куст дорас, бара кинас юрсö кватитіс. Бара бöрдіс... И синва пырыс видзöдіс аслас радейтана Куръя грезд вылö. Синмысь быгалöмыс регыд быри, видзöдласыс быттö ёсьмис... Ылісянь адзö Митрей: кодкö котөртö сы дорö, кодкö кинас öвтчö, шенасьö, мыйкö горзö. Том нывбаба. Ань. Мамыс? Абу мам. Ань. Ныв. Нина...

Коли кык во...

...Митрей пидзös вылас сулаліс мамыслөн гу вылас, крест водзас. Лöня сёрнитіс: «Со и бара адззысим, мамук. Талун менам чужан лун, кыз тай шулін... Ме августын сійös öні нимöда, пасъя, төвсясö вунöді. Ставыс миян бур, мамук. Неважөн тэнад нук чужис, ичөтик Василей, со тай мам ки вылас, Нинуклөн морös дорас, унмовсьöма... Мед узьö... Мед... Но тэ видзöд сы вылö, мамук, видзöд! Миян рöдö чужöмнас Василейös ляскöма, тэнад рöдö. Олам бура. Бать да ми. И чой-вок пыр воывлöны, ковмас кө, отсалöны... Уджыд грездад абу, ме вахтаөн уджала, нажөтка миян вылö тырмö. Нель морта семьятö вердны колö.

Ме талун мусö дась гöтыр да челядь вöсна бергöдны. Веритчис меным Нина... Ме талун и тэ вöсна ола. Аслад выннад спаситін, кыскин... Тöда. А ме вот тэнö уськöді... Прöстит... Но ме тэкöд ог прöщайтчы. Ме быд здук тэкöд, век öтлаын. Став сьöкыдсö тшöтш венам. Вот бать бөръя кадö мыйкö нёрпалö, лун и вой курксö, лолыс оз шед... Кымынысь шулі: шпуткынытö шыбит! Оз тай кывзысь... А ме, мам, ог куритчы ни ог ю... Дум вылö оз усылы. Синмöй воссис. Мыйта пежсö ме ас пытшкö суйлі!.. Öнi ловгөнöй сувтлö, казтышта да... Но нинöм, ставыс бөрö кольöма. Аддзысьлытöдз, мамук, ме öд ог сöмын чужан лун дырйи тэ дорö волев, а быд вежон... Кытчöдз тайö му вылас лолала, волены кута. А сэсса нукъясыд татчö туйсö ордымаласны. Василей, буракö, нярöдчыны мöдіс, мамыслысь морöссö корö... Ветлам ми, мамук... Аддзысьлытöдз!»

Ёртъяс

Зэрыс йöймис. Шлявгис. Куделитіс. Енэжыс розясис, кутшöмкö поньöд выліас бара воссис. Синтöм кутюпиян моз размунісны асланыс позъясö, юр сюянінъясö ывла вылö веськалöм йöзыс. Куткыртчисны шарикъяс да бобикъяс асланыс пон чомъясын. Страк... Повзьöдчысь енэжас грымакыліс, кодкö ёна, буракö, скöрмöдöма Илля Великойс. Сыркъяліс ставнас муыс, ымзіс...

Но Ёгор ног тайö — абу зэр. Тайö — Ёгорлөн синва. И сыркъяліс сылөн сьölöмыс, лов пытшкыс. Көть синъясыс — косось. Сійö эз кыв ывлавывса чардалöмсö да зэрсö. Сійö нинöм эз кыв. Сійö видзöдіс Мишлөн бледöдöм, ёсьмыштöм ныръяса чужöмö. Сійö видзöдіс... Сійö көсийс горöдны Мишлы: «Чеччы! Мый базгысин, мый повзьöдчан!?» Но Миш оз чеччы. Сылы ставыс нин веськодь. Сійö куйлö мича дöраөн эжöм гортйын кутшöмкö стрöг чужöма, кутшöмкö тöдтöм...

«Ветымын витöдз эн ов... Кык төлысь пенсияöдз коли... Мый тэ вöчан, ёртан, братан?..» — шöпкис Ёгор. Сулаліс Мишлөн горт дінас, видзöдіс, видзöдіс...

Сійö лыддис асьсö Мишлөн кувсьöмын мыжаөн. Мыжа... Мыжа... Прöстит, Миш...

Прокö Миш — Ёгорлөн нэмöвöйся ёртыс. Позьö шуны, чужöмсяныс найöс олöмыс йитіс. Öти сиктын чужисны, öти воö, öти төлысьö. Сизим арöсөн öти парта сайö пуксисны. Öтлаын дурлісны, öтлаын пакöсьтитчылісны... Пыр öтлаын. Чери кыйны ли, пищальөн шöйтны ли... Армияö öти кадö ветлісны (служитісны торйөн). Öти училище помалісны, трактористлысь да шоперлысь право босьтісны. Бöрас Миш кызвын олöмсö трактористаліс, а Ёгор — шопераліс. Öтиыс видз-му овмöсö пырис, мöдыс — АТС-са монтеръясöс новлöдіс. Öти воö гöтрасисны, пöдругас вылö. Куим челядьөн быдтісны...

И со — Миш гортйын куйлö. Бара Ёгорлы окота горöдны: «Чеччы, трасича, эн повзьöдчы!» Окота... Окота... Но оз горöд. Нинöм нин он вöч. Прöстит, ёртан... Мыжа, мыжа...

Тöлысь сайын, юнь шöрын, сирасис Ёгор дорö Миш: катöдлы

Лымва йылö ком вугралыштны! Ачыд жöдзан, а кык во нин эн босьтлы!

Лымва йылö сьöкыд воöдчыны. Кык чомкост колö зумыш вöртi, лёкинъястi, пöрöминъястi бауасыны, верст дас кык лоö... Абу сiдз-тадз. Абу мир туй. Этшаöн сэтчö нырсö суюлöны, весиг горш йöз (туйсö лыда морт тöдö), та вöсна гырысь комыс гожöмнас сэн мичаа шедö, сöмын лэптав, вугыр шатътö зэвт.... Вот кöнi мужиклы лов кыпöдöмыд!

Ёгорлөн Лымва вылын — чери кыян керка. Пелькиник, кык морт вылö. Гоз-мöдысь аскöдыс нулiс Мишöс. Сирасяс — он мынтöдчы. Но кык во сайын ёртыслы шуис: бөръяысь! Ачым кыя да черисö гортад вая, но вöрас ог босьт!

Казялiс сэк Ёгор: коктöммöма Миш. Верст джын мунас — пуксьö. Ыпкö. «Сюрса лыö грыжа овмöдчöма, морөн лыйöм, кокö инмö, мукöддырйи кокöс ог кыв, кöть быттö оз и доймы. Эг тай кут со мынны лешак-машинаысь, мешайтчö... Сiдзсö быттö тапъялышта, но... А вот тай, öнi тэ водзын юръяндзим, манита... Коль менö, вöляникысь тапъя, коркö Лымваад воöдча жö...» — шуис сэк Миш. Ёгор, дерт, эз коль ёртсö. Ньöжйöникөн, сувталöмъясөн, воöдчисны Ёгорлөн юр сюянiнöдз. Буракодь вуг-расисны да бөр лючки-бура лэччисны сэк ёртъяс. Бара надзöникөн, тэрмасьтöг. Кык туджöм* кан ком тай кыйисны, олас... Мый горшасынысö, тайöс на лэччöдны колö! Но Ёгор сэк Мишлы чорыда шуис: ог босьт сэсся, эн кевмысь, весиг эн надейтчы, кытчöдз он бурдöдчы! Бур лекарство нбылав, мазьөн мавтчы, карö лэччыв, операция вöч, он öд сьöд вөр шöрын ов! Сöмын нюмъялiс сэк воча Миш, но быттö кутшöмкö яндысьысь, мыжа нюмөн. Эн пö броткы, бурда... Тэнö на пö кута вöрас панийыны, мед кö йöра кодь...

Ёгор кывсö кутiс. Кык во эз босьтлы Лымва вылö Мишöс. Тöдiс, мый некутшöм операция Миш эз вöч, водзö, буракö, мучитчö, кöть дойсö некодлы оз петкöдлы. Терпитö. Пыр на уджалö, но трактор вывсьыс чеччис жö, велосипед вылö сöliс, СПК-ын стöрöжалö. Пенсия виччысьö, этша нин коли.

Но тайö юньнас Миш бара пысасис Ёгор дорö: кайлам вуг-расыны Лымваö, и пом! Гаж бырис! Колöкö пö, медбөръяысь видзöдла... Кокöй пö ёнмис öнi, Лымваöдзыд дзик нин кыскас. Бара эськö пыксыны мöдлiс Ёгор, но... Он на син Миштö, сиргагөн кö тшапкыяс!

Бара тай мöдöдчисны ёртъяс. И збыльысь, тэрыбакодь заводитiс мунны Миш! Ен сыкöд... Радлö Ёгор (збыльысь, буди, ко-кыс бурдöма?). Но верст джын мысти нин Миш сьöкыда бруткысис пöрöм пу вылö. Кашкö, ыпкö, чужöмыс бледöдöма, лолыс оз тырмы...

— Бара кокыд? — дöзмöмпырысь юалiс Ёгор. — А шулiн, мый зьвер кодь! Бөр лэччам! Весиг эн сёрнит! Нинöм ог кыв!

— Некытчö ог лэччöй, — пыр на кашкö Миш. — Вöляникысь воöдчам. Кокöй эськö öнi збыль кыскö, но вот... сьöлöмöй мыйкö дурö. Во джын кымын... Сынöдыс мен оз тырмы, чери моз апа-

* Туджöм (диал.) — дзик тыр, топыда тэчöм.

ла... Тэ некодлы эн висьтав, кылан! Медводз — гётырлы! А то вёрас туйсё тупкас, Вераёс тэ тёдан...

— Тэнад юрыд уджалё оз?— пузис Ёгор.— Сьёлёмнад оз шмонитны! Кымынысь колё шуны: бурдөдчы! Миян сиктын больничаыс эм!

— А мый больничаыд?— курыд нюмён шпыннялө Миш.— Мый өти терапевтыд? Ветлі тай... Сёмын стращайтіс. Кулан пё... Додь тыр рецепт гижис. Сійёс оз позь, тайёс оз позь... Эн ю, эн шпуткы, солён эн сёй, вый эн видлы... Колантор! Мый либё сэк овнысё? Больничасыс петі да и вунөді ме аслам сьёлём йылысь. Тіпкё тай-а... Но өні вот бара ассыс русё петкөдлө... Яй шмак эськө и эм да... Бара тэ водзын юрьяндзим...

— Мый ме водзын?! Мый ме водзын!— самөварөн пузис Ёгор.— Мый меыс? Тэ гётыр йывсьыд думыштлы, челядь йывсьыд! Пёльон шуысьыд кыкөн нин со му вылас котралө! Олыштны на колё, көть на ради! Асьтө видзыштны колө! А тэ — ылөсас... Ме водзын яндзим...

— Менам слаб сьёлём йылысь некод оз төд,— чорыда крапкис Миш.— И тэ он висьтав мукөдлы, ёртөн кө шусян! Ола, мыйта ола. Нинём матыссасө дойдавын, и нинём мекөд лёкыс оз ло. Этшаён али мый сьёлёмнас дурёны? Олёны тай, жыкруйтёны... Мед, йёра моз кө котравны ог сяммы, но вёрышта на. Велосипедөн тэнө орддьөда. А өні дугдам кывйөн печласыны, водзё вёрзям, Лымваөдзыд абу на матын...

Воөдчисны коркё Лымваөдз. Вель унаысь сувтлөмөн. Бөрвылас дзикөдз нин шогөдліс Мишөс. Пөдны кутіс. Вом доръясыс весиг неуна лөзөдыштісны. Жальпырысь, и сэк жө повзёымпырысь, нэмөвөйся ёрт вылас видзөдіс Ёгор. Татшөмнас сійө Мишөс некор на эз аддзыв. Пөрнөй мужик... Неважөн на ош кодь вөлі, Ёгорөс дуригмоз вермасигъясөн муас личкывліс. И со тай... Дзик бөръяысь Лымваас вая, өбөдитчас көть оз... Мед, колөкө, бурдөдчө...

— Бөръяысь, буракө, локті,— быттё лыддис Ёгорлысь мөвгъяссө Миш, нурбыльтіс Лымва керка дорө матыстчигөн.— Мыйкө мекөд збыльысь не то... Кыла. Мыйкө не сідз... Морөспань улын доймө, мыш сайын доймө... Быттё пурт сюйлёны. А во сайын на сьёлём тіпкөмөс эг кывлы. Уджалис и уджаліс, эз мешайтчы... А өні мыйкө дурмис. Йөйталө. Миян рёдын кызвын мужикыс инсультысь да инфарктысь мөдаръяугыдас мунлісны, ставыс ыджыд давлениеа-сь... Рөдтө тай он веж, кыскө... Со и менө, буракө, сэтчань синө... Но видзөдлам на! Он на пегырт Миштө! Не сэтшөмтор аддзылім, не сэтшөмтор венлім! Сідз абу, ёртан?

— Сідз!— неуна долыдымштіс Ёгор.— Эн сетчы! Ёні мужик кывъяс тэсянь кыла! Ветымын витөн лобдоавны водз на! Ёнія кадө? Мортыслысь орөм юрсө места вылас врачьяс бөр пуктёны, вурёны! А тэ — инфаркт... Но ме тэнө ачым Лымваас пөдта, өні кө кывтө он сет, мый карса больничаө лэччылан! Кылан?

— Кыла... Лэччыла...— нюмъялө Миш.— Дыр-ө лэччывны карад... Ставыс бур лоө, ёртан, вот аддзылан... Унаысь на волам ми тэкөд Лымваад, менсьым ветымын вита юбилей на тан

пасъям! Колө отарө вөрны, кокөн ветлыны... Вөр-ватөгыд коми мужиклы лёк... Абу олөм... Мый сэк овны? А вермытөмлы колө лөня бокө вешйыштны, вошны... Ен мед видзас матыссаяслы деливө вөчны! А тэд аттё, Ёгор, бара на тай Лымваса сынөднас лолала... Шудыд эм, кор ёртыд эм... Кор дзоньвидзалуныд эм... Сёрөн чуйман, сёрөн гөгөрвоан... Чөскыд жө нин тан сынөдыс! Апава да апава, верман кө... Но меным и апаваны өні сьөкыд... Сё мокасыт... А тэ вёрсыд эн орөдчы, Ёгор! Ковмас кө, ме весът тшөтш ветлөдлы. Кытчөдз кокыд нуө. Дзоньвидза мортыд тай оз казаяв, кутшөм сійө шуд,— вөрті аслад кокъяснад тапъявны! Кытчө көсян. Кытчө гажыд. Кор көсян. Сёрөн та йылыс думыштчам, сёрөн... Жаль...

Бөръя кайлігөн Миш Лымва керка дорас и шатинасис, улө-вылө эз чеччав, думсыс вынъяссө видзис (вёрсыс петны на колө!). Ёгор сійөс чорыда стрөжитіс:

— Некытчө эн мун, тан койпав! А ме өти войков горув лэччыла, Митипер керкаөдз. Чайта, сэн кызвын пурт кодъ комыс өні сулалө. А тэныд и тан вугралыштныд чериыс тырмас. Кыдз шуласны, сыв да ов, а костас юмов тшай ю!

Лэччыліс Ёгор Лымва горув, буракодъ кыйсис. Мөд лунас Миш дорөдз веськыда вөр параллель кузя воөдчис. Öдйөкодъ делөыс и артмис. Нимкодъ лои, мый Миш — лючки-ловъя, весиг банийштөм чужөма.

«Абу сөмын шонді банийөдөма, вирыс, буракө, сөстөммыштөма...» — мыйлакө думайтсис Ёгорлы.

Узьөм бөрын, водз асывнас, гортас мөдөдчисны. Көть ньөжйө-никөн мунісны, но этшаысь сувтлісны. Помся мыйкө шмонитіс Миш, сывны корсюрө весиг пищитчис. Челядь моз дэльөдчис Ёгор водзын. Но вёрсатө он ылөд. И ассыд синтө он ылөд. Казяліс Ёгор, мый ёртыслөн синъясыс жугыльөсь, мый на пиысь пычкө кутшөмкө пыдіса дой... Казяліс, пыр жө и казяліс...

— Тэ кыв мен сетін, мый карад лэччылан! — кулаксө петкөдлө Ёгор. — Кылан?

— Кыла, кыла... Мый өтиторсө долян! — довкйөдлө юрнас Миш. — Шуи кө,— вөча, тэ менө төдан.

...Эз лэччыв некытчө Миш. Кывсө бара эз кут. Аслас стөрөжкаө муніс, быттё сытөг СПК-ысь кодкө бөръя киссьөм тракторсө гусялас. А Ёгор — аслас руль сайө пуксис (семьятө вердны колө). И вот өні Миш куйлө эжөм горт пытшкын. И мыжыс тані — Ёгорлөн. Ачыс тадз лыддьө. Коліс мырдөн карас лэччөдны, коліс висьөм йывсыс гөтырыслы висьтавын. Вера эськө жмитіс...

А өні Вера көин моз омляліс верөслөн юр дорас. Нора лыддьөддіс, бөрдөмсорөн висьтالیс йөзыслы, мый верөсыс нинөмөн эз висьлы, көрт кодъ вөлі, мый ставыс артмис виччысьтөг, юасьтөг-төдтөг... Татшөм томөн,— мөдаръягыдө... Көні правдаыс? Код вылө коліс гөтырсө да челядьсө?

«Ме төді... Ме өтнам төді... И эг висьтава... Дзеби. Колөкө, өні ловъя эськө вөлі Мишыд... Мыжа... — сьөкыд, юр жугалысь мөвпъяс войлалісны Ёгорлөн юр вемын. — Прөща мен абу, и ог кор... Ог виччысь, Миш. Мыйкө не сідз ме вөчи, кытөнкө ме ылали... Позис мөд ног... Сьөкыд... Узь, Миш. Öні тэнө нинөм

нин оз дойд... Выліас кő мыйкő эм, бур местаő веськőдчы, мортлы лėксő оломнад эн вőчлы... А мен тэтőг őні сьőkыд. Ёти бордйőй чеги. Гажтőм. Он тырмы. И Лымвасő őтнамлы колин...»

Мыйкő шőпкőдіс Ёгорлы синва чышкалігмозыс Вера, Мишлőн гőтырыс. Но Ёгор эз кыв аньőс, кын чурка моз, из моз сулаліс. Сйő йинєнь моз кынмис. Здук мысти син водзас мыйкő кутіс веравны... Ылькнитіс морőс пытшкас водзын тőдлытőм дой. Ойдіс, паськаліс тувсовъя ытваőн... А сєсся донőдőм сутугаőн сьөлőмас пырис дой. И эз пет.

...Паляліс Ёгор кык вой сургőм бőрын. Ру пыр тыдовтчис Анналőн, гőтырыслőн, вазьőм синъяса чужőмыс.

— Господи, господи...— ливкйőдліс Анна.— Господи поми-луй...

— М-м-мый лои?— косьмőм вом дорнас шőпнитіс Ёгор.

— Тэ эн сєрнит, Ёгорушка, тэ őні нинőм эн шу, донаўй менам... Тэ куйлы. Тэ прőстő куйлы, менам сьөлőмшőрőй, менам вердысьőй-юкталысьőй... Ме тэнő гөгөрвоа, ме тэнő сьөлőмőн кыла. Дойтő кыла, тőждтő кыла, майшőгтő кыла. Ас вылő найőс босьта, сира гезйőн кыска... Медбур єртőс воштыны... Сідзкő — őти бордтő чегны... А тэ чегин... Чорыд сьөлőма мортлы кокни. А тэнад сьөлőмыд — небыд, став дойсő ас пырыд нуан, йőз вőсна тőждысян... Вот и инфаркт... Тэ бурдан, Ёгорушко, врачьяс кыв сетісны, найő тőдőны... Сőмын нинőм йылысь őні эн думайт. Узьышт на. Ми орччőн, ми тані, тэкőд, őтлаын... Кылан? Верит!!! Ми őтув ставсő венам!

— Ин...фар...кт? Кытысь?— слаб да чуймőм гөлőсőн шыődчис Ёгор.— Менам — инфаркт?

— Да, Ёгорушка, мый сєсся вőчан?— нора сєрнитіс Анна.— Сьөлőмыд тай абу кőрт. Кőртыд и то сімő... Ставыс прőйдитас, ставыс бөрő коляс... Медся лėк тőв нырыс тэ вывті муніс нин, слабог. Врачьяслысь кывзысь, и кок йылад регыд сувтан. Тадз шуисны. Ме эска, менам сьөлőмőй кылő. А кыз мőд ногыс? А őні тэд колő шойччыны, вынъястő содтыштны... Слаб на...

— Лымва...— шőпкис Ёгор.

— Лымва? Кутшőм Лымва?— синва сорőн юаліс Анна. Сєсся мыйкő гөгөрвоис, сьөлőмсő мыйкő єнтіс.

— Кутшőм Лымва! Некутшőм Лымва!— вынсьőдіс гөлőссő, бөрдіс Анна.— Кылан? Тэ ме йылысь коркő думыштлан он? Семья йывсьыд?! Миш бөрся сэтшőма тэрмасын мунны? Некутшőм вөр! Некытчő ог лэдз! Туйтő вомőнала, тасала, каличала! Вөр йывсьыд вунőd! Лымва йывсьыд вунőd, тэтőг нин сйő кызикő визувтас!

— Муна-а...— шőпкис Ёгор.— Миш муніс, и ме муна... Миш эз повзы, и ме ог повзы... Муна...

Кыз, мужичőй гөлőсőн бөрдзис Анна. Нывбаба сьөлőмнас кыліс: мунас Ёгорыд. Та вőсна и бөрдіс. А гашкő, став мужичőй вőснаыс. Тőдіс: нинőм он вермы вőчны, некытчő сйő оз вольсась, нинőмтор оз тасав. Анна тőдіс ассьыс верőссő, коми мужичőйтő. Комын сайő во тай őтлаын. Сыркьялысь ань őні думсьыс прőщайтчис верőсыскőд. Но мőдарсянь пыр на эскис, кőсйис эскыны, мый ставыс лоас лючки-бур, и Лымваыс оз вошты сылысь верőссő, оз пőдты, оз ви... Лымваыд — бур... Лымваыд —

шань... Лымваыд доръяс, Аннаос кылас. Лымваас ыджыдыс — олөм, абу кулөм... Көн либө му вылас правдаыс, збыльыс? Көн либө сійө, коды ме эска, кодысь ме отсөг кора?

...Вай кутам эскыны и ми. И сэки ставыс, гашкө, лючкиладнө лоас. Лэдзам мортсө. Восьтам туйсө. Мирыс таысь оз дрөгнит, му шарыс шөри оз пот. Эм кутшөмкө чусалысь надеятор, мый Ёгорөс вөрад оз Миш, оз ёртаныс вөтлы. Олөм синмыс адзö, олөм пельыс кылö, мый Ёгорлөн некутшөм мыж сы водзын абу. Сөмын вот мортпытшса Сөвесът, эм кө сійө... Кытчө воштысян, чужөма кө, лов пыткад пырөма кө? Сьöкыд... И өттшөтш — кокни...

А Ёгорөс Лымва корö. Юыс, кыdzi и став вөр-ваыс, морттöгыс оз жö ов. Гажтөмтчö. Ас дiнас корö. Медводз — бурджыкъяс-сö, шаньджыкъяссö, небыдджыкъяссö... Полö ярскöбъясысь, жлечъясысь, мыр чужъялысьясысь, вөр-васö урöстысьясысь. Но пышйыны да воштысьны омöль мортысь вөр-ваыс мыйлакö оз вермы. Ставыс — өтгудырын. Ставным ми. Вөр-ваыд — ён, но и — слаб... И татшөм сылөн тешкодлуныс. Но Ёгорөс — корö. И мортыс мунас. Сы водзын — кык туй. Мунас кө — коркö локтас. Анна дiнö, челядь дiнö, нукъяс дiнö... Вермас лоны, унаысь на топöдлас морöс бердас гөтырсö, став рöдвужсö... Оз кө мун — вошас. Нюкыртчас. Сылас. Кад кольөм мысти. Кутшөм туйвеж бөръяс Ёгор? Сетам воськовтны аслыс. Сапөгсö лэптöма нин. И сы вылö сюся видзöдö Анна. Сiйö тöдö. Тöдö... Тöдö...





Алексей МИШАРИН

Вильыд ордым*

ПОВЕСТЬ

Кöза гусялöм

Сиктö пыригөн участкөвöйлысь «уазиксö» паныдаліс Малань пöч. Ылысянь на öвтчис кинас.

— Сувтлöй,— горöдліс да кинас тупкыштлис пиньтöм вомсö, тыдалö, яндысис.

Петрович надзмöдіс машинасö, а кор öтвесьтасис пöчкöд, дзикöдз сувтіс.

— Кöзаыд сюри али мый?— öдзöссö восьтігмоз юалис сійö.

— Эз, ме сикт гөгöрсö кытшовті нин, некөн абу. Рытсяньыс лысьтытöм да вöраыс тшыкö.

— Колöкö, кодкö лысьтіс.

— Пон нёнъ,— дöзмис пöч.— Корсь, он кö, пыр жö норася, тэ менö тöдан.

— Тöда, корся, корся. Сöмын куим лун мысти, оз кö ачыс гортад лок. Сэтшöм законыс.

— Сэтшöм закон? Коді сійöс лöсьöдіс?

— Ыджыд чинаясыс.

— Тьфу тэнад чинаыдлы!— сьöвзис Малань пöч машина кöлеса улö да бергöдчис мышкөн.

А тайö кадö Маня нима кöза вöлі нин Нёбью дорса вöрасян керка бердын. Домын, гез йылын йирсис. Йирыштас веж турунсö, лэптылас нырсö, исыштас сынöдсö да мекöстас.

— Ме-э.

Сосновский Андрей колонияын пукалігөн дзикöдз тшыкöдіс лыткасö. Сэні ёна чифиритіс, да, гашкö, сы понда. Лёкджык сёян кö нылыштас, пыр и нюкыртас вöлі кынöмсö. Вöля вылö петіс да ёнмыштіс, кынöмыс гөгрöсмис. Но öні, кор воисны Шудöг туйыввса вөр керкаö, бара кынöмсö кутіс топлöдлыны. Кансер сёяныс, тыдалö, эз лöсяв. «И колö жö вöлі нюкыртны öні, кор лоö дзебсясны. Мешöк тыр сьöм, а нинöм вöчны он

* Пом. Заводитчöмыс воддза номерын.

вермы». Апаліс таблеткаяссö, мый вöлі сьöрсьыс, но ыджыд от-сöг эз ло. «Вот эськö йöв стöкан кö юыштны»,— вөр керкаса нар вылын кынöмас кутчысьöмөн мөвпаліс сійö.

— Дзикöдз топöдіс,— шога норасис Дерягинлы.— Öти пöлöс кансерыд оз лöсяв тшыкöм лыткалы. А водкаыс оз жö дыр кежлö дойсö бырöд. Водзын йöв юыштлі да вöлі кокньöдлас.

— Кысь тан йöвсö босьтан?— чуймис Дерягин.

— Кöза позьö гусявны,— суйсис сёрниö Коля Майбуrows.— Ме тöда, кöні йирсьöны. Нуам, да некод оз тöдлы.

— М-м, кöза.

Дерягин чöв оліс, думайтіс: «Кöза гусялöмөн верман йöзасьны. Но и висьыс корешыд тані олöмсö сьöктöдö. Кулö кö, меным унджык кольö. Коляöс позьö не лыддьыны. Повзьöдан да лань-тас. Оз, оз туй, кулö кö, туясьны мöдасны. Андрейлөн шойччöг лунъясыс удж вылас помасясны, и пыр жö корсьысьны заводитасны. АТП-ас шоперьясыс оз тырмыны, та вöсна тшукыс сідз оз кольны. Жаль, мый эг тшöкты удж вывсьыс мунны ас окота серти».

Коля Майбуrows чöв олöмсö, тыдалö, ас ногыс донъяліс.

— Эн пов, ставыс лючки лоö,— такöдіс сійö ошйысигмоз.

— Ладнö,— шпыньмуні Дерягин.— Мыйкö кö не сідз лоö, тэнад сьöм пайыд вуджас меным.

Коля Майбуrows та вылö нинöм эз слöймы шуны. Сійö Дерягинысь польштіс. Вывті нин кöдзыд видзöдласыс сылөн. Дай синмыс быттö морöстö пискöдö. Мунігас эз сэсся шыасьлы. Сöмын лыс лапъяссö да пу йывъяссö машина вывсьыс шыблалігөн видзчысьöмөн чöвтывліс синсö сы вылö.

Кор налөн «Жигулиыс» матыстчис веж луд вылö, кöні йирсисны кöзаяс да ыжъяс, Коля Майбуrows корис сувтны.

— Со, бадь куст дорас,— индіс Дерягинлы.— Матын кöзаыс, аддзан, лöз лента сьыліас. Бадь корсö судзöдö. Ме нянь торнас ылöдла да кватита сюрöдыс, а тэ отсалан машина дорас вайны.

— Но, давай,— тэрмöдлыштіс мöдыс.— Тэ водзын мун.

Коля видзчысьöмөн воськовтіс кöзалань. Нюжöдіс сылы няньсö да ачыс мекöстіс:

— Ме-э.

Бöрсянь кыліс прысьнитöм, но Коля та вылö кивыль эз вартлы. Сійö лажынтчöмөн нöшта матöджык матыстчис кöза дорö. Öтар кинас мыччис няньсö, а мöдарнас, кор кöзаыс нюжöдчис няньысла, кватитіс сюрöдыс.

— Лок, отсав,— шöпкöмөн корис Дерягинöс.

Дерягин ырыштчис, босьтіс кöзасö мөздорас да зіля мöдöдчис машиналань. Коля, кöза сюрö шашаритчöмөн, лётйысис бöрсяныыс.

— Восьт öдзöссö,— тшöктіс Дерягин.

Кабинаын кöза заводитіс лёкыс пессьыны да баксыны.

— Вай гезсö, домалам коксö,— корис Дерягин.

Коля уськöдчис багажниклань. Перйис сэтыс вöсньыдик гезпом да мыччис Дерягинлы. Кыкөн сэсся öдва кöрталісны пессьыс кöзалыс кокъяссö. Кöза куйліс бöръя пуклöс вылын, будзгыльтліс синсö домалысьяс вылö да нораа шыасьліс:

— Ме-э.

Мужикъяс пуксисны машинаö да пыр жö вöрзьöдчисны.

Найö мöдöдчисны веськыда Шудöг туй выlö. Воддза сулаланінсö прöйдитисны.

— Видлам пыдöджык пырны,— шуис Дерягин.— Тані веркö-сыс топыд, ог сибдöй дай кöлеса туйыс озджык коль. Зэрыштас кö, ялакодь нитш вылас ньöти оз кут тöдчыны.

Та пöрийö кöза гусялысыяс муртса эз воны вөр керка дорöдз. Верст джын сöмын лои подöн мунны. Машинасö колисны сук лаптяса ыджыд коз бокö. Он кö сюся видзöд, он и казав. Лыс лаптясыс дзебöны да нöшта турунвиж рöмыс.

Дерягин разис гез помсö кöза кокъясысь да кöрталіс сійöс сюрас. Кыскыштіс гезйöдыс кабинасыс. А Коля босьтіс ньөр да бöрсяныс ырыштчис кöза выlö. Кöза котöртіс Дерягин бöрся да öтарö норасис:

— Ме-э, ме-э.

— Йöвтö вайим,— керка öдзöс восьтігмоз горöдіс Дерягин.— Пет, лысьты.

— Ог вермы, мед Коля лысьтас,— кынöмас кутчысьöмөн шыасис Сосновский.

Дерягин эз мöд уна сёрнитны. Юрнас довкнитіс Майбуровлы да индіс пызанлань, ыджыд кружка выlö. Коля эз мöд пыксыны, босьтіс кружкасö да матыстчис кöза дорö. Лажыньтчис: öтар киас кружкаыс, мöдарнас кöза нёнсьö чабравны кутіс, но йöлыс эз пет. Сöмын кöзаыс лёкысь заводитіс чашйысьны. Дерягин аддзис тайöс да серöктіс.

— Сиктса морт, а лысьтысьны он куж.

— Ог, миян кöзаыс некор эз вöвлы.

— Вай кружкасö, со кыдзи колö.

Дерягин петкöдліс, кыдзи лысьтысьöны. Сэсся выльысь мыччис Колялы кружкасö.

— Öні ачыд.

Коля Майбуров час джын кымын мырсис, лысьтысис. Кружкаыс тырис да пыртіс керкаö, мыччис Сосновскийлы.

— На лекарствоыд, ю.

Сосновский гулькйöмөн юис выльысь лысьтöм йöвсö. Эз брезгуйт, мый сысьявтöм да сьöд чутъяс бовьялісны. А Дерягин видзöдліс сы выlö да сöмын кызöктыштіс. Кыскис мешöкысь вöсньыдик кузь гез да тшöктіс Колялы домавны кöзасö.

— Кöні суқджык туруныс, сэтчö домав. Сэсся ведранас лэччыв ю дорас да юктöд. А то аски йöвсö оз сет.

Дерягинлөн мамыс, кувтöдзыс, видзліс кöзасö. Сійөн и тöдö, мый да кыдзи колö вöчны. Тайö кадсянь Коля Майбуров, пусьöмысь да чери кыйöмысь öтдор, кутіс кöзаöс дöзьöритны. Вежлаліс йирöданінсö, кыкысь лун лысьтіс да юкталіс. Корсюрö сетліс нянь кусöк. Уна йöв эз лолы, но кружкаыс тырлывліс. Сосновскийлы регыдөн и лöсьыдджык лои. Та бöрын Коля Майбуров видліс могсö сы выlö вештыны.

— Ачыд сэсся кöзасö лысьты,— шуис Сосновскийлы.

— Тэ нин, велалöм морт,— шпыньдіс мöдыс.

Майбуров заводитліс венласьны, но Дерягин сы выlö сідз чöвтліс синсö, мый пыр жö ланьтіс. Петіс керкаысь да лэччис Нёбью дорö. Кутіс лэптавын подольникъяс. А думнас видіс быдсяма лёк кывъясөн Дерягинöс. «Виччысьлам, лоö и миян улич вылын гажыс»,— шуаліс аслыс.

Подольникъясö шедöмаöсь бура ыджыд ёкышъяс. Мездаліс найöс, вугыръяссö самаліс да выльысь чöвталіс. Перйис гач зепсьыс плёнкаа мешöк да чукöртіс черисö. Бөр мөдöдчис вөр керкалань. Этшыс ю дорын ноксигкості раммыштіс, но лöглуныс Дерягин вылö морöс пытшкас коли. Сійö мөвпыштліс нин аслас сьöм пайöн пышйыны татысь, но поліс. Суöдас кө Дерягиныс, мөдарьюгыдас мөдöдас.

Нёбью бокин

Участкөвöйкөд торйöдчөм бöрын Васьö да Данила локтісны гортаныс. Мамыс Данилаос паныдаліс пинясьöмөн.

— Мудйысьны локтім, а помся кытчöкө мунан!

— Участкөвöйкөд Шудөг туй вылö ветлім. Банк грабитысьяс-öс корсим.

— А тэныд сэтчөдз кутшöм мог? Мед ачыс корсьысьö, сыысь удждон босьтö.

— Да ми машинасö аддзылім, кайлім индыны.

— Индінныд?

— Эз нин вöv.

— Но вот, босьт кокансö да лок мудйысь. Виччысясны тіянöс грабительсясд, кор локтанныд да тшапнитанныд. Видзöдтö, кутшöм «Шерлок Холмсьяс»!

Данила эз кут венласьны. Пыраліс сарайö, перйис кокансö да матыстчис картофель град дорö, заводитіс мудйысьны. Мамыс тшöтш мудйысис, а Лиза чойыс ёг нетшкис. Сійö, кор мамыс сёрнитіс, Данилалы сöмын кывсö петкөдліс.

Мудйысьöмыс муніс надзөн. Водзджык кө, кад вылö кураналісны, эськө ёгыс этшаджык вöлі. Но кысь, он öд карсянныд уськөдчы. Öні лоö йöжгылясьны, öктыны ёгсö да сы бöрын коканасьны. Мамыс Лизакөд öтвылысь уджсö вöчисны. А Данила öтнас. Веськөдчис, малыштіс коссö да юаліс мамыслысь:

— Батьыд көні?

— Тэ моз жö шöйтö. Важ удж вывсянныс звөнитлісны да муніс. Öг пö дыр ветлы, а кык час нин мунöмсянныс коли.

Но буретш тайö кывъяс бöрын батьыс мыччысис дзирья öдзöс дорö.

— Менö виданныд?

— Кодöс сэсся? Вошинныд öтиныд и мөдныд.

— Час, ми Данилакөд босьтчам да суöдам на тіянöс.

— Видлöй!

Батьыс тшöтш босьтіс кокан, сувтіс Данилакөд орччөн. Тайö лунö сэсся став семьяөн мудйысисны. Рытöдз тырмис уджыс. Мамыс костас пывсян ломтіс. Пессö да васö Данила воддза луннас ваявліс. Удж эштöм бöрын ставөн пывсисны, косяссö небзьöдісны. Ужнайтігөн Данила бать-мамыслысь вöзйысис чери кыйны катыны.

— Мед ветлас, ме пывсян öдзөссö ачым лөсьöда,— кывкөрталіс батьыс.

А Васьöос, участкөвöйкөд торйöдчөм бöрын, мамыс тшöктіс агсасьны. Налөн градъяс вылын картофельслөн корйыс ляпкыд на, мудйыны водз. Сöмын ичöt куранөн костьяссö позис кура-

навны. Та дырйи мамыс эз ропкы. Ачыс сійө пывсян кōджын машинаон пясласис. Ывла вылын нюжōдōм кōвийō ошлōма бура уна мыськōмтор.

— Сōмын эн пуркйы буссō паськōм вылас,— олодис мамыс.

— Ог, ме мōдар ошинь улō муна, сайōдинас.

— Правильнō, сзк кості тані паськōмыс шуралас. Со тōла и шондiа,— вочаасис мамыс.

Мōд асылō Данила да Васьō босьтчисны дасьтыны пыжсō да чери кыян кōлуйсō. Данила мудйисигон октōма кансер банкао нидзувъяс.

— Со,— петкōддис другыслы.— Бура уна, кыкнаннымлы тырмас.

Черисō кыйны шуисны мунны пыр жō. Буретш пō рыт кежлас воасны войпуканінас. Сэки чериыс бурджыка сейō. А катигас кыснасясны.

«Бригантинао» лэдзисны ваō, сōвтисны кōлуйсō да пысалісны тōвдōра. Васьō пуксис пыж бōжō. Данила босьтис кык лопта пельс. «Бригантина» бара петіс туйō. Ичōт ю вом прōйдитōм мысти шлывгис Нёбью кузя, ваыслы паныд. Зонкаяслы син водзō воалōны пыр виль серпасъяс. Найō лелькуйтōны видзōдлассō, вайōны кыпыдлун.

Нёбью отар-мōдар берегса серпасыс нинōмон абу вежсьōма. Кыдзи колян воясō, шувгōны пожōмъяс да пашкыр козьяс. На костын шпорōдчōны коръяснас кызъяс да пипуяс. Кōнсюрō тыдалісны гут виан тшакъяс. А джуджыд кыркōтшыс кузьталаыс розя. Джыджъяс вōчалōмаōсь позъяс. Найō мыччыслōны, гоньялыштōны да жбыр лэбзьōны. Тыдалō, кынōмпōт корсьны. Пуяс йылын пукалісны катшаяс да китшкисны. Воча кравзисны ракаяс.

Данилалы тōд вылас пыр жō уси шудōгса вōвлōм оланіныс, кытчō найō кык во сайын веськавлісны.

— Васьō, кыздз думайтан, оні барак колясьясыс эм на Шу-дōгас?

— Абу, батьō висьталіс, сотōмаōсь пō. А кодкō ю дорас лэптōма виль вōрасян керка и орччон пывсян. Кольōм кадсō пō оні казътылō сōмын му чомъясыс. Найō пō онōдз на тōдчōны, йиркыс кōть и лямалōма.

— Шойнаыс коли да миян сувтōдōм крестыс,— содтис Данила.

— Ми од сы ыла ог катōй.

— Огōй, матіас сувтам. Микол вōр керка дорас. Регыд чукыль саяс мыччысяс.

Зонкаяс катісны нōшта верст джын кымын, прōйдитісны юыслысь чукыльсō да веськōдісны пыжсō берегань. Сувтисны, Васьō петіс пыжсьяс да кыскыштіс сійōс вылōджык, лыа кōса вылас — сійō тані зэв векныд, муртса лōо сыв-мōд пасьта.

Данила прōйдитчис ю пōлōныс. Отилаысь син улас усины кок туйяс. Кодкō ветлōдлōма кедьон. Сер сертиыс позьō казьяны, мый мортыс татчō регыд на волōма. Данила копыртчыліс да сюсьджыка видзōдліс.

— Васьō,— чукōстіс другсō.— Со кодкō тані регыд на тапикасьōма.

Васьö тэрыба матыстчис да тшөтш талялөмсö видзöдлiс. Сэс-ся водзö ветлыштiс, сюся видзöдiс лыа кöсасö, ю дорсö.

— Кодкö подольникъяс вöйталöма. Татчö ог кольччöй. Катам водзö, а то абу лöсьыд йöз кыйсянинö пырны.

— Катам,— довкнитiс юрнас Данила.

Зонкаяс бөр сölисны пыжö да йöткыштчисны. Данила чöвтiс пыж бөжö куим вугыра кыснансö.

Тайö кадö Коля Майбуров локтiс вөр керка дорö. Дерягин да Сосновский эз тыдавны. «Шкоргöны, буракö»,— думыштiс Коля. Öшöдiс чери ёкмьльсö керка стенö тувъялөм көрт тувйö да видзöдлiс неылын йирсьысь кöза вылö. Сылы пыр жö дум вылас уси, мый рытнас бара лоö лысьтысьны, юктасьны. Таысь сийöс весиг кезнитöдлiс. Лöглуныс Дерягин, а сыкöд тшөтш и Сосновский вылö выльысь ыльöбтiс. Пытшкыс гудыртчис скö-рысла. Сулыштiс, кыйкнитлiс öтар-мöдарö. Бөр босьтiс тувйö öшöдлөм черисö. Сэсся шавксöдiс кöзалань. Кöза вельштiс нин Коля дорö да эз пышйы. Лэптiс юрсö да виччысис сылысь матыстчөмсö.

Коля разис муас сатшкөм беддö көрталөм гез помсö да каттис сийöс сой бердас.

— Лок,— кыскыштiс гезйöдыс кöзасö.

Коля Майбуров öтар киас кутiс чери ёкмьльсö, мöдас — гез помсö. Мөдöдчис ю дорö. Бöрсяныс гез йылын вöтчис кöза-ыс да гежöдика шыасьлiс:

— Ме-э.

Майбуров веськöдчис ю кывтчöслань. Сийö тэрмасис, та вöс-на тракийс гезсö, медым кöзаыс зильджыка восьлалас. Ю дорын сувтiс, кыскыштiс гезсö асланьыс да мынтöдiс сийöс кöза голя-ысь. Кöза казялiс домьыс мынөмтö да пыр жö уськöдчис пышйы-ны берег пöлөн.

Майбуров каттис гезсö да мый вынсьыс шыбитiс юас. Сэтчö жö мөдöдiс домасян бедьсö. Визулыс сийöс пыр жö кватитiс.

Коля босьтiс чери ёкмьльсö, матыстчис подольникъяс вöйта-сянинö. Пуксис лыа кöса вылö. Кöсийс пукыштны мыйкöдыра, медым ёртъясыс чайтасны, мый кöзаыс сылөн чери кыйигкостi пышйöма. Черисö кыйны велöдiс Дерягин, а сэсся шуис, мый тайö могыс лоö сöмын сылөн. Та вылö Коля бара паныд нинөм эз лысьт шуны. Ас пытшкас дöзмöмсö кутiс.

«Мед öнi ачыс корсяс кöзасö, лысьтас да йöвнас чöсмасяс. Слуга туйö видзöны: то лысьтысь, то чери кый, то пусьы»,— лöгпырысь думыштiс Коля. Сийö пукалiс лыа кöса вылын. Шыб-лалiс ваö посныдык изъяс. Морöс пытшкас чужласисны майша-сьомъяс. Öтарö кö, грабитөм сьомыс шонтiс. А мöдарö кö, пов-зöдлiс: мыйөн ставыс помасяс? Дыр-ö ковмас дзебсясьны? Мый виччысьö сийöс водзын? Татшөм майшöдлөмъяс бөръя кадö эз-эз дай нем виччысьтöг чужлисны сы пытшкын.

Час мысти Коля Майбуров, киас чери ёкмьльсö бовйöдлiгтыр, воис вөр керкаö. Пырис, адзис нар вылын шкоргысь ёртъяссö да гораа шыасис:

— Шкорганьыд, а кöзаыд оз тыдав. Пышйöма, тыдалö.

— Мый?— лэптылiс юрсö Сосновский да бөр унмовсис.

А Дерягин сöмын мöдар бок вылас бергöдчис. Кыкнан пом-сьыс паркйис вина дук. «Гусьөн тöкаритöмабсь»,— думыштiс

Коля да петіс ывлаӧ. Заводитіс керны-весавны черисӧ. Лӧсьӧдчис юква пуны. Кынӧмыс важӧн нин гургис-сюмаліс. Пӧртийӧ пуктіс ва да ӧшӧдіс бипур весьтӧ. Сэтчӧ жӧ шыбитіс черисӧ да крӧшитіс некымын весалӧм картупель, солыштіс. Пуксис бипур дорӧ. Тадзи сійӧ коллялӧ тані коймӧд вежон нин. Регыд, тӧдӧмысь, ковмас бӧр лэччыны карас. Дерт, буракӧ, полиция корсьысьӧ сӧм гусялысьяссӧ. Сӧмын код вылӧ грекуйтӧны? Водзвылас удж вылын Сосновский босьтіс тӧлысь кежлӧ отпуск, быттӧ муніс лунвылӧ, гортас. А Коля висьтасис, мый мамыс сійӧс корис. Та вӧсна дугдас кондукторавны. Дерягин некӧн эз уджав. Сідз, кӧнсюрӧ калымитіс сӧмын. Суседыслы висьталӧма, мый мунас Усть-Цильмаӧ чери кыйны. Банк дорас юрас сюйлісны капрон чувки. Ӧдвакӧ кодкӧ тӧдмаліс найӧс.

Кӧза сюрӧм

Данила да Васьӧ катісны сувтланінсянь верст кымын. Катігас кыснанӧ пысасис нӧшта ӧти сир, содтӧд кык дорас. Кор мыччысис сэтшӧм жӧ лыа кӧса, кутшӧмӧс сӧмын на лои энӧвтны, Данила корис другсӧ сувтны.

— Тырмас, татчӧ кольччам.

— А-а,— Васьӧ веськӧдіс пыжсӧ береглань.— Со, кодкӧ тани, джуджыдінас, ичӧтик коляс вӧчлӧма. И ю пыдӧсыс галя изъя, комыд вермас лоны.

Зонкаяс босьталісны вугыр шатинъяс, нидзув доз. Заводитісны вуграсьны. Ком чери зэв видзчысьысь. Сійӧс колӧ кужӧмӧн кыйны.

Васьӧ коляс дорӧ шыблыштіс ӧтруб. Медым чериыс казялас да локтас. Коляс бӧрын ва визулыс лӧньджык. А неуна водзынджык визулыс ӧддзӧ. Вугырсӧ колӧ чӧвтны сідз, медым веськаліс лӧня-визула костас. Ком зильӧ кутчысьны ӧти пыднаын, и ва ямигӧн корсьӧ джудждӧсін. Пыдіас паныдасьялӧны ыджыдджык чериас. Ком ӧн чери. Дзбӧдігӧн, вугыр шайт тракнитӧм бӧрын, чериыс нетшкысьтӧг сулалӧ ӧти местаын. Та дырйи кажитчӧ, быттӧ эз чери пысась вугырад, а ыджыд кокора. Тшӧкыда овлӧ, мый жилкасӧ орӧдӧ. Ком олӧ неыджыд кельӧбӧн. Ыджыдьясыс ӧнджыкасӧ ӧткӧн уялӧны. Визулінын да ю косясын чериыс сулалӧ визув помын, гӧптын либӧ из да вужля сайын.

Другъяс вуграсисны тайӧс тӧд вылын кутӧмӧн. А кор рытъя шондіыслӧн алӧйгӧрд югӧрыс инмис пу йывъясӧ, Данила босьтіс ассьыс ичӧт черсӧ.

— Ветлам, кос пу чукӧртам,— шыасис сійӧ.— Колӧ бипур пестыны да юква пуны.

— Час, шатинсӧ сатшка бурджыка,— вочаасис Васьӧ.

Зонкаяс кайисны ягӧ чукӧртны усьласьӧм увъяс, керыштны пӧрӧм, косьмӧм понӧльяс. Коліс заптыны пессӧ сы мында, медым войпукны тырмас.

Регыд мысти Нёбью береглӧн векньыдик лыа кӧса вылын яра ломтысис бипур. А пӧртийын пуис юква. Чӧскыд кӧрсӧ тӧлыс разӧдіс.

— Дульва нин петӧ,— паньнас видліс юквасӧ Данила.— Пусьӧма, лок сӧям.

Васьё мыччис тасьтисё. Данила первой пукталіс черисё, сэсся кизьёрсё кисьтис. Ачыс пуксис сёйны веськыда пёртсьыс.

— Васьё, мыйла Бимтё эн босьт?— вомтырнас юаліс Данила.

— Сылён кокыс доймыліс, чотё вёлі. Ёні эськё пёшти бурдёма нин, но батё шуис, мед пё лун-мёд горт йёрын олас.

— Кытчё дойдліс?

— Ог тёд, кытчөкө ю дорын. Лэдзлі гуляйтны да.

— Жаль, сыкөд эськё гажаджык вёлі.

— А-а. Ме сійөс велөді уськөдчыны мышсянь дай кисё бандитыслыс курччыны. Кодён пурт либё пистолет кутё.

— А код вылын велөдін?

— Первой чучела вөчлі, а сэсся ачым купайкаасьлі. Сарайын батёлөн важиник вёлі ошалё. Пасьтавлі, мед пиньыс киё оз сатш.

— Да-а,— нюжөдіс Данила.— Тэ, буракё, збыльыс бандитьяссё кутавны мөдан.

Сэсся мөдарё бергөдіс сёрнисё:

— Вуграсьыштам на өд.

— Да, колё кыйны, мед тырмас тэныд тшөтш карас лэччөдыштны.

— Ме көсйыси гөстинеч вайны дедушлы да бабёлы.

Сёйыштөм бёрын зонкаяс зэвтисны вон. Данила вёлі вайёма карысь. Батыс пыралёма кыйсьысьяслөн лавкаё да ньөбёма пиыслы козин пыдди.

Та бёрын нёшта на вуграсисны. Тёлыс лөнис и пыр жё чужисны номъяс. Найё дзизгисны да сатшкысялісны чужөмё, киясё. Васьё перйис номъясысь мавтчан да чукөстіс другсё.

— Лок мавтчы.

Мавтчөм бёрын вуграсьны лои кокныдджык. Но номъяс кытшалісны да важ моз дзизгисны. Сөмын чужөмё да кушинъясас эзджык пуксьывны. Данила вайис коз лапъяс да пукталіс бипур вылө, вөчис тшынас.

Кор чериыс дутдіс сёйны, зонкаяс пырисны вонйё. Ас бөрся тупкисны восьсаинсё, медым дзизгысьясыс оз пырны.

Выл местаын эз пыр унмовсьны. Варовитисны водзё велөдчөм йылысь. Васьё нёшта өтчыд висьталіс, мый чорыда нин думыштис велөдчыны да уджавны полицияын. А Данила шуис, мый школа бёрын, батыс моз, велөдчас энергетикё. Ёнісянь нин ёнджыка велөдө математика да физика. Медым вермас пырны Сыктыв-карса вөр институтё. Сэні эм колана факультетыс. Сёрнитігас и унмовсисны.

Асывнас другъяс палялісны вон дорын шпорөдчөмысь да көза шыысь.

— Ме-э, ме-э.

Другъяс пыр жё петісны вонйысь. Кутшөма жё чуймисны, кор адзисны кузь сюра, еджыд көзаёс. Сыыліас көрталёма лөз лента.

— Да тайё жё Малань пөчлөн көзаыс,— чуймөмөн горөдіс Васьё.— Кыдз татчө веськаліс?

— Сё дивөйд,— чуймис Данила.— Вай кутам да лэччөдам.

Васьё босьтис няньтор да кисё нюжөдіс көзалы. Көза эз пыр жё уськөдчы нянь дорад. Тыдалё, кутіс тёд вылын, мыйён помасьліс воддза няньторйё нюжөдчылөмыс. Но век жё чөскы-

дыс веніс, матыстчис зонка дорё. Васьё отар кинас няньсё сетіс, а мёдарнас сюрёдыс кёзасё кватитіс.

— Данила, вай гезпомсё пыж кудсьыс,— горёдіс сійё.

Данила котёртліс пыж дорё. Васьё пыр жё кёрталіс гезсё кёзалы сюрас.

— Мый кутам вёчны?— юаліс сійё.

— Лэччёдам Малань пёчлы.

— Тешкодъ, та ылна локтёма.

— Шензьы кётъ эн. Колё мёвпыштлыны. Тэ ёд сыщикё кёсьян велёдчыны, босът да думайт, мыйла Маняыс та ылнасё локтёма.

— Отлаын колё мёвпавны. Тэ на, друг морт, верман чуйдны.

— Ме думайта, лэччам сиктас, сетам кёзасё Малань пёчыс-лы, да колё паныдасьлыны Иван дядькёд.

— Ёні жё лэччам? Ог вуграсьёй?

— Огё, мёдысь волам. Ме вёзйыся мам-батьлысь да кольч-чыла.

— Миянын олыштан.

— А-а.

Зонкаяс лёсьёдчисны кывтны. Кусёдісны чусалысь бипурсё. Лэптисны төвдёра, кёзасё пыртисны пыжё да кёрталісны, медым эз чеччышт ваас.

Пыж петіс ю шөрё да заводитіс шывгыны горув. Тёлыс төвдёрасё зэвтис да шпорёдчис. Васьё пыж бёжын веськёдліс. А Данила сынис да видзёдывліс баксысь кёза вылё. Зонкаяс тэрмасисны, прёйдитисны воддза сувтлём местасё. Эз казьявны, кыдзи пуяс сайё саймовтчис мортлөн вуджёрыс. Дзёбсьысьыс лөг синмён колльёдіс найёс чукульёдзыс, кытчёдз эз саявны.

Сиктё воёмкёд тшётш паськаліс сёрни, мый Малань пёчлөн кёзаыс пёшти кык вежон мысти сюрёма Нёбью бокусь. Малань пёч, кор вайёдісны кёзасё, кутліс зонкаясёс и кёзасё. Да вёлись юасис, кысь сюри. Малыштіс кёзалысь вёрасё да шуис:

— Лысьтывлёмаось, ме полі, мися, тшыкё вёраыс. А кодкё кёзасё лысьтё вёлём.

— Колёкё, ошъяс?— шмонитыштіс Данила.— Вёрса ю до-рысь аддзим да.

— Гашкё-й, ошъяс,— аслыснога видзёдліс зонка вылё Малань пёч да нуёдіс донаторсё гидас.

Другъяс мёдёдчисны гортас. Сёрнитчисны, мый Иван дядькёд паныдасьласны бёрынжык. Но сійё, кывлёма йёз сёрнисё да, ачыс локтіс на дорё. Данила кыліс машина шысё да видзёдліс дзирья ошиньёд. Полицияса «уазикусь» петіс участкёвой. Лёсьёдыштіс боксьыс полевёй сумкасё да восьтіс дзирья ёдзёс. Петрович нэмыс полевёй сумкасё кыскалё. Сёмын сы вылысь татшём-сё позьё аддзыны: шулывліс, ёнія папкаясид пё сылы оз лёсявны.

— Чолём,— Петрович пыригмоз киасис батыскёд, довкнитіс юрнас мамыслы, а сэсся шыасис Данила дорё:

— Ме тэ дорё. Висьтась, кысь кёзаыс сюри.

— Нёбью бокусь, асывнас ачыс локтіс.

— Тёдмавны эськё, кыдзи сэтчё веськаліс.

— Малань пёч шуё, кодкё пё лысьтё вёлём.

— Сідзкё, сійёс Нёбью бокас кодкё катёдліс?

— Буракё.

— Верманныд индыны, кытысь сюри?

— Микол вөр керкасянь верст кымын вывлань колö катны. Ми первой керка весьтö сувтлим, но аддзим, кодкö подольникъяс чöвталöма, да вылöджык кайим.

— Коді сэні вермас подольникасьны?

— Ог тöд. И Васьö оз тöд.

Петрович тані ланьтыштис, мыйкö думайтис. Сэсся бергöдчис Даниалөн батыс дорö.

— Николай, тэ он тöд, кодлөн чös туйыс сэні?

— Ме кывлі, сійö Майбуровъяслөн вöлі, а сэсся пöрысьыс кулі да кодлыкö сетлöмаöсь.

— Коді вермас висьтавыны?

— Васьölөн батыс, тшукусь, тöдö. Сійö öд вöрас ветлывлö,— суюйсис сёрниас Данила.

— Петалам, сідзкö,— Петрович довкнитис сылы юрнас. Сэсся видзöдліс детинкалөн бать вылö.— Катöдла Данилатö Нёбью бокас, индас, кысь кöзаыс сюри?

— Мед кайлас.

— Ме öтнам ог, Васьöös нуöдлам.

— Бур,— шуис Петрович.

Петісны ывлаö. Кыпöдчöма лöз кымөр. Тöлыс ланьтöма. Сынöдыс быттö сьöкыда личкис лов вылад. Татшöм поводдяö лолыд оз ветлы. Выліас, лöз кымөръяс пытшкын, югнитліс чардби. А сэсся гымыштліс. Петрович чатöртліс юрсö вывлань.

— Нөрöвитлыны ковмас. Со кызди Иляя Великöйыс мурзö да локтö. Аски асывсяныыс Шудög туй вылас петам. «Уазикнад» öд пöшти дінöдзыс воам.

— А-а,— кöсийысис Данила.— Иван дядь, Васьöлы ме али ачыд висьталан?

— Ачым,— Петрович пырис Васьö дорö.

Данила нöшта öтчид видзöдліс кыпöдчысь, повзьöдчысь кымөр вылö. Сулыштис öшинь улын, а кор петіс тöv нырыс да чорыда крапкис посводз öдзöссö, котөрөн пырис гортас.

Бушколыс заводитчис другөн. Зэрмис, быттö ведраысь кисьтö. Чашйис öшинь увъясысь пуяслысь вожъяссö. Нетшкис сэтөр да öмидз кустъяс. Важиник керкаяс вылысь шыблаліс шифер торъяс. Гымаліс да чардаліс. Быд гымыштöм бöрын Даниалөн мамыс чöвтліс пернапас.

— Бласлö Кристос,— шуаліс вомгорулас.

— Татшöмыд важөн эз вöвлы.

— Кар бердас бара гымалö оз? Николай, мунтöдзыд öшиньтö игныштлін эн?— повзьöмсорөн юаліс мамыс.

— Игана, ачым пöдлалі гортысь петтöдз,— вочаасис батыс.— Дай батьöс кори видзöдлыны керкасö.

Час кымын бушуйтчис тöлыс. Чардаліс да гымаліс. Сэсся, дзик быттö öшинь улын, зэв югыда чардыштис, а бöрсяныыс гымыштис сэтшöм гора, мый öшинь стеклöяс вöрзбылісны. А керка стеныс йиркмунлі. Та бöрын бушколыс вешйис бокö, зэрыс ньöжйöник дугдіс. А регыд мысти мыччысис шонді.

Данила петіс другыс дорö.

— Гымаліс кызди!— шыасис сійö.— Тэнö Иван дядьыд Шудög туй вылас корис ветлыны?

— Да.

— Аски пö ветлам. Мый аскисö виччысьны?

— Талун зэрас на,— Васьö индiс кымөръяс выlö.— Со бөр-
вывсянь лöзыс выльысь кыпöдчö.

Данила чатöртчыліс. Выліас, збыльысь, бара ставыс öшйöма.
Дай зэр тусьясыс заводитiсны выльысь нин воавны. А такöд
тшöтш кутiс чардавны да гымавны.

Мöд асылö, водзпөр на, Данила да Васьö мöдöдчисны участкö-
вöй дорö. Кыдзи сёрнитчисны воддза луннас, найö кайласны
Микол вөр керкаöдз. Кор воисны Петровичлөн оланінöдз, ёна
чуймисны. Сылөн öшинь улас быдмис кузь, пашкыр сус пу. А
öні сус пуыс чегöма. Ыджыдджык юкöныс туплясис туй вылын.
Чегöминыс чишкасьöма, сьöдöдöма. Петрович гöтырыскöд сула-
ліс чегöм пу дорас да юрсö гыжъяліс. Вөлөмкö, чардбиыс лыйöма
пуас да пасьвартöма. Весиг öзйылöма. Малань пöч сэнi жö
бергаліс. Öтарö пернапас чöвталіс.

— Абу бур водзö тайö, Анна,— шуаліс Малань пöч Петрович-
лөн гöтырлы.— Колö видзчысьны верöсыды.

— Да ме быд лун дöжнала, мед пенсия выlö петас.

— Вот, вот. Енмыд аддзö и öлöдö. Абу бур водзö.

— Сöранныд нинöм абусö,— Петрович öвтыштiс кинас баба-
яс выlö.— Нинöм оз ло. Сiдз öд, Данила?

Данила видзöдліс Васьö выlö, нинöм эз шу. Сöмын вашмуні.
А Васьö юаліс:

— Ветлам ог, Иван дядь?

— Öти здук виччысьлöй. Пусö пилита пес выlö, медем вет-
лысь-мунысьылы эз мешайт. Бурджык, мунöй гортад, ме сувтла
тиян дорö.

Петрович босьтiс бензопила, а зонкаяс косісны. Пöпуттьö
пыралісны сельпо лавкаö. Васьöлы ковмöма карандаш. Лавкаын
нывбабаяс казтылісны тöрыгтя гымалöмсö да чардалöмсö. Вись-
тавлісны öта-мöдысы, кодысь шиперъяссö бушколыс чашйöма.
Татшöм страститчöмыс пö эз на вöвлы. Та дырйи ставөн шуисны,
мый гимньöвйөн Петровичлөн öшинювса сус пуö лыйöмыс абу
бур водзö.

Пышйыны лöсьöдчöм

Коля Майбуров шöйтiс матігöгöрын, корсяліс тшакъяс. Эз
пыр казав бушковылысь матыстчöмсö. Кор ывлаыс пемдiс да
кутiсны воавны зэр тусьяс, котөрөн мöдöдчис вөр керкалань.
Но косөн воны эз вевъяв. Брöд кöтасис, зэрыс исковтiс юрси
да чужöм кузя. Паськöмыс ляксис яй бердö.

Бушколыс тölөн, гымөн да чардөн чашйис пу йивъяссö. Сісь-
мöмъяссö пöрлöдліс, нетшкис вужъяснас. Пуясыс катласисны,
нюклясисны öтарö-мöдарö, дзуртiсны, ойзiсны. Быд чардыштöм
да гымыштöм кажитчис зэв матіөн, быттьö юр весятад Илля
Великöйыс кодкöдкö косясьö.

Коля котөрөн пырис вөр керкаö, пуктiс сюрöм тшак нопсö
да видзöдліс ичöтик öшинь дорын сулалысь пызан выlö. Сы
сайын пукалісны ёртъясыс да бара нин «даръясисны». Пызан
шöрын сулаліс кык бутылка водка. Öтиыслөн пыдöсас юантор-
йыс, а мöдыс восьтылтöм на.

Дерягин кисьтис курыдторсö лякось куш стöканö да мыччис Колялы.

— На, шонтысь.

Но Коля эз матыстчы, заводитис пöрччысьны да пыдзрасьны. Дерягин стöкансö киас кутöмөн виччысис.

— Ме дыр на виччыся?— скöрысь шуис сийö.

Коля Майбууровлөн синмыс югнитис лöглунөн. Но воча нинöм эз шу. Матыстчис видзöдлассö дзебöмөн, босьтис Дерягин кийсь водка тыра стöкансö да вайöдлс вом дорас.

— Вежся да вöлись,— бөр пуктис стöкансö.

— Ладнö,— Дерягин босьтис ассыйс стöкансö да чокнитчис Сосновскийкöд.— Поехали.

Коля вежис паськöмсö, кöтасьöмсö öшлис стен пöлөн нюжöдöм кöвийö. Пуксис пызан сайö, кисьтис вомас водкасö да чепöльтис нянь кусöк. Кансер дозйысь паньыштис пуöм кук яй. Морöс пытшкыс шоналис, а юрыс гудыртчис. Кыв йылас мöдiсны бергавны лёкторьяс, кодьясöс эськö шуис Дерягинлы. Но кутчысис, сöмын пиньсö мурч курччис. Чеччис пызан сайысь, босьтис папирос да кыв шутöг петис ывлаö.

— Бөрья кадö оз кажитчы сийö меным,— öдзöслань индiс Дерягин.— Вермас вузавны.

— Мед сöмын видлас,— шуис Сосновский.— Колö сьöм мешöксö мöдлаö дзебны.

— Колö, аски жö мöдлаö нуам.

— Кор Коляыс ю дорас лэччас.

— А-а.

А Коля Майбууров сулалис вөр керка дорын да вомсьыс тшынсö лэдзалигмоз мöвпалис: «Лёк, мый кöзаыс веськалис Васьö да Данила шөрö. Тöдöмысь, туясьны пондасны, кыдзи сийö татчö локтис. Колö усьысьны татысь, а то сюрны верман. Унмовсясны, пыка öдзöссö, босьта ассыйм пайöс и тövзя алкашьяс дорысь. Сьöмнад ог вош, лунвылö сетча. Мед сэсся асьныс черисö кыйöны да пусьöны. Слуга туйö видзöны».

Видзöдлс енэжö: зэр тусьясыс воалисны на, но гежöда нин. «Час, пока юöны, ветла сьöмысла»,— мöвпыштис ас кежсьыс. Саймовтчылис керка сайö да киняулас лöz тубрас топöдöмөн тэрыба мöдöдчис вöрса ордымöд. Пода туйыс зэрсыйс нильзьöма да кокыс вильсьялис. Та понда кыкысь муртса эз гатшась. Та бöрын кежис да мунис ордымыскöд орччөн.

Воис вожа джуджыд пожöм дорö. Видзöдлс гөгöрбок, копыртчис да лэптыштис подувсьыс нитш палаксö, плёнка вевттьöдсö. Перйис сьöм тыра мешöксö. Гугöдiс веськыда нитш вылас. Юкис куим пельö. Ассьыс юкөнсö сöвтис вайöм лöz нопьяс. Видзöдлс коляс вылö да босьтис нöшта öти пачка, содтис аслыс. «Слугаалöмсьыс»,— думыштис ас кежысь. Кöрталис нопсö. Сэсся котöртлис бокö да парсалис нитшсö. Моздорас вайис джуджыд пожöм дорö. Вайöм нитшсö сюялис дзебасысь перйöм мешöк подулö, а вылиас пукталис сьöм пачкаыссö. Öнi сылөн ыдждаыс и сьöктаыс нинöмөн эз торьяв воддзасыс. Сэсся мешöксö бөр пуктис дзебасö. Вылиас бара шлапкис плёнка да нитш палаксö. Лöсьöдыштис, мед нинöм эз казавны. Воысалис лöz нопсö да мöдöдчис вөр керкалань. Син улас друг уси пода туй вылысь кок туйыс. Жежалис бокö, нетшкис росьяс да став тöдчан кок

туйсö чышкис-мольöдiс. Вöр керка дорö воигөн выльысь чорыда зэрмис. Коля котöртiс лэбулö. Керка пельöс подувсьыс кыскыштiс чурка да суйыштiс сэтчö лöз мешöксö. Сэсся чуркасö бöр пуктiс аслас местаö. Вöлисти ышловзис, весиг лов вылас кок-ныдджык лои. Чатöртлiс юрсö вывлань: «Бур, зэрыс мольöдас да кок туйыс оз кут тöдчыны».

Пырис керкаö да сатш пуксис пызан сайö.

— Кытчö вошлiн?— дульсмöм бугыльöн видзöдлiс Дерягин.

— Кöза корси.

— Сюри?

— Эз.

— Оз и ков, сiдз öд, Öнью? Вай точкам.

Сосновский сöмын юрнас довкнитiс да кутчысис стöканö. Юигөн сийö кынöм висьöмсö эз кыв. Дерягин кисьтiс и Коля Майбуровлы.

— На,— мыччис кисьтiгмозыс.

Коля босьтiс, здукөн пöрöдiс стöкансö вомас да колс пуктiс пызан вылö. Дерягин весиг чуймылiс.

— О-о, велалiс!

Коля курччис няньтор, суйис вомас кансер банкаысь яй кусöк, дыркодь няклялiс да нылыштiс. А регыд мысти лэдзчысис дзик код улö да кутiс сöрны.

— Ме коддзи, вода,— шуис мужикъясы да мунiс аслас узылан местаö.

Дерягин öвтыштiс кинас: узь пö.

Мöд луннас Коля Майбуров кунь-кань чеччис. Видзöдлiс орччөн узысь Дерягин да Сосновский вылö. Дерягин шкоргис, а мöдыс узис вомсö паськöдöмөн. Коля шытöг пасьтасис, видлiс пинджак пытшкöс зепсьыс пистолетсö. Ведраысь гумовтiс ва да горша юис. Пызан выльысь босьтiс няньтор, суйис зептас. Восьтiгас öдзöсыс дзуртыштiс, но узысьяс эз палявны.

Коля чатöртлiс юрсö енэжö. Шондiыс бура вылын нин. «Узь-сьöма»,— думыштiс ас кежсьыс. Босьтiс ывла стен бокрын сула-лысь майöг да пыкис керка öдзöссö. Кыйкнитлiс öтарö-мöдарö, перйис керка улысь нопсö да мöдöдчис Шудöг туйлань.

Шышъясöс тшапнитöм

Петрович воис аслас «уазикөн» Данила керка весьтö да тутöстiс. Зонкаяс кыкнанныс котөрөн лэччисны кильчö содйöд. Васьö веськöдчис карта сайö.

— Бимöс босьта.

Петрович восьтiс кабина öдзöссö. Данила пуксис воддза пуклöс вылö, а Васьö бөрвылас. Бим йөршитчис пуклöсьяс костö. Кывсö нюжöдöма, сылы кабинаын жар. Васьö восьтiс асладорсьыс дзöля öшиньсö да Данилаöс корис сiдз жö вöчны. Кабинаыс тöдчымөн ыркнитiс.

— Иван дядь, а пистолеттö босьтiн?— юалiс Васьö.

— Менам сийö пыр сьöрысь.

— И лыйсылiн?— бара юалiс Васьö.

— А-а.

— А талун? Друг да рөзбойникъяскөд паныдасям. Миян пистолетыд абу.

— Тиянлы оз и ков. Паныдасям кө, юрсиктө звонитам да отсөг корам.

— Кор на отсөгыс воас. Колө көть нөшта өти пистолет либө ружье. Менам батылөн кодь,— майшасьомён шуис Васьо.

— Ти эн полөй, ми өд сөмын местасө видзөдлам. Сидз РОВД-са дежурнойлы и висьталі, мися, көза вошлом-сюрөмыс майшөд-лө, колө прөверитны.

— Ми ог полөй, миян Бим эм.

— Ёна тай тэнө ю дорас дорйөма,— суйсис сёрниас Данила.— Колөкө, бара пышъяс.

— Оз, вот адзыланнды,— дорйыштис понсө Васьо.

Петрович кывзис да шпынныліс. Корсюрө содтышталіс зонка-яс сёрниө ассьыс. Висьтавліс, кутшөм лоөмторъяс вөлома милицияын уджалігөн. Сылы унатор позис висьтавны. Ёд милицияын сійө томсянныс. Армия бөрас пыравлөма. Ёти төдса коралөма. Шуөма: оз кө пө кажитчы, бөр мунан. А сы бөрти со кымын во нин коли.

«Уазик» кежис Шудөг туй вылө. Туйыс зэр бөртиыд лоөма нильөг. Машинасө заводитіс шыблавны. Та понда Петрович вуджис коймөд передача вылө да включитіс машиналысь воддза көлесаяссө. Машинаыслөд өдыс надзымыштис, но өні сійө муніс веськыда, эз шыблөдды. Верст кык мысти водзвылын тыдовтчис том морт. Сійө «уазиктө» аддзис да пыр жө кежис, бергөдчис мышкөн да заводитіс пышйыны. Мышкас өтарө-мөдарө бовъяліс лөз ноп.

— Тайө жө Коля Майбуров!— горөдіс Данила.— Пышйө миянысь!

— Збыльысь, сійө,— вочаасис Васьо.— Колө суөдны.

Петрович личкыштис газ педальө. Кор машинаыс весьтасис пышйыськөд, Петрович сувтөдіс да уськөдчис суөдны. Данила да Васьо тшөтш чепөсйисны бөрсянныс. А Бим увтчитгыри котөртис водзвылас.

— Сувт!— горзө Петрович.

— Бим, босьт,— усьөдө Васьо.

Коля кылө бөрсянныс понлысь шысө. Вот-вот шашаритчас гач кокас. Перйис питшөгсыс пистолетсө да метитчытөг лыйис бөрвылө. Пуляыс шуркнитис, чаштөдіс Васьо дінысь коз пулысь вожсө.

Петрович пыр жө өвтыштис зонкаяслы кинас.

— Кольчөй, мунөй машина дорас!

Сэсса перйис ассьыс пистолетсө да лыйис сынөдас.

— Сувт!

Но Коля сөмын содтис өдсө. Бим нөшта на өдзөдіс. Мый вынсыс уськөдчис пышйысь вылө да лапаяснас тойыштис мышкас. Коля Майбуров павгысис ныр вылас. А понйыс пыр жө курччис кисө, кодөн вөлі чабыртөма пистолетсө. Петрович суөдіс, песовтис Колялысь кисө да мырддис пистолетсө. Пышйысьлөн кыкнан киас тшолкнитис наручник.

Петрович тшөктис Колялы сувтны да висьтасыны: мыйла пышйис, кысь пистолетыс?

Но Коля Майбуров сөмын букыштчөмөн видзөдывліс участкө-
вөй ылы. Бугжылытліс зонкаяслань.

А Бим сулаліс сэн жө да эргис.

— Эр-р.

— Колө нопсө шобны,— Васьö кутчысис ноп воысö да
кыскыштіс.

Коля вежыньтчыліс, бергөдчис Васьöлань да скөрысь шуис:

— Эн вөрөд!

Но Васьö мынтіс нин нопйыслысь воыссö. А Петрович ку-
тыштіс, босьтіс киас да разис көвсö.

— Вот тайö да!— чуймөмөн горөдіс Петрович.— Тані гусявлөм
сөмыд! Со коді вөлөм бандитыс! Көні мукөд вөрөгыс? Али өт-
над грабитін?

Данила да Васьö тшөтш видзөдлісны нопсыс сөм пачкаяссö.
А Коля Майбуров зывөкпырысь шпыньмунліс. Сійö нинөм эз
висьтав юалөмтыс ылы. Сөмын кадысь кадö бугжылытліс синсö
сійös тшапнитысьяс ылы.

Петрович телефон пыр йитчис РОВД-са дежурнөйкөд, корис
мөдөдны отсөг.

Сөм тыра нопсө сетіс Данилалы, а ачыс кватитіс шошукөд-
ыс Коля Майбуровös да нуөдіс «уазик» дөрö. Йөртіс сійös маши-
налөн бөръя, решёткаа өшина жыртыс, томналіс.

— Пукышт тані,— шуис ключсö зептас суйигмоз.

Сэсся перйис машинасыс аптечка да суйис аслыс полевөй
сумкаö.

— Ветлам вөр керка дорас,— нуөдіс зонкаяссö.

А та водзвылын Дерягин да Сосновский тракйисны өдзөс
вуг. Чужтылісны өдзөсас да ёрччисны.

— Немортыд, пыкөма! Сюрлас, сылідзирсö песовта!— скө-
рысь шуаліс Дерягин.

Сосновский чужйис ботинкиа кокнас өшиньö. Öшинь рамаыс
лэбис, а стеклөыс зельмуні. Сосновский видзөдліс ывласö артмөм
розьöд.

— Он төр,— мышсяныс кыліс сійö.

— Видла.

И сэк жө көнкө неылын кыліс лыйсьөм шы. Сосновскийös
тайö нөшта на ызьөдіс петны керка пытшкысь. Перйис зепсыс
пистолетсö, чургөдіс кыкнан кисö водзö да юрсö суйис өшинь
розяс. Джоджсяныс йөткыштчис кокъяснас. Юрыс да пельпо-
мыс пырис розьö, но водзö кыссыны эз лэдз кынөмыс дай
паськөмыс кутіс. Сибдіс, өтар ни мөдар. Кокыс бовъяліс сынö-
дас. Ботинки нырыс муртса керка джоджас инмө.

— Кыскы бөрвыс,— горөдіс сійö Дерягинлы.

Но мөдыс сы ылы кивыль эз вартлы. Сійö кымынөдысь нин
мый вынсыс чужйис пыкөм өдзөсö. Та пөрийö пыкөдыс уси и
өдзөсыс гурийв воссис. Дерягин ырскөбтіс-петіс вөр керкаыс
да воськов сө кымын ылнаысь пыр жө адззис участкөвөйös,
сы бөрся локтысь зонкаяссö.

— Сувт!— горөдіс Петрович.

Но Дерягин котөртігмоз чургөдліс сылань пистолетсö да лы-
йис. Пуляыс жвинькнитіс, чилснитіс-розьөдіс пинджак соссö,
сатшис орчча пуö. Петровичлөн кыыс ас көсийтөг малыштіс
сойсö.

— Сулав, лья!— выльысь горөдіс сійө.

Сэсса бергөдчыліс зонкаяслань да тшөктіс кольччыны керка дорас. А ачыс кутіс вөтөдны пышйысьөс. И сэк жө кыліс лыйөм шы керка өшинь дорысь. Зонкаяс котөртисны сэтчө. Аддзисны Сосновскийлысь өшинь розьö сибдөмсö. Сійө мурзіс, зіліс мын-төдчыны нальксыс да шенасис пистолета кинас. Бим уськөдчис да пыр жө курччис кисö. Пистолетыс уси муас. Сосновский чорыда ёрччыштис. Васьö серөктіс:

— Ха-ха-ха, бандитыс ачыс налькйö пырöма.

— Вай көрталам ки-коксö,— вөзйис Данила.

Пырис керкаö, нетшыштис стен пөлөнын везнитлөм гез. Бось-тіс пызан выльысь пурт да вундіс гезсö кык пельö. Сэсса шур-шар көрталіс Сосновскийлысь кокъяссö. Петіс ывлаö, медем кисö көртавы. Но бандит эз сетчы. Öвтчис кинас, сьöласис да быдсяма пеж кывъяссö шуаліс. Васьö босьтіс өдзөс дорын туплясьысь майөгсö.

— Он кө ланьт, тайөн юр пыдөсад колска,— шуис Сосновскийлы.

Сөмын та бөрын сійө сетіс кисö көртавы.

— Öшав таdzi,— öвтыштис кинас Васьö, босьтіс бандитыс-лысь пистолетсö да суюыштис гач вөнъ костас.— Данила, вай котөртам Петрович бөрся.

Зонкаяс гөнитісны, чукөстісны Бимөс. Бура ылө нин пырисны вöрас. Бара кутісны кывны лыйсьөмъяс. Шыыс öтарö матыстчис. Тыдалö, лыйсьысысыс öти местаын вөліны. Васьö котөртис Бим бөрся да нөшта содтіс өдсö, горөдіс:

— Данила, эн кольччы, өдйөджык!

И сэк жө кыліс ойөстөм. Зонкаяс уськөдчисны ойзөм шы улö. Аддзисны, Петрович пуксьöма нитш ылө да кинас кутчы-сьöма веськыд пельпомас, садьсö вошталö. Дерягиныс лыйöма сылы да веськалöма. Ачыс бара котөртö. Водзын сылөн мышкыс тыдаліс на.

— Данила, тэ кольччы, көртав пельпомсö Иван дядьыслысь. Ме бандит бөрся. Бим, ме дөрö!

Данила перйис полевöй сумкаысь аптечка да пөрччөдіс Петровичөс, кутіс көртавы доймөминсö. А Васьö кыскис гач вөнъ костысь Сосновскийлысь босьтөм пистолетсö, чургөдіс ылө да лыйис сынөдас.

— Сулав!— горөдіс пышйысь Дерягины.

Аддзис, мый пышйысь кивыль эз вартлы сылөн горөдөм да лыйөм ылө, да заводитіс лыйлыны веськыда мышкас. Но эз веськав. Төдчис, мый том мортыс первойысь босьтіс киас пистолетсö. Та бөрын найö понйыскөд нөшта на содтісны өдсö.

Öні Дерягин эз нин вочасö лыйсьы. Сылөн помасисны патронъяс. Юрас вөлі сөмын öти мөвп — пышйыны. Колонияö веськавы эз көсйы. Котөртис веськыда, мый вынсьыс. Зіліс ылыстчыны, ыдждөдны костсö.

Друг вöрыс гежөдмис, а сэсса воссис кушин. Заводитчис шудөгса паськыд, юр воштан нюр. Дерягин нем думайттөг уськөдчис осьсаинас, нюрас, и пыр жө вöйис коскөдзыс. Ырскөб-тіс петны, но кымын пессис, сымын водзö вöйис. Кор Васьö Бимыскөд воисны сэтчө, Дерягинлөн вөлі юр пыдөсыс нин тыдалö. А здук мысти мыччысисны вабольяс. Тайөс аддзөм бөрын

Васьолы весиг эз ло лосьыд. Сьолөмыс гудыртчис. Коть мортыс ненога оліс, но татшөм туйпомыс вивті чорыд наказанньоон сылы кажитчис.

Косіс Петрович дорө. Данила доймөминсө көрталөма, но вирыс бинт пырыс сөдзтіс на. Петрович сьөкыда лолаліс.

— Кулас, дырджык кө оз воны,— Васьө индіс сы вылө.— Ме котөртла керка дорас, потшгяс сэн вөлі. Вөчам нөсилка да сы вылын петкөдам. А тэ сэк кості кыз росгьяссө кузьджыка чеггьяв.

Регыд мысти зонкаяс ас вөчөм нөсилка вылын ранитчөм мортөс заводитісны петкөдны вөрысь. Пөшти воисны участкөвөйлөн «уазик» дорө, кор паныдасисны РОВД-саясыс. А бөрсяньыс мыччысис санитарнөй машинаыс.

Зонкаяс лэдзисны нөсилкасө муас да уськөдчисны бурдөдчысьяс дорө.

— Спаситөй Петровичсө,— өтпырйө артмис налөн.

Бурдөдысьяс тэрмасьөмөн видлалісны ранитчөм мортөс, вөчисны укол да асланыс нөсилка вылын пыртісны машинаө. Кор вөрзөдчис, сөмын та бөрын зонкаяс заводитісны сёрнитны локтысь полицейскөйяскөд. Петкөдлісны налы Коля Майбуrowөс да сьөм мешөксө. Сэсся нуөдісны вөр керка дорө да индісны өшинь розын бовгьялысь Сосновский вылө. Васьө висгталіс, көні помасис олөмыс Дерягинлөн, да индіс местасө.

— А сьөмыс тані абу ставыс,— босгтліс киас Коля Майбуrowлысь мешөксө локтысь полицейскөй.

— Коляыс эз висгтав,— вочавидзис Васьө.— Колө Бимлы сетлыны, мед исалас да корсяс.

— Видды,— полицейскөй мыччис мешөксө.

Васьө босгтіс, чукөстіс Бимөс, сетіс исавны. Сэсся тшөктіс:

— Бим, корсь.

Понйыс пыр жө котөртіс керка дорө. Сэсянь — веськыда вожа джуджыд пожөмланы. Воис да заводитіс парсавны нитшсө. Васьө вешгыштіс нитш палаксө да перйис нопсө.

— Со кытчө дзеблөмаөсь!— горөдіс сйө.

...Друггяс воисны гортас рытладорыс нин. Виччысисны, кор пергясны розгсьыс Соновскийөс да йөршитасны машина мышкө, кор гижасны протокол да кырмөдаласны. Петкөдлісны, көні тшапнитісны Майбуrowөс. Полицейскөйяс ставсө снимайтісны. Васьө сетіс Сосновскийлысь мырдгөм пистолетсө. Сөмын та бөрын мөдісны туйө. Полицейскөйяс зонкаясө вайисны сиктө ас керка дорөдз. Кыкнанныслысь кутлісны кисө да атгөалісны бандитгясөс кутігөн отсасгөмысь.

— Награда вылө вөзгьям,— көсйысис ыджыдыс.

— Петровичыс жаль,— шуис Васьө.— Сйө пенсия вылө петны виччысис.

— Эн шогсьы, бурдас,— вочаасис полицейскөйыс.— Ме звөнитлі нин больницаас. Вөчөмаөсь операция. Ставыс лючки-ладнө.

Данила висгталіс бать-мамлы Шудөг туйвивса лунся лоөмторгьяссө. Вөзйысис кольчывны регыдик кежлө Васьө друг дорас. Но мамыс, кор кыліс лыйсгөмгьястө, тшөть моз паныд сувтіс.

— Некытчө, лэгчам өглаын. Кольчөм йылысь сёрни оз ло!

Мөд луннас асывсяньыс гортсаяс заводитісны лөсьөдчыны

туйö. Данила шогпырысь юöртis друтыслы, мый эз лэдзны кольчыны, медсясö мамыс паныд сувтis.

— Миянлы сёр рытнас нин звöнитisны полициясянь,— воча шуис Васьö.— Талун тэа-меаöс корöны юрсиктö. Регыд машина-ыс миянла воас. Тшöтш лэччам.

— Миян талун жö лэччöны, батьö сöвтчö нин.

— Виччысьласны, эштас да тэ карö лэччан, а менö бөр ас сиктö ваясны.

Муртса таdzi другъяс сёрнитisны, мыччысис полицейскöй машина. Данила котöртis гортас, висътасис. Батыс кöсйис виччысьны сийöс юрсиктса изэрд вылын.

Зонкаяслысь, воисны РОВД-ö да, бара на выль пöв ставсö юасисны. Аддзысьлисны найö РОВД-са начальниккöд. Весиг теле-видениесянь волisны да снимайтisны. Сэсса пуксьöдisны машинаö да нулisны больницаö. Пыралisны Петрович дорö.

— Бур, мый эз имит Петровичыслы гимньöвйыслөн сус пуас лыйöмыс,— шуис Данила, кор петisны больницаысь да воисны юрсиктса изэрд вылö.

— Но век жö ранитчис.

— Бурдас öд. Öнi и пенсия вылас лэдзасны.

— А-а.

— Васьö,— Данила сюся видзöдлis друтыслы синмас.— Та бöрти тэ кöсьян на полицейскöяс велöдчыны?

— Ёнджыка на кöсья.

— И ме ог веж ассым кöсйöмöс, лоа энергетикөн.

— Но, а ковмас кö меным бандитъяссö кутны, он öмöй öнiя моз жö отсав?

— Отсала кыв шутöг,— Данила нюжöдis кисö.— Аддзысьлытöдз, виччысь, ме вола на.

Сийö котöртis батыслөн «Жигули» дорö. Бөръяысь друтыслы öвтыштis кинас да пырис кабинаö. Васьö кольöдis найöс синнас, кытчöдз эз саявны.



Кык висът

Вөрпунктса турун карысыяс

Вөрпунктлөн жырыйн кыліс шум-зык. Весиг кильчө водзас куйлысь еджыд гона пон пельсö чошкөдөмөн видзөдіс кантора өдзөс вылас. А пытшкас Матрёна Михайловна лыддьөдліс вөрпунктса веськөдлысьлы, кымын тонна турун индөма заптыны таво гожом Косланса вөрпунктлы.

— А коді нө тайö вöчны пондас? Тэ да ме али мый? Кызь тонна, абу шутка! Төвбыдөн вөвъяссö мыйöнкö вердны колö!

Но Иван Савельевич, кинас өвтчиг, зіліс ланьтöдны ОРС-са начальникöс:

— Но, вай жö спокойя сёрнитам, спокойя, спокойя! Öти-кө, джын уджалысьыс менам отпускынöсь, а мөд-кө, мукöдыс улыс вөр складын, ремонтнöй да стрöйтчан уджын. Со и артмө, мый некодöс меным мөдöдны турунтö карны! Дерт, поэяс кык-куимöс лун кызь кезлө командируйтны, но коді сöгласитчас? Вот ку-тшöм делöйс!

Лэчыд кывъя нывбаба водзö дорйысис:

— Тэ, Иван Савельевич, менö эн бөбйөдлы — веськыда кө шуны, тайö тэнад мог, а абу менам! Поэяс и мөд ног вöчны — йөзöс он сет, ме гига докладнöй да мед сэні, «вылын», решай-тасны, мый водзö вöчны! Меным нө мый?

— Михайловна, тырмас! Дугды!— сьöкыда лолыштис вөрпунктса начальник.— Кодөскö корсям. Вай коркө рытнас нöшта-ысь чукөртчылам да артыштам и уджалысьястö, и смета, и кад...

— Ладнö, пасйö, Иван Савельевич,— дөвöльпырысь шуис нывбаба.— Могыс өд миян öти, ачыд бура тöдан. И нинөм тані юксьыны. Меным пöра складö мунны, талун уна груз вайөдасны.

ОРС-өн веськөдлысь тэрыба петіс жырыйсь, а вөрпунктса начальник кутчысис юрас.

Кык-куим лун мысти турун пуктан бригадаö пырысьяс сула-лісны кантора водзын, көні Иван Савельевич вом мудзтөдзыс такөдіс найöс:

— Турун заптыны — сійö абу вөр пөрөдны... Август төлысь помөдз колö кызь тонна пуктыны! Бригадирөн тиян со — Иван Андреевич! Будьте любезны, прошу любить и жаловать, кыз шуасны. Колана көлуй да сёян-юан — машина кузовын, а куран-литовка быдöнлөн асланыд. Правда, ном лекарство зэв этша, сөмын литра. И войт эн лысьтö юны — отравитчанныд! Гашкө, юалөм эм? Но, абу кө, абу. Нöштаысь на кора, медым план эштөдінныд ас кадö! А öні кырымпастö пуктö аванс ведомостьö да босьтö дас шайтөн бухгалтерияысь!

Бөрьяпомыс мунысьяс кавшасисны «Зил» кузовö да машина, тшын-бус кыпөдіг, лыаа туй кузя вөрзис лөзалысь пармалань. Лун шөр кадөдз лои турки-тарки мунны. Коркө воисны жö Мадмас ю бердö, ректісны-новлісны көлуйнысö неылын сулалысь пывсян-керкаö. Но татысянь на турун пуктан местаөдз колö вöлі шлопкыны-мунны квайт верст гөгөр...

Бригадир Ёнь Вань, кодї бура тѳдіс став гѳгѳринсѳ, спокоя вѳзйис:

— Но, войтырѳ, татчѳ колям лишнѳй кѳлуйнымѳс да сѳян-юансѳ. Тѳчалам мешѳкъясѳ, ѳшѳдлам йиртѳ*, мед шыръяс эз пакѳститны. Войсѳ танї узям. Ёні пусям да лѳсьѳдам, мый аски колѳ нуны сѳѳраным, а сѳні, Кывѳр-вожын, ковмас узылыны кык вонйын. Вот так!

Некод паныд эз шыась, сѳмын Микѳл Миш шуткуйтыштіс:

— А ме бара дась кѳть кодзувкоткарын узылыны, сѳ грамм кѳ кисьгыштаннуд. Со мудзи да нбылѳдї кок коласѳдз, а «пасибѳ» шуны некодлы. Гашкѳ, первой пасйыштамѳ мѳстаѳ воѳмнымѳс?

Сы здукѳ югъялысь плѳшка медся арлыда Емен Ёнь тапкис кинас Мишлы пельпомѳ да кашкис:

— Тѳ, Мишѳ, эськѳ варов морт, да вай жѳ талун пусьысѳн лоан, а ми мукѳд уджъястѳ вѳчам. Борис Пѳтап тѳныд отсалас пес-ваѳн...

Выргис «Дружба» бензопила, сотчис-трачкѳдчис бипур, кыліс керасьѳм-тотшкѳм шы, вуджрасисны ноксьысь войтыр, корсьюрѳ гора сѳрни да гылыд серам поткѳдїсны сынѳдсѳ...

И со пажнайтан кад. Тшынасьысь бипур гѳгѳр, пилитѳм чуркаяс вылын, пукалісны сизим мужичѳй: и арлыда, и том, и уска, и устѳм... Налѳн югъялысь синъясын тѳдчис радлун. Томъяс, Володь, Коль да Борис, ырскисны пѳсь чай, а Вѳча, Вань, Миш да Емен Ёнь кисьталїсны асланыс дозмукъясѳ мѳд юантор.

— Мед Енмыс сетас миян бур поводдя да ставлы дзоньвидзалун!— шуис дженьыдика Ёнь Вань да нбылыштіс курыд ва. Сы бѳрся и ѳртъясыс гулькнитїсны.

Сѳсся вѳр пѳвстѳ воысьяс берегса чулькаинѳ, пуяс костѳ, лѳсьѳдїсны узылан вонъяс, зудъялісны литовкаяс да заводитїсны ытшкыны. Тадзи Кывѳр-вож ю бокын вѳссис турун пуктан страда.

Дзизгис ном-лѳдз... Вазьѳм паськѳм ѳвтіс нбылѳмѳн... Володь да Коль сѳтшѳма зїлісны, мый бура унаысь тшокйисны литовка-ѳн муѳ да ытшкисны весиг лежнѳг-бадь кустъяс. Но тайѳ нинѳм на, но кор Борис сатшкис пипуѳ — литовкаыс джынвыйѳ лямсис.

— А сѳ матьѳ, тѳ нѳ мый каран?— скѳра горѳдїс Емен Ёнь дѳд.— Сѳ лѳшакѳ, он кѳ куж косанас вѳдитчыны, висьтав, а эн йѳйтав! Тыпу! Зо, эмѳсь жѳ миян пѳвстын бѳлванъяс!

— Да ме, Ёнь дѳдѳ, ѳлышті да мѳдарѳ швальснитїс литовка-ыс,— кѳсьис эськѳ сусьыны том мужичѳй, сѳсся юрсѳ увлань лѳдзѳмѳн содтіс.— Ме веськѳда, веськѳда, дорсѳ тачкѳда ачым, эн маитчѳ. Но, мыйыс оз овлы да...

— Дугды больгыны, ѳлукѳ!— зыркнитїс Емен Ёнь.— Вайлы меным литовкатѳ, веськѳдысь! Танї дорны выль пѳв ковмас, тужас кѳ на. Но, пиѳ, абу кѳ морттуйыд, сїдзкѳ, оз ло и водзѳ былѳ!

Дѳд босьтіс нюкыльтчѳм косасѳ да мыччис асьыс:

— На-а! Тайѳс кѳ торкан — юртѳ керала!

И Емен Ёнь веськѳдчис вонъяслань. Здук мысти кѳнкѳ водзын кыліс горзѳм.

— Ош, ош! Эстѳн, эстѳн ош!— синъяссѳ шармѳдѳмѳн котѳртіс чуймѳм ѳртъяс дорѳ Коль Миш.— Эстѳн ош! Менѳ чуть эз косявлы! Вань ичайѳ, кѳні ружьеыд? Колѳ лыины, пасьвартас миянѳс!

* Йирт (диал.) — керка йирк.

— Кодёся горзан? Ланьт!— өлөдіс ёртсө Ынь Вань.— Ошкөд сёрнитны колө, а оз пышъявны да карзыны. Сійө ачыс тэысь повзис. Татшөм пөраө ошкыд оз матыстчы морт дорө, мый сэн йөйталан?

— Да сійө сувтис бөр кокъяс вылас да мелань көсйис уськөдчыны,— долис ассыйс повзём мужичөй.— Збыль, збыль! Татшөм ыджыд ошсө эг на аддзыв!

Воча шыөдчис Сивков Веча:

— Мишө! Кор мөдысь паныдасян, первой копытчыв ошкыслы да шу: «Здорово, дядя Миша! Ме тэнад тьозка! Кыдзи овланывлан?» Сьөрсыйд кө выйим нянь тор либө кампет, быть мыччы, гашкө, сэки тэнө оз чашкөдлы...

Ставөн сералисны, а Миш өвтыштис кинас:

— Со, со! Ачыд медводз петкөдлы, кыдзи ошкөд здорovайтчыны, сэсся вөлисти ме...

— Но, ладнө, войтырө, нөшта час кымын ытшкысям, а сэсся өбедайтны пөра,— шуис бригадир да индіс Мишалы.— А тэ талун, кыдз дежурнөй пусысь, вай жө өні сёян дасыты, асы, Кольыс отсалас бипур пестыны да мый да вөчны...

Трачкакылысь бипурлөн сук тшыныс вочасөн өшйис вөр ю весьтө. Сьөдасьом пөрт да пым чайник дзизгисны, а пусысь сьылігтыр ноксис би дорын.

— Кольө, нолы видзөд, мед шыдыс оз киссьы,— виччысьтөг шуис ёртыслы Миш да ачыс тэрыба усыйсис пуяс сайө. Недыр мысти небылн кыліс сьөкыда ымзөм, а сэсся гораа «Ой-йө-йө!»

— Мый сэні, Мишө, каран?— шыөдчис Коль.— Чужтан али мый?

— А-а-а-а! Паситө! Паситө!— Мишалөн повзөдчана гөлөсыс чуймөдіс ытшкысьсысясөс, кодъяс уськөдчисны бипур дорө да пондісны юасыны шөйөвошөм Кольлысь:

— Мый нө лоис? Көні нө пөварыс?

А мөдыд из моз сулалө да кыкнан кинас чер кутө. Сэки пуяс костысь ёртъяслы воча петкөдчис Миш, коді өти кинас кутіс усьөм гачсө, а мөднас өвтчис чушканзі котырысь. Кыліс: «А-а-а!»

Ставөн уськөдчисны коді кытчө, медем сөмын дзебсьыны-а. Отнас Володь мыйлакө эз котөрт некытчө, а бруткысис орччөн сулалысь коз горулө. Коньөр Миш чеччаліс-йөктіс да гораліс бипур дорын сэтчөдз, кытчөдз кокнас эз кышав шыд ведра.

Ру сора сьөд тшын кыптис пу йывъясөдз. И виччысьтөг гөгөр лөнис. Ёвтис чишкасьөм дукөн, тушёнка яйөн, ымраліс кольөм өгыр, дзизгис путкыльтчөм пөрт...

Брезент кышөд улын ымзіс дзебсьөм пөвар. Зык-шум вылад пондісны чукөртчыны и турун пуктысьяс. На син водзө сувтис жугыль серпас. Емен Ынь дед видліс дойяса Мишөс да шуис:

— Та-а-к! Квайт гөрд жмыльк. Дерт, ог төд, кымын козин тэчисны чушканзі «ёртъясыд» небыдінад, но өні пыр жө колө көтас пуктыны доймөминъясө, а бурджык — небзьөдөм коз сир. Мишө дай Мишө, век тэкөд мыйкө лоө. Ветла, перья сир торьяс да вая, а тэ көть гачтө кыпөд, а то йөз серам! Эттөс, чушкысьяс поз вылө пуксьөмьд...

— Ынь дедө!— матыстчис олома морт дорө Коль.— Менө, асы, чушкисны жө сөтанаясыд! Кык жмыльк кийн.

Емен Ынь нюмдіс:

— Но вот, медводдза «боевой крещение» прөйдитінныд, шель «кычангъяс». Небось тай, кокныд шедіс чушкыльсьыд.

Ызöбтіс серам, а сэсся ставöн мöдісны ноксыны: коді выль пöв пусыны, коді литовкаяс дорны, коді вонгъяс тшынöдны номйысь, коді коз сир перйыны.

Бöрти, пöттöдз сёйöм бöрын, мужичöйяс дöвöляпырысь ляскысны вонгъяс пытшкö шойччыны. А Борислы тшöктісны мыскыны тасьті-пань. Том морт тэрыба лэччис ёль дорö, нетшыштіс кабыр турун да кутіс зыртны ведрасö. Дзизгис ном-геб, но Борис зія солькöдчис ваын. «Мый-а сэні?»— юрсö бергöдöмөн чöвтліс синсö вавывса кытшгъяс вылö зон. Здук мысти бара кыліс бульснитöм. «А-а? Тайö жö чери чеччалö!»— воис Борислы юрас. Сійö лов шысö кутіг воськовтіс берег пöлөн больöдчысь кытшгъяслань.

И збыльысь, югыд ва пытшкын вераліс ком кельöб. Мужичöй бөр косіс, кайис ёртгъясыс дорö да тіралан гөлөсөн висьталіс:

— Ёлын ком стада! Со эдатшöмöсь! Честнö, ог пöргъясь! Колö кыйны кыдзкö, а гашкö, пищальысь лыявны?

Сэтчö Володь и вочавидзис:

— Гачтö пöрччы да тывйышт.

— Да мый сералан? Ме збыль висьтася!— дöзмискодь Борис да öвтыштіс кинас:— Мунö видзöдлö, он кö веритö...

— Но ладнö, вай ветлам, петкöдлы,— Веча петіс вонсьыс.— А öд и збыль вермас лоны, мый аски чери яй пондам сёйны, а ог тушёнка.

И сöмын сир лякөсьяса Миш куйліс чöв да корсюрö ымзіс, а рытнас сълөн кыптіс жар. Но шонді пуксьöм бöрын, кор воисны ком кыйысьяс да петкöдісны сылы сизим лов, висьысь другөн ловзис. Сюсь да шмонитысь мортыд весиг корис ёртгъяссö, медым бипур вылын пöжисны сылы öти комсёкат.

— Да öд, Мишö, неважөн на ми öтлаын выя рок сёим?— дöзмöмпырысь крапкис Веча.— Вай асывнас нин черинас ноксям.

— А бур йöзö, слабми, эбöсö дзик бырис,— артист моз пондіс чукрасьны Миш.— А öд меным яндзим лоас, кор ті уджавны, сир ныылöм кыстны кутанныд, а ме тані, вонйын, куйлыны мöда. Чериыд öд вын сетö. Ме кывлі, мый и фосфорыс быд гагйөн курччöмысь бурдöдö морттö.

Няргöмсьыд бригадирлөн небзис сьölöмыс:

— Зо, мед мортыс ачыс пöжас черисö да сёяс. Дерт, гашкö, и бöбйöдлö миянöс, но аски сылы быть уджавны, тані абу больнича. Сёй, сёй, Мишö, пöж кöть пу черисö.

— Ха-ха!— вак-вакөн серöктіс Емен Öнь дед, весиг юрсö довкнитіс.— Кужан жö тэ йöзсö бöбйöдлыны! Ак, кыдзи кужан!

— Менö чушкисны жö, меным черисö колö жö сёйны,— дзурс суйсис сёрниö Коль, весиг морöсас вачкыштіс.— Поспорыс колö, асы, слабмыны понді чери кыйöм бöрад.

А сэсся асьныс жö и гигзыны кутісны. Дерт, Миш да Коль эськö сёрöнджык чöсмасисны чериөн, «фосфортö» асьлыныс босьтісны. Зато аскинас öтывывса сёйöмысь кыкнанныслы лои сöмын лыяссö вильöдны. Но, мый вöчан... Лöгавны вöлі некод вылö.

А водзö, кык вежалун мысти...

Жар поводдя прамöя нюкляліс пуктысьысь войтырöс, сынöдас

өшаліс лыс сир дук, өвтіс кос турун көрөн. Томджык войтыр мудзисны, эбөснысө воштисны. Да и пөрнөй мужичөйяс дөнзины өти и сійө жө быдлунъя уджысь, нөшта ном-лөдз дзизгөм-курчча-сьөмысь...

— Иван Андреевич, гашкө, талун водзжык помалам уджсө, а то зэв жар,— норасис Миш.— Сэсся ог вермы, ньылөм шорөн киссьө... Войнас кодзувкотъяс нятшкөны, луннас лөдз вийө. Пыкті нин курччалөмъясысь.

Бригадир нюмдыштіс да горөдіс:

— Бур, бур эськө да, но вай жө медводз эштөдам тайө эрдсө, чөвтам сабрисө* да сэки дугөдчам.

Час кольөм мысти уджалысьяс шлопкисны-мунісны ю бердті кывтыдлань. Емен Ёнь дед буркнитіс:

— Тэ, зо, Мишө, дядьдыды век няргөдчан, мөдыс сэсся тэнө и жалейтө. Позис өд нөшта на куртны.

Ас оланінө воөм бөрын кодкө пыр жө пласьткысис вон пытшкө, а арлыдаджык мужичөйяс ноксисны бипур гөгөр. Веча пусис, ёртъясыс отсасисны сылы. Ыджыд ведраын булькъяліс важ моз нуръя шыд. Яй дукөн өвтіс ныр-вомө, кодкө весиг азыма апайтіс сынөдсө синъяссө куньөмөн.

— Ақ, сэтшөма көсья сейны, сювъясөс нин рушку пытшкын гартыштіс,— эз кутчысь Коль да кынөмас тапкөдөмөн водзө ызгис:— А өд вөр-ваын менам аппетитөй содө кык-куим пөв... Бура кө уджалан, бура и сейны колө...

Регыд ставөн пукалісны пу чуркаяс вылын да шыөн лупсуйтісны чөскыд шыд. Дөвөль сералісны, өта-мөд вылын гораа шмонитісны. Коль гусьөн чөвтіс Борислөн шыд тасьтіас ичөтик гузей-өс**. А кор мөдыс казяліс татшөм «гөстинечтө», повзьөмысла шыбитіс тасьтісө бокө, а сэсся ваксьөмөн шуис төварышыслы:

— Медлым, коркө и ме тэныд дивөтор вөча! Энлы, энлы, воас кад. Казялан на.

Та бөрын йөз дорө шыөдчис бригадир:

— Но, бур войтырө, пөра и пывсьыны. Регыд тойөссям. Аски лэччылам Мадмас пывсян-керкаө да бура и орссям, а бөрсө нөшта сөян-юан на ваям. Но, коді көсйө?

— У-ур-а-а!— радлісны том мужичөйяс да пондісны кокнаныс зымкнитывны, а Емен Ёнь, Ёнь Вань, Веча да Миш сералігтыр водзө ыззьөдіны найөс.

Но медыджыд радлөм артмис сөмын на кык вежон мысти, кор турун карысьяс юралісны-чөвтісны медбөръя зорөд.

Колисны вояс... Важөн нин тупкысис вөрпункт, пырзисны пуйасөн вөвлөм турун каран ректасъяс, нөшта на ляпкаліс ичөтик Кывөр-вож ю, бырисны и медводдза турун карысьяс. Владимир Иванович кындзи, коді өніөдз на помнитө ставсө. Гашкө и, нинөм ыджыдтор тайө висьтас абу, но быд мортлөн сьөлөмө да юрө кольөны ас оломсьыс кутшөмкө да кутшөмкө казтылөмъяс. Колины тайө казтылөмъясыс и менам, коркөя кадын турун карөм йылысь...

* Сабри (диал.) — зорөд.

** Гузей (диал.) — лёкгаг, дзодзув.

Тешкодъ вöралöм

Войнас лымъялис. Арся пемыд асылö гараж бокрын кодкö муркöдчис-ноксис, тэчалис «УАЗ» машина гыркö нопъяс да кöлуй. Эргис-уджалис моторыс, биару петан трубаыс пушкис сьод тшын. Машина дорö регыд локтисны уска-тошка нöшта кык мужичöй.

— Эй! Вöралысьяс!— горöдис кöзяин.— Ме нин мудзи тиянöс виччысьны. Давай пырö машинаас, да мöдмö. Регыд югдас, а туйыс кузь.

И со Вань Öнь, сылөн Саш пиыс да Сандыр Петыр недыр мысти, лым бус кыпöдиг, тöвзисны нин Бобровскöй туй кузя. Другыс куньтырасыс Петыр быттö палялис:

— Öй-йö-йö! Войтырö, менам тай сёян-юана ташка пыдди капкан тыра кöлуйöс босьтсьöма. Сё лешак!

Сылань нюмъялигтыр бергöдчис Саш:

— Нинöм, нинöм, Петыр дядьö, свежöй лыскыс уна. Ме тэныд сов сетышта, тшукъялыштан лыс емсö чукчи моз, лым ва сорөн! А миян сёян-юан сöмын кык вылö батьöкöд. Дерт, картупель кыш да вильöдöм лы сетам. Мед тшыглы эн кув, а сэсса, пöжалуй, нинöмөн чöсмöдны.

— Тэ, Петырö, эн маитчы, ташка тырыд кö капкан. Талун тэчан найöс да аски звер кыян — вот тэныд и сёйöд,— дзебис нюмсö Вань Öнь.— Да ладнö, эн öбижайтчы, миян сёяныс тырмас быдса вежон кежлö.

Машина таркöдис водзö лымйөн тырöм гуранъястi да виччысьтöг сувтис-джöмдiс.

— Мый нö лоис?— юалис Петыр.— Ме öд висьтавлi тиянлы, мый тшыкöдасны миянöс. А тi ваксянныд.

— Мый-а тайö?— чуймöм Вань Öнь кыпöдис машина нырыслыс кöрт вевтсö да мöдис зунясьны пытшкас.— Быттö ставыс лючки-ладнö да, мыйын нö помкайс?

Петыр бара клапнитiс пидзöсас:

— Миянöс Парась баб адзылис вöрзытöдз. Куимыс сьöлыштiс машинаас. Сийö и тшыкöдис! Дуль туйыс век на тöдчö кузов вевдорын.

Кутшöмкö кад мысти кöрт вöв «ловзис». Унмовсьöм Саш шаргöдис синсö да видзöдлiс кыин новлан часi вылö:

— Эй! Сöкöльяс! Öкмыс асыв нин, дзикöдз югдiс, а миянлы, гашкö, кык час на туныгыны вöр керкаöдз.

— Туяд быдтор овлö,— воча шуис батыс чакыль ныра пиыслы.— Тайö кöрт ёкмыль, а абу рыжöй кöбыла.

Важиник «УАЗ» турки-тарки писькöдчис лымъя туй кузя пыр водзö и водзö. Джуджыд кыр вуджöм бöрын Петыр виччысьтöг öвтыштiс кинас да горöдис:

— Öньö, сувтöд, сувтöд! Тонö байдöг пуксис туй бокас.

Здук мысти Петыр да Саш кык ствола пищальясөн ньöжйөн ник петисны машинаыс да лов шысö кутиг мöдöдчисны байдöглань.

Öнь дөнзис виччысьны. Пищальыс эз вöв, да босьтiс кинас кöрт зыр, а мый лешакысла, и ачыс эз тöд.

Друг Петырлы син улö усис лымъя мыльк йылын лэбачлөн

мыгöрыс. Грымöбтис лыйöм шы. Байдöг качлис вывлань да тювкнитис-лэбзис понöль улö. Петыр уськöдчис сы бöрся, но крукасис шергöдчöм вужляö, бускысис чужöмнас кын муö. Очмунöм бöрас сöтыштис-маткыштис да горöдис:

— Сашö, мелань лок, байдöгыс тані, пони коз горулын! Кутны колö.

Саш сьöкыда пошкигтыр котöртис ёртыс дорö, отсаліс сувтны кок вылас да юаліс:

— Мый-а, көні нö байдöгыс?

Петыр тіралана гөлöсөн вочавидзис:

— Асы, эстöні дзедьсöма. Вай ме таладорсянь локта, а тэ мöдарсянныс. Лыйны кө, зэв матын. Дрöб зарадыс чашкöдас пöткасö. Кутам либö кучкам. Давай!

И збыльсь, кор Саш матыстчис понöль дорö, лыска вож улысь мыччисис байдöглөн юрыс. Зон кыкысь удитис кучкыны пищаль стволөн, но винёв лэбач тювкнитис Петырлань. А мöдыдлөн тырмис тай сямыс: шеныштчис да мый вынсьыс крапнитис-вартис пищаль лöжаөн. Эк! Но эз инмы, а лöжаыс пищальдылөн кратшкис-чегис. Байдöг повзьöмысла уйкнитис-лэбзис пуяс сайö...

— Да-а,— чуймана нюзöдис Петыр да пуксис лым былö.— Кöртгысь али мый байдöгыслөн сюрса лыыс вöлöма. Сё лешакö!

— Но, кутін бöжöдыс?— гылыда мöдис серавны Саш.— А пищальыс öд батьöлөн.

Сы кості туй вывсянь Öнь горöдис:

— Локтö, петкöдлö кыйдöстö. Таво байдöгсö эг на аддзыв. Сэсся водзö мунны колö.

Петыр жугыля петіс туй бокö да мыччис чегöм лыянсö.

— Андрей Иванович! Эг öд нарошнö пищальсö жугöд. Прöстит, сэсся киö ог босьталы...

Падмöм Öнь тувкис сылы көрт зыр да шлопсьöдис-муніс машина дорö.

Тадзи куим вöралысь öти дзонь пищальөн и вöрзисны водзö.

— Батьö, а тэ нö мыйла зырийөн петалін туй вылас?— здук мысти юаліс Öньöлысь пиыс.

— Мыйла, мыйла? Мед тіянлы отсавны. Гашкö, мися, ранит-час кө пöткаыс, кучкыны слöйма да,— веськыда вочавидзис батьыс.

— Ха-ха-ха!— ставөн гылыда серöктисны, а Саш содтис на:

— Но ладнö, ме том, а ті уска-тошка «öкрупеньяс», вöрса лэбачöс кутны да кучкыны көсийинныд: öтик пищальөн, мöд — көрт зырийөн. Сямныс!

Лун шöр кадö кымын куим ёрт воöдчисны жö колана места-öдз. Öнь ломтис вöр керка пач, а Петыр ывлаын пестіс бипур. Регыд мысти мужикьяс лупсуйтисны нин «бич» пакетьясысь пуöм сёян.

— Да-а, тайö абу чукчи шыдыд,— горзьöдис Петырöс, да сі-йö пунктис паньсö.— Шань, пöті. Нöшта кө вежон татшöм сёянтö понда нямны, ачым «бичуганөн» лоа.

— Зато öддьö позьö дасьтыны,— воча шуис Öнь.— Ме вöр-ваын тшыгьялөмöс веқджык тадзи веськöда.

— Ага! Сэсся мыт босьтас да куим лун котралан,— чепöльтис пиыс батьсö.

— Зо, дугды, сэтшöмторйыс öтчыд коркö и вöлі,— чукиртліс

чужомсö Ёнь.— Носкийöй усьöма шыд пöртйö да пöжсьöма яй пыдди. Шыдсö быдöн кисьтыны лои, мыйта сёян бырöдi... Öт-пыръяён!

— Тэ тай, Андрей Иванович, сыысь и ёнмöмьд,— гирзыны кутiс Петыр.— А нямöд кө пöртъяд усис? Сэки эськö эз куим лун, а быдса вежон кынöм пыштö гудрöдiс.

— Энлы, видзöдлам, кызди аски пусян,— чуньсö чургöдiс Петырлань Ёнь.— Пищаль жутöдiн, сёян-юан гортад вунöдiн... Пищальыс став вылö öтик колис. Аски ми Сашкöд вöравны петалам. Тэ вай керкаас кольччы да пусы.

— А öнi, дзик пемдытöдз, гашкö, кытшовтам матигөгөр вöрсö?— юалис Саш.— Көть видзöдлам, эм-ö кутшöмкö звер-пöтка.

— Вай нö ветлам,— довкнитiс юрнас батыыс.— Вöчам со кызди: ме важ лежнёвкаöдыс машинаён нюрланьыс лэчча, а тi кыкөн нюр пöлöныс мунöй да сэсса ме дорö петанныд. Öбиднö, мый пищальтöм лoa, другысь ловъя лов паныдасяс?

— А тэ, Ёньö, көрт зырийён!— серöктiс Петыр.

— Серав, серав, аски ме тэ вылын сералышта жö,— нюмъявтiс ёртыс.

Регыд вöралысьяс петiны туйö — кодi подён, а кодi машина-ён. Но радлыны вöли немторйысь. Пуяс костын тöдчисны сöмын шыр, ур, сьöдбöж да көч кок туйяс. Көнкö енэжын броткис-крумскис öткөн лэбалысь сьöд кырныш, быттö нарошнö дöзмöдiс вöрö петысьясöс.

— Мун сэтись, сьöд шева!— кинас öвтыштiс Петыр мустöм лэбачлань.— У-уф! Весиг паськөмöй вазис, ньылöдiс дзикöдз.

— А мый көсьян, асы, лымъя нитшкас сапөгъяс вöйласьöны,— эляис Саш, кодi пищальсö чургöдöмөн мунiс пуяс костöд.— Весиг сьöла некытысь оз жбыркнит. Дивö тай!

— Энлы!— чошкöдiс пельсö Петыр.— Көнкö водзын машина шы кылö. Тайö Ёнь! Мöдiм, сийö көнкö орччөн.

— Кыла, кыла. Тыдалö, батыö мянös корсьö,— шуис Саш да лола моз öдöбсис посни козъя вөр пыр.

Вань Ёньлөн «УАЗ»-ыс сибдöма, вöлөмкö, няйт гуранö. Бөрö ни водзö мунны оз вермы. Лои чегъявны пу вожъяс да тэчны найös көрт вöv улö. Матъкөм сорөн да Ен отсөгөн шедöдiс жö коркö сьöкыд машинаыд. Сэсса кызкö-мыйкö воисны вөр керкаöдз, пырисны пытшкас.

— Ö-ой! Кокъясö пуоны!— пöлатьö лажгысьöм бöрын броткис-норасис Вань Ёнь.

А Сандыр Петырös узыланiнöдзыс кокыс эз ну — пласьткысис джоджö. Көсийс эськö мыйкö шуны, но мортыдлөн сöмын артмис рочөн: «Пи-и-ть!» Зато Саш няргытөг горша ньылыштiс сьöдöдöм чайникысь көдзыд тшай. Недыр пошиктiс да та бöрын ва тыра пöртйысь гумовтiс кружкаясö ва, мыччис куйлысьяслы:

— Юыштöй, дона войтыр, вежа васö, вынтö содтöй,— да петiс вөр керка пытшкысь.

Здук мысти Саш бөр пырис, ва тыра ведраён нин. Тыртiс кушмöм чайник, тэчис пачö пес, сямöдö би чуткис.

— Батыö, Петыр дядь! Дыр на туплясьны кутанныд?— гораа шыöдчис сийö.— Вот, вот! Асьныд жö шуткуйтiнныд, мый «бич» пакет сёйöмысь регыд «бичуганъясөн» лoaд. Дзик сiдзи и эм: няйт сапөг-паськөмөн куйланныд, мыссытöмöсь, ружтанныд. Нач вöрса бичьяс!

Саш кутчысис кынёмас да пондіс гораа серавны. Серам-горзёмнас дзикодз шызьодіс керкаын куйлысьясос.

— Но тэ, Сашо, лёк морт! Эн и лэдз прамоя миянлы шойч-чыштны,— чеччигмозыс дудгиг шуис Петыр.— Ми арлыдодз овлан да сэки казялан ассыд морттуйто.

Сэтчо на и батыс содтіс:

— А мый нө сылы. Сөмын гирзыны-серавны кужо.

Дыркодь на óta-мод вылас шмонитісны куим вөралысь. Мёдым кызкө мудзсө вунодны да ловнысө кыпыдлунөн тыртны. Тадз и колялісны рыт помсө, турун коръя тшай юигмоз.

Асылыс пуксис букаш, пөльтіс көдзыд төв. Гөгөр шувгисны пашкыр тугана пуяс, а вөр керкалань пөлөстчөм пожом сэтшөма дзуртіс, мый бипур дорын пукалысь Оньлөн весиг пиньыс висьмис.

— А сё сюрао, пач да рач, пасьталөма розя гач!— ки пыдос-нас бан боксө кутіг Онь тэрыба пыраліс керкао да петкөдіс пляжка.

— Эг көйы эськө вөрзёдны курыдторсө, да быть,— чукрасис Онь.— Пөшти во чөж ташкаын кыскалі. Пиньос дзик поткөдны мөдіс, вай юыштам. Көні тіян кружкаясныд?

Петырлы кыкысь шуны эз ков: шур-шар чепөсйыліс керка пытшкө, вайис тшөтш кильки банка да нянь шөрөм.

— Батьо, меным эн кисьты, ме ог ю,— өвтыштчис пиыс да водзө пондіс юкавны пес.

— Он кө ю, некод вомад оз пөрөд,— воча шуис Петыр да нюмдіс.— Кывзы, Оньо, а мый нө төрыт мудз вештөм ради эн чолькнит? Но тэ и мудер руч!

— Ставсө колө ас кадө вөчны,— велөдана видзөдліс Онь Петыр вылө да ыджыда лолыштіс.— Төрыт кө юим, талун эськө нинөм лоис кисьтнытө. Оні кө курыд васө ставнас джагөдам — аски кежлө нинөм оз коль... Абу өмөй сідз? Эк, тэ! Курыдторсө ме өд видза бурдөдчөм ради.

— Э-э-э! Менө эн убедит! Нылыштны колө сэки, кор лолыд корө, сёлөмсянь. Сідз өд?— зудгис-шуаліс Петыр да төдысь морт моз содтіс:— Тайо туналысь юантор — вермас буртор вайны и, мөдарө, вермас лёк вөчны! Хм! Көть эськө оні и абу грек чурснитны...

— А меным көть мый, пиньой ок висьө да,— веськыда сьавкнитіс Онь да кисьталөм бөрын өдйө тотшнитчис Петыркөд, сэсся кымыньтіс кружасө. Ёртыс эз жө ёна сөрмөдчы.

— А-ак!— чуқыртчис Петыр.— И збылысь, бурдөдчантор! Көть кымынысь он видлы — водка либө ас карөм чорыд ва,— век ылөдас дявөлыд. Первойсө бур лоө, но регыдөн и ки-кокыд слабмас, юрид дурмө. Думайта да, колө мера төдны.

Пес юкалысь пуксис пекыль вылө юысьяскөд орччөн да серамсорөн шуис:

— Тайо пляжкаыс нельсө грамма. Час, ме видзөдла, дыр-ө тіянлы тырмас.

— Но тэ, өти-кө, вомнад эн ворс, том на батытө велөдны, мөд-кө, вай тшай юышт да петалам вөравны,— такөдіс Оньо пиыслы.— Эг өд бипур водзын пөжсьыны локтөй. Мунімө вай.

Батя-пия шавксёдісны пуяс сайо, а Петыр колис пусьыны. Сөмын на удитіс өшөдны би вылө ва тыра пөрт, ылын кыліс лыйөм шы. «Ага,— думыштіс Петыр.— Шедас выйим! Яяссим». Быдөн нимкодь лои мортыды.

Но виччысьтӧг син улас уси съӧд вуджӧр. «Мый-а тайӧ?— повзис пусьысь да кватитіс чер.— Али вержитчис?»

Эз, тыдалӧ. Воськов комын сайын вуджрасис гӧна пася морт-лӧн съӧд мыгӧрыс. «Господьӧ!»— шуйга кинас пернапас чӧвтис Петыр да горӧдіс:

— Ой! Тэ коді?

И воча кыліс мургана гӧлӧс: «Ме нель пиня ёді! Ха-ха-ха!»

Петыр шыбитіс черсӧ да котӧрӧн уйкнитіс-пырис керкаӧ, игнаис. Йирмӧг котӧртіс юрсянь коклябӧрӧдзис. Пӧсьӧ шыбитіс морттӧ. Ки улас пач бердсьыс сюри кӧрт крук. Кватитіс сійӧс да ляскысис ӧшиньӧ. Гӧгӧр вӧлі шы ни тӧв. Керка дорын некод эз тыдав. Сӧмын казяліс ӧшинь пыр, кызди бипур местаын ым-расисны ӧгыръяс...

«Кӧть кутшӧм повзьӧдчысь дявӧлыс, а быть ковмас ывлаӧ петавны»,— думыштіс Петыр да ньӧжйӧникӧн восьтіс ӧдзӧс. Кӧрт круксӧ водзлань нюжӧдӧмӧн сійӧ кытшовтіс керка гӧгӧр, но кок туйяс повзьӧдчысьлӧн эз тӧдчыны. И сэки воськовтіс сылань, кытысь казявліс гӧна пася воысьсӧс. «А со тай кодарӧ мунӧма,— Петыр копытчӧмӧн видзӧдіс тальӧм лым вылӧ.— Но и кок туй! Быттьӧ динозаврлӧн. Та-ак, шлопкӧма-лэччӧма шорлань. Фу-у! Дивӧ дай сӧмын! А гашкӧ, тайӧ «лым морт» да?»

Кӧть и пусьӧмыс нюжаліс кык час вылӧ, «бичпачкаысь» шыдтӧ Петыр слӧймис-удитіс жӧ дасьтыны вӧралысьяслы. Кор мудзӧм батя-пия пуксисны пызан сайӧ панясьны, ёртныс и висьталіс лоӧмтор йывсьыд.

— Он веритӧ?— ыззис Петыр да сувтіс пызан сайысь.— Локтӧй, локтӧй, петкӧдла кок туйсӧ.

Пӧшти нелямын сантиметр кузьта кӧмкот туй и збыльысь чуймӧдіс войтырӧс.

— Тайӧ нӧ кутшӧм ӧшлӧпан мунӧма?— синсӧ шаргӧдіс Саш.— Гашкӧ, вӧрса воліс да?

А сюсь Ӑнь первой исыштіс гӧгӧр, та бӧрын шуис:

— Ог тӧд, коді тані вӧлӧма, но лёк дука. Думайта, тэ, Петырӧ, миянӧс йӧйтӧдлан. Дзик тэнад кодь кок туйыс, ачыд, тыдалӧ, тапйӧдлӧмыд...

— Ӑньӧ! Кызди тэнӧ ӧні аддза, сідз жӧ и сійӧс аддзылі: мужичӧй мыгӧра, гӧна паськӧма, ыджыд тушаа,— морӧсас камӧдіг сёрнитіс Петыр.— Сэсса ме повзи да керка пытшкӧ игнаси, вель дыр эг лысьт петны. Сійӧ на гораа сёрнитіс, кутшӧмкӧ пиня ёді йылысь гараліс... Менам муртса съӧлӧмӧй эз сувт.

— Талун миян абу вӧралӧм, а сӧ дивӧ,— воча шыӧдчис Ӑнь да индіс пи вылас.— Саш лыйис съӧлалы, кызд пуӧдзис дас метра вӧлі. Тшыныс разалі, а пӧтка, кызд син водзысь здукӧн вошисны. Ми гӧгӧр корсьыштім на... Мый тайӧ? Вошласьны, гашкӧ, мӧдім? Татшӧм вӧралӧмтӧ ог помнит...

— Ме серти, мужикъяс, тунасьны оз ков,— помаліс ӧта-мӧд костын сёрнисӧ Саш.— Вайӧ тшай юам да вӧрзьӧдчам сиктлань. Вӧравсис миян, сӧ лешак...

Чӧв усьӧм ёртъяс другысь ӧтлаын несйисны. Сідзкӧ, и збыль кад воис гортлань мӧдны...



Кылөг вад

В И С Ъ Т

Кела-кела сук эжөр пөвстті. Тэрмасьомла сконъясьла пидзёс выйөдз вутшъясь. Ышка-пушка мудзөмла. Медбёрын тыдовтчө жө рөмпёштан моз лөсталысь вад веркөсыс. Матыстча берегланьыс. Но оз көйы вадйыс ас дінас сибөдны. Кок улын кадъя нюр кодъ. Лайкъялө быдөн муыс. Водзө сэсся он писът. А сөстөм ваөдз ылын на. Нинөм он вөч. Разя шатин көв. Самала вугырө нидзув да шыбита көвсө, но вугырыс ваөдз оз во, пысасьö кузь эжөрас. Шатин помөдыс видла кыскыны вугыр көвсө. Ёрчча-матка ас кежысь. Но виччысьтөг көйыс орө, да ме шняпкыся сук эжөр пөвстас.

И пыр жө восьта синъясөс. Куйла карса патераам крөвать вылын. Бара вөтө со кымынөдысь нин уськөдчыліс Кылөг вад. Мыйла нө? Корө али мый вадйыс ас дінас, мед вола коркө видлыны сійөс? Оз нин унмовссы та бёрын. А юр вежөрын ловзёны Кылөг вад йылысь казтылөмъяс.

...Пажын бёрын зэрыс торкис видзвывса уджсө. И аски, тыдалө, асывсяныс нинөм лоө вөчны тані. Матыстчи Веня бригадир дорө, коді мыйкө пасъяліс аслас ротйысьом тетрадьö да сёрнитіс чөвтысьяскөд.

— Мый, бара нин вуграсьны көсьян мөдөдчывны? — серамсорөн шуис менам юалөм вылө, а сэсся содтіс: — Ветлы, ветлы. Аски уджыс оз жө уна ло-а. Гашкө, и менө коркө свежөй юкванад гөститөдыштан.

Та бёрын сюся читкыртліс синъяссө.

Меным лои нимкодъ: оз ков бара дыр ышөдны. Гортө воём бёрын пыр жө ветлі корсявны нидзув. Дасьті чери кыян угодыө да коркө рөмдігас нин мөдөдчи вадорлань. Вуджи Эжва вомөн да вөйталі шатинъясөс мөдлапөвса пожөма яг горулө, медся визулінас. Но войнад өд йөршысь кындзи нинөм оз сюр. А өді рөдлы водз на вөлі сөйнысө.

Асывводзаньыс чериыс мыйлакө зэв жө пискаа босьтіс. Эз шогмы сылы госа нидзулыд. Овлывлө тадзитө Эжва дорад. Мый көть эн вөч, кутшөм сам көть эн видлы, а оз босът васа лолыд и ставыс.

Лэпталі шатинъясөс да шуи пыравны веретяяс сайө дзебсьом Кылөг вадйө. А асылыс кутшөм мича! Шондіыс разөдө-вөтлө тöрыгыя зэр бёрын кыпөдчөм гөвкъялысь русө. Пөлышталө рытыв-лун төв. Лэбачьяс помся дзользёны-сыйлөны, вөзйөны мича лун. И лысваа турун пөвстті восьлалігөн да вөр-ва мичлун-нас нимкодясигөн он весиг пыдди пукты номъяслысь пель сьөдмөдана дзизгөмсө.

Медбёрын веретя сайсянь тыдовтчис Кылөг вад — миян медыджыд тыыс. Сы весытысь руыс абу на удитөма вешйыны. Но сійө эз на вөв арся кодъ сук да бура тыдаліс ылысянь. Тыыс садьмөма жө вөлі асья унсыыс да быттьө очсаліс. Көнсюрө эжөр пөвстас герчитывлісны утка-мамъяс пияннысө дөзбөритігмоз. Берег дорас вачкывліс бөжнас сир, вөтлысис посни кель-

чи-ёкыш бёрся. Мёдар берегса веретяын быдмысь коз вывсянь дёзмөмпырысь кравзіс рака, быттьо көсийс дугодны бадь кусть-ясын посни лэбачьяслысь сьылөмсö.

Но менö эз нин сэтшöма вөрзёд вадгöгöрса олöмыс. Берегдорса эжör пöвстті келалöм бöрын медбöрын сюри жö ыджыд баркас, ытва дырйи на челядь пыртлöмаöсь Кылöг вадйö. Коялі пыдöсас чукöрмöм васö да куті сынны тöдса кояслань. Мед көть нин Кылöг вадса гырысь йөршыс юква вылö сюрас. Домаси. Чöвті шатинъясöс ваö, а ачым вуграла, войыс узытöм вöлі да. Ёнасö нинöм вылö ог надейтчы. Эжваад кө эз сөй, и тані, тыдалö, оз кут дөбöдны табтö.

Муртса кешлö восьті синъясöс. Видзöда, а табйыд öти шатинсьыс кытчöкö вошöма. Заводиті лэптыны. Сьöкыда локтö. Тыдалö, крукасьöма колясад. Ёнджыка тракниті. Друг мыйкö ыджыдкодь кутіс пессыны вугыр помын. Сэки вöлисти гöгөрвои, мый чери көласьöма. Пыр жö долыдджыка кутіс тіпкыны сьölöмöй. Гөрба ёкыш көласьöма. А вугырсö нёкчимöдзыс нылыштöма. Муртса и перйынысö верми. Сэк кості и мöд шатинысь табйыд воши. Сэтшöм жö гөрба ёкыш нылыштöма самсö. Ковмис эновтчыны öти шатинсьыс. И заводитчис! Ог на удит чöвтны, а табйыд дзум вöйöма нин. И бара кодкö пессьö вугыр йылад. А öтчыд табйöй зэв тэрыба кутіс пышйыны ва веркөстіс. Лэпта, а шатин көвйыс зэвтчöма. Öтарö-мöдарö кешласьö. Кыдзкө кыски жö кыйдöссö пыжö. Вölөмкö, ыджыдкодь сир кватитöма.

Со таdzi, гашкö, час-мöд лэпталі ёкышъяссö. А öти на пиысь весиг килограмм сайö. Киясöй тіралöны. Сьölөмöй тіпкö. Медбöрын видзöдлі пыж пыдöсö да шемöсми быдсөн. Мый нö тайö мекöд? Кыdzi нö кута та мында черисö гортö катны? Шуи аслым: тырмас, колö и мукöдъяслы кольыштны. Чери кыян сумкаад, дерт, эз тöр став кыйдöсэд. Ковмис дөрöмöс пöрччыны. Вом бердтіс көрталі да сэтчö и сөвті черисö. Сэсса катласигтырйи, сьöкыда ышлолалöмөн öдва воöдчи гортöдз. Видлы та мында кыйдöстö кыскыны! Зэв ыджыд таз тыр лои чериыс. Бура и аттьöалі таысь Кылöг вадйöс.

Дерт, абу пыр Кылöг вадйыс татшöм мелі да вежавидзысь. Мукöддырйи, кор кыпавлö лэчыд рытыв төв, вадйыс быттьо скөрмылö мыйыськö да вöтлö ас дінсьыс став ловъясö. Сэки и чериыд сэнi раммö да дзесьö пыді пельöсьясö, кытчö оз веськав Кылöг вадлөн скөрлуныс. Первойысь бать нуöдліс менö Кылöг вадйö буретш татшöм поводдяö. Яр рытыв төв вöтліс ты кузя веж гы. Ми пукалім дзибрöс веткиын да йөршысь кындзи нинöм эгö вермöй вугравны. Мукöд чериыс быттьо вöлі унмовсьöма.

И көть эз зэв бура примит менö сэки Кылöг вадйыд, век жö ёна воис сьölөм вылö ыджданас, аслыспölös мичлуннас. Öд та ыджда тысö ме некор на эг аддзывлы. Гашкö, километр кузя кымын да кыксö кымын метр пасьта. Мукöддырйи мелі да раминик, мукöддырйи скөр. Батькöд медводдзаысьсö волігөн сійö нöшта на ыджыд да паськыд вöлі. Но сэсса колхоз кадö кодыисны экскаваторөн зэв джуджыд бөрöзда да васö сэтысь лэдзисны, мед матігöгöрса васöд видзяссö косьтыштны. Сэксянь ичöтджык лоис вадйыс, ляпкалыштіс. Рытыввыв помас торйөн нин лажмыд. Асыввылас, медся джуджыдінас, кык метрысь абу жö джуджыджык. Сюян-сюян кузьсьыс-кузь бедь, да оз и подйив. Тыдалö, коркö зэв джуджыд сэтi вölөма, да нюйтыс вочасөн öдöлитöма.

Вадсö кытшалö сук эжөр да ваас быдмысь зöридз. Вывлань-ынджык гөгöрыс пашкыртчöмаöсь бадь кустьяс, быттьö видзöны вадсö кодлөнкö омоль синмысь. Лунвывсяньыс быдмö пожöма яг. Ваын олысьяслы тані тырыс сёян-юаныс. Со мый вöсна и ытва дырйи пырö Эжваысь чериыс да сэсся овмöдчö татчö. Майбыр, мыйта ва туруныс быдмö, мыйта посни гагйыс уялö. Сёй да сöмын быдмы-сöвмы.

Та вöсна жö, тыдалö, радейтöны поздысьны Кылög вад берег пölөн уткаяс. Вадсö кытшовтігөн кымынысь кывлан уткалысь герчкöмсö. Муртса муныштан, да бара нин поз. Ичöt уткапиянсö мамыс оз на лэдз ва шöрлань, мед горш сир оз кватит. Со найö и верстьöөдз сук эжөр пöвстас быдмöны. Сöмын гожöм помланьыс нин ты шöрö петöны. А август помад тані оз сöмын вуграсьысьяс, но и утка кыйысьяс паныдасьöны. Öтырышгья шковгöмсьыс сьölöмыд емавлö. Гожöмбыд быдтысисны утка гозья, и со налөн быдтасьяслы, а мукöддырйи и асьныслы, воö пом.

Меным медводдзасяньыс мыйлакö чайтсьыліс, мый оз радейт Кылög вадйыд ас дорас йöзöс сибöдны, быттьö кутшöмкö гусятор ас пытшкас кутö да оз кöсйи сійöс восьтыны. Кымынысь эг кытшовтлы шатинён вад гөгөр, сöмын некымынлаті муртса-муртса сибавлі восьса ваöдзыс. Вой берегыс тырöма кузь эжөрөн да зэв кадья, муртса верман пыжтö ва вылас петкöдны. Лунвыв берегыс сідзжö вывті туруна. Сöмын сэсянь посйысьöмөн позьö кытчöсюрö чöвтлывны шатин көвтö. Да нöшта рытывладорсяньыс, кыті и лэччö Эжваö Кылög вадйысь ваыс, сибалыштан. А гусятор пыддиыс вадйыс, тыдалö, черисö видзö. Чериыс и збыльысь тані ас кадö зэв уна вöлі. Сир, ёкыш, кельчи, сын. Весиг йөршыс тані эжваса сертиыд ёна ыджыдджык. Да и мукöд чериыс Эжва юын серти яджык. Со мый вöсна радейтöны кежавлыны татчö чери кыйысьяс.

Öні, кор асфальта туйтö нюжöдісны, и карсянь нин унаөн воывлöны. А арланьыс, турун пуктысьяслөн мунöм бöрын, вадгөгöрса ягöд да бадь костöд тшак да сэтөр вотысьяс кытшлалöны. Кылög вад гөгöрыд быдсяматорнас озыр.

Но Кылög вадлөн эм öти ыджыд шог. Сы вöсна, гашкö, и сэтшöма зумыштчывлö вадйыс гожöмтьяснас, ваыс пакталігөн. Ляпкыд вöснаыс водз тулыснас чериыс тані ёна пöдö. Кислород тырмытöмла сійö уськөдчö вадлөн асыв-вой пельöсö, көні петöны ключьяс да ваыс оз сэтшöма кынмыв, мед пыр кежлö унмовсьöм водзвылын көть нин пöттöдз лолалыштны.

Та йылысь бура тöдöны матігөгөр сиктьясын олысьяс да водз тулыснас воывлöны йöрдангьяс пыськöдны, свежöй чериён номсасьыштны. И ме найöс таысь некутшöма ог дивит. Весиг аттьö шуа. Мед көть и сакөн кыясны черисö. Оз на ставсö. Лун-мöдөн, йöрдангьяс восьтöм бöрын, чериыс удитö палявны. А эз кө вöвны тайö войтырыс, мында чери эськö пропадитіс. А сідзсö тай со вадйыс пыр на черинад номсöдлывлö.

Кыкысь кымын и меным уна во сайын удайтчыліс ветлыны пöдöм черисö кыйны. Кутшöм аслыспөлос серпасгьяс мөрччисны вежөрö! Сöstöмсьыс-сöstöм енэж. Дзирдалö тувсовья ярьюгыд шоңді. Сы улын пöртмасьö уна рёмөн лымйыс. Но тайö гажа лунсö торкöны йöрдангьяс дорын куйлысь сыв кузьта сирьяс, гөрба ёкышгьяс, гырысь сынгьяс. Унмовсьöмаöсь нин найö нэм кежлö. Сідзкö, сёрөн казялöмаöсь сиктсаясыд чери пöдан кадсö.

И ӧні тайӧ ловъяснас сӧмын катша-рака чӧсмасьӧны. А чери кыйысьыд мыйта тани! И Гаждорысь, и Ивадорысь, и Данямитьдорысь, и весиг Палысь. Ӧтияс зыръясӧн гумлалӧны сӧніка васыс черисӧ южмӧм лым вылӧ. Мӧдъяс писькӧдӧны йӧрданъяс да сӧсса зӱла заводитӧны гудравны сӧтысь васӧ. Пронь Толь, Дзӧля Сашӧ, Паш Вась Коль, Сандро Коль. Данямитьдорысь весиг локтӧма зӧв олӧма Ӧньӧ Пашӧ, кывлӧма чери пӧдӧм йывсьыд да.

Со Дзӧля Сашӧ, йӧрдансӧ гудралігмоз, мыйкӧ горӧдіс. И пыр жӧ сылань сакъясӧн уськӧдчисны мукӧдыс. Йӧрдан дорас гырысь ӧкышъяс матыстчӧмаӧсь. Ӧні найӧс нинӧмӧн он повзӧд, сӧтшӧма чериыдлы сынӧд кӧрыс колӧ. Со и дугдывтӧг сакалӧны васӧ йӧрдан гӧгӧр сулалысьяс. Быдысь сакыштӧм бӧрын некымын лов сюрӧ. Но недыр мысти чери кельӧбыд палялӧ да вешйӧ бӧр. Кольӧ лун-мӧд, и черилы сӧсса нинӧм нин оз грӧзит. Сиктса войтырӧн писькӧдӧм йӧрданъяс отсалісны мездныны ваын олысьяссӧ. Сідзкӧ, гожӧмнас бара на позяс кежавлыны татчӧ да аттӧалыштны вадсӧ озыр кыйдӧсысь.

Бӧръяысьсӧ, карын уджалігӧн нин, волі Кылӧг вадйӧ карса ӧрткӧд. Баркасыс вӧлі потласьӧма важысла, а мукӧд пыжыс тани эз вӧв. А берегсяньыд видлы писькӧдчыны сӧстӧм ваӧдз. Асыв помсыс аддзим пур, сӧлім сӧтчӧ да йӧткасим тӧдса коляслань. Коркӧя кодъ жӧ мича лун сулаліс. Сідз жӧ гӧгӧр гажаа тӧльзисны-ссылісны лӧбачьяс, небыдик рытив-лун тӧв вӧрӧдыштис ва веркӧссӧ. Чайтім, удайтчас и талун. Но коляс талун эз зӱль козынавны миянлы озырлуньяссӧ. Сӧж жӧ быттӧ мыйкӧ личкис сӧлӧм вылӧ. Видзӧдлі гӧгӧрбок да гӧгӧрвои, мый торкис менсьым шойччыны лӧсьӧдчӧм лолӧс. Кылӧг вадйын тайӧ кадас миянкӧд тшӧтш вӧлі куим-ӧ-нӧль пыжа. Абу ас йӧз. Бокӧвӧйяс. Ас пыжнаныс воӧмаӧсь. А сиктсаыд ӧткӧн-ӧткӧн тани овлӧ! Карсаяс, тыдалӧ. Со нӧ берегас и палатка сувтӧдӧмаӧсь. Вад пасьта кузяла и вомӧнног вӧйталӧмаӧсь ботанъяс да дугдывтӧг бурскисны васӧ, вӧтлісны черисӧ ботанъясӧ. Сӧки ми и гӧгӧрвоим, мыйла эз сӧй тӧдса колясын сӧтшӧм мича гожся лунӧ чериыс, повзис да вешйис сійӧ пыдӧджык. Дыр думайттӧг ӧдйӧджык бӧр петім Эжава дорӧ.

А меным сӧки мыйлакӧ кажитчис, мый тайӧ тӧдтӧм войтырыс мырдӧн босьтисны асланыс киӧ Кылӧг вадсӧ, и кузь бедьяснас, быттӧ ӧсь пургъясӧн, тшукӧдісны сылы яяс, дойдалісны, а Кылӧг вад сӧмын ружтіс да корис менӧ отсӧг вылӧ. Но ме нинӧмӧн эг вермы отсавны сылы. И таысь зӧв шог вӧлі сӧлӧм вылын.

Сӧсянь эг нин кежавлыв сӧсса Кылӧг вадйӧ. Бокысь воӧм йӧз кӧ тыас кыйсьӧны, сӧні нинӧм вӧчны ми вокыслы. Висьтавлісны, дерт, ӧртъясӧй, мый и гожӧмъяснас на сӧні вуграсьылвлӧ кодсюрӧ, мый и пӧдӧм черитӧ на кыйӧны. Но менӧ сӧтчӧ сӧсса эз нин кут важ моз кыскыны.

Гашкӧ, ӧні сійӧн и уськӧдчис вӧтӧ Кылӧг вадйыд. Тшӧктӧ воыны ас дінас, видзаасьны. Унаысь нин эськӧ кӧсийлі ветлыны Кылӧг вад дорӧ, но быдысь мыйкӧ да мыйкӧ торкӧ. Сӧтшӧм нин миян олӧмыс, мый бур важсяыс кольӧ сӧмын казътылӧмъясаным, кӧтъ кыдзи огӧ зӱльӧй сійӧс недыр кежлӧ бергӧдыштлыны. Но сӧр нин, тыдалӧ. Да и абу нин та вылӧ вын-ӧбӧсным.



Өнiя кадö коми войтырöс ёна майшöдлö чужан кывныслөн аскиа луныс. Öд воысь-во коми сикт-грездъяс чинöны, том йöзыс мунöны каръясö, и комиён сёрнитысьыс вочасён чинö.

Тайö мытшöдыс нюкрöдлö сёлöмсö и Иван Белыхлысь. 2012 вося 11 номерын ми йöзöдлiм сылысь «Коляс-ö чужан кывным?» статья. Тайö гижöдыс абу кольöма веськодьён Сыктывкарса государственнöй университетын велöдчысясöс. Иван Белыхлөн статья вылö подуласьöмөн найö юксисны тайö мытшöд йывсьыс асланыс видзöдласъясөн. Вöзъям тöдмасьны том йöзлөн мöвпъясөн и тiянлы.

Иван Белыхлөн «Коляс-ö чужан кывным?» гижöдлы йöлöга

Наталья ИВАШЕВА

Кывйыс мортыскöд кутас овны

2012 вося «Войвыв кодзув» журналлөн 11 номерын йöзöдöма Иван Белыхлысь «Коляс-ö чужан кывным?» статья. Автор панö зэв ёсь сёрни: коляс-ö чужан кывным? Сийö пасйö, уна коми сикт-грездын пö сулалöны пöлынътчöм керкаяс. И мукöдыс дзик нин овтöмөсь. Тайö збыль сiдз: йöзыс оз нин ёна зiльны овны сикт-грездын, торйён нин томъяс. И гөгөрвоöдöны сиктысь пышйöмнысö удж абутöмөн.

Татшöм мытшöдыс збыль эм. Менам чужан грездын, Зулöбын, вöли тыр-бур совхоз, конюшня, скöт карта, начальнöй школа, челядьлы сад. А пыдöджык кö кодйыштны, Зулöб ю бокин важён сулавлöма мельница, а грездас — Вежа Пантелеймон часовня. Со öд кутшöм озыр вöлöма Зулöб грездыс, ме öнi шензыны ог вермы!

Дерт, öнi Зулöб абу жö куш, но ёнасö ошйысьны нинöмөн: эм бурдöдчанiн, лавка да клуб, а мукöдторсö важён нин тупкылисны. Но кöть эз, гашкö, вöв вывтi уна уджаланин, а йöзыслы век жö вöли мый пиысь бöрйыны, кöнi нажöвитны нянь вылö. Мукöд сиктын, шуöны, татшöм жö серпасыс. Некытөн нин, буракö, оз вермыны ошйысьны, мый сиктныс сöвмö да паськалö. Дай уджтö корсьны зэв сьöкыд: он кö кысьы-вурсьы либö восьт кутшöмкö предприятие. Но öд тайö оз быдён вермы вöчны. И кольчöны том йöз карö, семйитчöны. Но, чайта да, коми кывсö оз жö вунöдны, бать-мам дорас сиктö воывлöны да комиён сёрнитöны. Ме думысь, налы ловныс оз лэдз мöд кывйён сёрнитны чужанiнас.

И век жö йöзöс гижалöмысь тöдчö, мый коми войтырлөн лыдыс чинö. Иван Ильич вайöдö лыдпас: 65 сюрс морт вылö пö этшаджык лоöма коми войтырыс. А ме думысь, коми йöзыс эз на чин татшöм выйöдз. Прöстö найö гижалöм дырйи шуисны асьнысö рочөн, кöть эськö кодсюрöлөн сёрнитанног сертиыс тöдчö, мый сийö коми морт.

Миян республикаын коми мортыс уна, да и чужоны унаён. Та вöсна оз на быр коми кывйыс да культураыс. Öд весьö оз висьтавыны, мый кывйыс абу, мортыс кө абу. А коми мортыс эм, сідзкө, и кывйыс мортыскöд кутас овны. Сöмын канмуыс мед эз öтдорт да отсаліс сьöмнас да мукöдторйöн. А коми войтырыд сэсса кыпöдас нин выль тшупöд вылö чужан кывсö да культурасö!

Ольга ПОПОВА

Сиктын и колö юргыны коми кывнымлы

Ме, кызди коми морт, кута зэв ыджыд лача, мый коми кыв некор оз кув, мый сы вылын кутасны сёрнитны и менам челядь, и внукъяс, и правнукъяс... Но та могысь том коми йöзлы колö сöвмöдны сійöс сідзи, медым весиг рочъяслы окота лои сёрнитны комиöн.

Дерт, сетчынытö коньыдджык — вермасьöм дорысь. Унаён нин кынысö лэдзöмаöсь да сёрнитöны, олöны роч моз. Весиг аслам сиктын, Одыбын, заводитöмаöсь нин рочасны. А сэтшöм мисьтöм кывны сиктад роч кывтö. Карад быттö велалі нин-а, коми мортыс кор сёрнитö рочöн, а сиктын көть пельтö тупкы.

Чайта, ставыс йöз кыин. Найö кө көсьясны вöдитчыны коми кывйöн, некытчö сійö оз вош. Но öні кодсюрö тöдöмöн дугдöны сёрнитны мам кывнас. Весиг мукöд бабöс кө босьтны: найö олöм чöжныс сёрнитісны комиöн, а кор пияныс вайисны найöс овны карö, рочмисны. Кутшöм сьöкыд татшöмъяссö кывзыны. Оз кужны, а мырдöн рочасьöны öта-мöдныскöд.

Ме чайта, медым коми кывйыс эз быр, колö велöдны сійöс школаас, кызди чужан кыв. Öні уна школаын коми кывсö велöдöны оз чужан кыв туйö пунктöмöн, а суйöрсайса велöдан методика серти, босьтам көть миян районысь Шойнатыса школа. Кор ме та йылысь кылі, лёк лолі сьölöм вылам. Тайö школаыс пыр тöждысьліс коми кыв вöсна, сöвмöдіс-туяліс сійöс. Велöдчысьясыс тшöкыда вермылісны олимпиадаясын. Вермас лоны, мукöд сиктса школаясын Шойнатыса моз жö вöчасны да тшöтш босьтчасны велöдны комисö суйöрсайса кывйöс моз. Оз, оз позь тадзисö! Сиктын и колö юргыны мича коми кывнымлы, и оз ков сыысь яндысьны.

Елена ЛОГИНОВА

Коми кывтö школаад колö велöдны

Кыв топыда йитчöма йöзкöд. Кор уна йöз олöны öти муын, сёрнитöны öти кывйöн, найö кутöны вочасöн кывны асьнысö торъя котырöн, торъя войтырöн. Налöн чужö асланыс история, асланыс культура.

Коми йöз олöны уна национальносöта Россияын, дерт жö, ёнджыкасö роч йöз пöвстын. Та вöсна асьнысö торъя войтырöн кылöмыс комияслöн пондöма вошны. Сійöн налöн надзöникöн бырö коми культура да кыв дорас интересыс. Чайтöны, öнія

олöмын коми кыв оз нин ёна ков. Медым тайöс дугöдны, колö бөр кыпöдны коми йöзлысь асьнысö торъя войтырöн кылöмсö. Кыдзи тайöс вöчны?

Позьö заводитны телевидениесянь. Эм «Юрган» телеканал. Колö сійöс вöчны кывсянаджыкөн, нималанаджыкөн. Мед вермисны видзöдны да гөгөрвоны коми передачаяссö и рочьяс, позьö лöсьöдны субтитрьяс роч кыв вылын. Öнi «Юрганын» петкöдлывлöны нин комиöдöм роч мультфильмъяс. Позьö вуджöдны коми кыв вылö и мойдъяс, мед челядь ичöтдырсянныс кыласны коми кывсö, велаласны сы дорö да кутасны радейтны сійöс.

Сидзжö колö вöчны коми газет-журналсö синмö шыбитчана-öнджык, а гижöдъяссö — сьölöмö мörччанаön, вежөрö йиджанаön. Сэк и унджык лыддысьысь лоас. Юасьöм серти, лыддысьысьяслы медъяна воöны сьölöм вылас семья кост олöм йылысь гижöдъяс: верös да гöтыр, чой да вок, челядь да мамбать костын йитöдъяс йылысь... Сидзжö йöзыс радейтöны лыддыны дзоньвидзалун видзöм йылысь.

Бур, карын öнi улича нимъяс гижöмаöсь и рочөн, и комиön. Сидзи жö и öткымын вузасянiнлы сетöны коми ним. Но бөръя кадас унджык вузасянiнсö зiльöны шуны оз комиön, весиг оз рочөн, а англия кыв вылын, либö гижасны роч кывсö англия шыпасъясөн. А öд ми олам Коми республикаын, и бурджык эськö вöли комиön шуны. Öд кымын тшöкыджыка син улö кутас веськавны коми кывйыс, сымын қоланаджыкөн сiйö қутас чайтсьыны йöзсылы, а сидзкö, и чужан кывйысь яндысьöмыс вошас!

Дерт жö, коми кывтö школаад колö велöдны. Öнi уналаын коми гижöдъяссö кутiсны лыддыны роч кыв вылын, лоис сидз шусяна «Коми переводная литература». Рочьяслы, гашкö, тайö и бур: мед тöдмасьöны коми гижöдъясөн, коми культураön. Но öд уналаын öнi и коми челядьлы ковмö лыддыны коми гижöдъяссö рочөн! Тадзи кö водзö лоö, дерт, сэсся вунас коми кывйыд!

Ме думысь, комияслы унджык колö лыддысьыны комиön. Да, Сыктывкарын кызвын йöзыс рочöсь. И налы нуöдны сöмын коми кывйысь урокъяс — зэв этша. Велöдысьлы öд позьö новлöдлыны челядьсö коми музей-библиотекаö, коми газет-журнал да книга лэдзанинö, фольклор театрö, коми выставкаяс вылö. Ныв-зонлы позьö разöдны театр афишаяс, висътавны виль спектакляс йылысь. Сидзжö позьö юöртавны и музей-библиотекаын мероприятиеяс йылысь. Мед йöз вермисны тöдмасьны коми культура традициясөн, коми йöзлөн оланногөн. Сэки, гашкö, рочьяс асьныс окотитасны велöдны коми кывтö! А комияс яндысьöм пыди нöшта на ёнджыка кутасны радейтны чужан кывнысö!

Збылсьысь, öнi чужö комиа-роча зэв уна семья. Но, мöвпыштны кö, тайö вермас тöдчыны коми кыв вылö бур боксянь. Öд унаön рочьяс пиысь шуöны, зэв пö лöсьыд бура тöдны кык кыв. Унаön весиг тшöтш окотитöны сёрнитны коми вылын, но сöмын оз тöдны сiйöс. А кутас кö татшöм моргыс овны коми-кöд, сылөн лоас позянлун матöджык тöдмасьны коми кывйөн (кор коми гöтырыс (верöсыс) сёрнитö телепон пыр бать-мамыс-

кӧд либӧ кор ветлӧны гӧститны на ордӧ). Да и челядтӧ поэзӧ велӧдны кык кывйӧ, ӧд школаясын ӧнӧ сӧдзжӧ тшӧктӧны тӧдны коми кывтӧ.

Кутам жӧ медводз ми, коми йӧз, радейтны ас мунымӧс да чужан кывнымӧс! Кутам гораа, повтӧг сӧрнитны комиӧн! Мед йӧзыс тӧдисны, мый Коми Республикаын юргӧ на чужан кывйыс! Сӧки и мукӧд, миян вылӧ видзӧдӧмӧн, пондасны пыдди пуктыны и коми кывсӧ, и коми йӧзсӧ!

Елена КОЖЕВИНА

Ставыс коми йӧз сайын

Иван Белыхлысь «Коляс-ө чужан кывным?» статья лыддӧм бӧрын менам чужис уна мӧвп. Но медводз висътала гижӧд йывсыс некымын кыв. Статьясӧ панӧма зӧв образнӧя, коми кывлысь сьӧкылдунъяс петкӧдлӧмӧн. Важ олӧмкӧд выльсӧ орччӧдӧмӧн автор восьтӧма медся дойданасӧ. Лыддигас ме быттӧ ставсӧ аддзи ас синмӧн, темаыс бура тӧдса да. Татшӧм сиктъяс-сӧ аддзылі и. Грездъяссӧ тупкалӧны, и та могысь ыджыд чина йӧз думыштӧны уна сикас помка. Но некод оз мӧвпыштлы, мый тадзисӧ киссьӧ коми культуралӧн, сӧстӧм коми кывлӧн поэйыс.

Колӧ шуны, мый и коми йӧзыс вежсисны. Кутісны вунӧдны вужнысӧ, лоины вывтӧ «цивилизированнойӧсь». Эм сӧтшӧм вежӧртас — «мирса цивилизация». Став войтырыс зільӧны лоны ӧткодӧн. Тайӧ эськӧ бур. Но кор сійӧ кусӧдӧ жебджык культураяс-сӧ, тайӧ некытчӧ оз туй. Ӗд став йӧзланьыс мунны зільысь мортыс воштӧ асьсӧ, асьыс сямсӧ. Таын мыжа и ачыс войтыр. Сетчӧ тӧдтӧм локтӧм войтырлӧн ыджыдалӧмлы, оз кӧсйы кыпӧдны юрсӧ. И мый медся жалыс: том войтыр оз аддзы и оз кыв, мый ас олӧмыс, ас кывйыс медся мича, медся дона.

Суйӧрсайса войтыр оз сӧтшӧм ӧна нимкодъясь россияса ӧтув культураӧн, кызди ичӧт войтыръясӧн. Жаль, тайӧс тӧдӧ лыда морт. Томъясыс пышйӧны ылӧ, медым озыра либӧ тырвыйӧ судзяна овны, и оз гӧгӧрвоны, мый ставыс — ас сайын.

Войтырсӧ аддзӧны сӧтшӧмӧн, кутшӧмӧн сійӧ асьсӧ петкӧдлӧ. А коми мортыд кӧ ӧтдортчӧ ас мусыс, чужан кывсыс, вужсыс — кутшӧмӧн комиясӧ аддзӧны воӧм войтыр? Со и оз жӧ пыдди пуктыны вужвойтырсӧ.

Автор казтылӧ 1989 воӧ Латвияысь, Литваысь да Эстонияысь волӧм журналистъясӧс, кодъяс став вынӧн дорйӧмаӧсь СССР-са власьт водзын ас юрӧн овны кӧсйӧмсӧ, оласногнысӧ, кывнысӧ. Найӧ вермӧмаӧсь повтӧг пӧртны олӧмӧ асьыныс кӧсйӧмнысӧ.

Автор шуӧ: «Збыльысь, ми абу Балтияса войтыр. Неуна торъялам наысь. И сӧк жӧ ме кӧсья, мед вужвойтырлы вӧлі лӧсьӧдӧма ӧнія серти бурджык позянлунъяс асьыс оласногсӧ, кывсӧ, культурасӧ сӧвмӧдӧм вылӧ». Ме воа ськӧд ӧти кывйӧ. Но майшӧдлӧ ӧти мӧвп: коми войтырлы унаысь нин эськӧ позис кыпӧдчыны, но мыйлакӧ асланыс ыджыд водзмӧстчӧмыс век абуджык. Пыр чайтӧны, мый кӧнкӧ сӧнӧ, Москваын либӧ

Сыктывкарса Юралысьлөн керкаын, чина йӧз ставсӧ шуасны, да кызди висьталасны, сідзи и лоас. Но ӧд ставыс коми йӧз сайын. Колӧ сӧмын лоны сюсьджыкӧн да гӧгӧрвоны, мый ми нинӧмӧн абу лӧкджыкӧсь, шуам, венгръясысь, французъясысь либӧ шведъясысь.

Кӧсья шуны: коми войтыр став боксянь зэв озыр. Колӧ сӧмын кутчысьны да видзны сійӧс, мый колисны миянлы пӧльпӧчным, и, кӧні кӧть он ов, кывны асьтӧ комиӧн, видзны кывтӧ. Ставыс томъяс сайын.

Анастасия МИШАРИНА

Быд кыв да культура тӧдчана

Иван Белыхлысь «Коляс-ӧ чужан кывным?» статья лыддӧм бӧрын сӧлӧм вылын лой нор. Збыллысь, коми кыв надзӧникӧн кутіс бырны. И чайта, тайӧ мытшӧдыс чужис важӧн нин. Автор гижӧ: «Сӧвет власьтыд эз радейт бура олысь крестьянинтӧ да зілис быд ногыс топӧдны татшӧмъяссӧ. Сэсянь и кутісны бырны посни грездъяс, пӧчинокъяс, а сиктьясын кутісны содны овтӧм керкаяс». Сӧвет власьт кӧ эз йӧрт коми крестьянаӧс, сиктьяс эськӧ сӧвмисны-паськалісны, и коми войтыр эз мун корсьны кыськӧ бур олӧм. Комиӧн сёрнитысьыс воысь-во эськӧ содіс.

Иван Белых содтӧ и сійӧс, мый эмӧсь чужан кывсьыс яндысьысь йӧз. Но мый понда яндысьӧны? А сы вӧсна, мый коми йӧз этшаӧнӧсь, да нӧшта на коми кывсӧ ӧтдортоны-топӧдоны быд боксянь. Ставыс тайӧ надзмӧдӧ коми культура сӧвмӧмсӧ. Мед татшӧмыс эз вӧв, коми войтырлы колӧ лоны збойджыкӧн, радейтны ас кыв да культура.

Иван Белых сёрнитӧ статьяс и школаын коми кыв велӧдӧм йылысь: «И мед кӧть политикъяс гораа больгӧны сы йылысь, мый коми лоис государственной кывйӧн, но кор кыла, мый бать-мам корӧны коми пыдди велӧдны школаын английской кыв, ньӧти ог шензы школаясас лоӧмторйыслы. Верстьӧяс кӧ нин ӧтдортчӧны чужан кывсьыс, мый шуны челядь йылысь?» Тані дзик пыр чужӧ юалӧм: «А мыйӧн бурджык англия кыв комиысь?» Менам чайтӧм серти, быд кыв аслыспӧлӧс, и та вӧсна оз позь шуны, кутшӧм кыв миян олӧмын коланаджык, а кутшӧм абу. Быд кыв да культура тӧдчана, колана.

Мӧд кыв велӧдӧмӧн позьӧ озырмӧдны вежӧртӧ. Но быд морт ачыс бӧрйӧ, велӧдны-ӧ выль кывсӧ. Сідзжӧ и комисӧ оз быдӧн бӧрйы. Но коми войтырыс кӧ кутас радейтны, кыпӧдны-сӧвмӧдны мам кывсӧ да культурасӧ, сэки и мукӧд кывъя йӧз гӧгӧрвоасны налысь тӧдчанлунсӧ да окотитасны тӧдмасьны наӧн.



Литература олөмысь

* * *

Август 2 лунö Иван Куратовлөн Литературнöй музейын пас-йис ыджыд тшупöда пас Николай Щукин. Гижысьлы тырис 80 арöс. Юбиярöс чолöмавны волісны матысса йöзыс, ёртъясыс да творчествосö пыдди пуктысьяс.

Николай Щукинлөн олан туйон да гижан уджон төдмөдіс поэт Анжелика Елфимова. Но таөдз лыддис Коми Республикаса Юралысь нимсянь воём телеграмма, көні Вячеслав Гайзер чолөмаліс гижысьöс гөгрöс пасөн да аттьöаліс сійöс коми литерату-раö ыджыд пай пуктöмысь.

Николай Щукинлысь кывбуръяссö зэв мылаа лыддис Юлия Харкун — Сыктывкарса Коми культура шöринын уджалысь. Торйөн нин мичаа юргис «От гөра» кывбур.

А гижысь Гений Горчаков лöсьöдöма Николай Щукинлөн кывбур серти сыланкыв. Со кызди ачыс висьталіс та йылысь: *«Коркө меным киö веськаліс Николай Александровичлөн кывбур-ыс. Лыдди, и медводдза строкасянныс кажитчис, йиджис сьölөм шөрөдз. «Да кытчö жö тэ кольöмыд, томлун?» Зэв лöсьыд кывъя. Думышти сыланкыв та вылö гижны. Босьтчи, содті нöшта некымын строчка. Николай Александрович лэдзис тадз-сö вöчны. И лöсьöді сыланкыв».*

Гений Горчаковлөн сьылöм бöрын кывсö босьтіс Коми ги-жысь Котырөн веськөдлысь Елена Козлова. *«Коркө заданиеяса рукописнöй книгаыс аддзи Лыаты сикт йылысь кывбур. Гижі аслым. Сэсся юалі чойлысь, кутишöм Щукин сійöс гижöма... А сёрөнджык төдмасим Николай Александровичкөд гижысь Коты-рын. Сійö миян медся «том» гижысь: кор он юась, век дась быдлаö мунны. Көть и ставөн ветлам, а ёнджыкасö век помни-тöны Николай Александровичöс, сы вöсна мый век шмонитö, сьылö. Сэсся бара на звөнитасны, мед пö волас миян дорö ко-ми Лев Толстойд... Николай Александровичöс ме ёна пыдди пукта».*

Николай Щукинöс чолөмалісны и мукöд гижысь ёртъяс: Иван Белых, Юрий Ионов, Александр Некрасов. Сыланкывъяс-өн гажöдісны кывзысьясöс Наталья Канова да Михаил Оверин. М.Оверин козыналіс гижысьлы асьыс бөръя дискö, коді таdzi и шусьö — «Козин». А чолөмалöмъяс помасьöм бöрын Николай Александрович ачыс петіс гөсьтъяс водзö, пöся аттьöаліс найöс локтöмысь да сьыліс налы «Зарни сюра көрсö».

* * *

Август 22 лунö Сыктывкарын Изьва керкаын нимöдісны Пётр Столповский творчество серти вöчөм биобиблиографиче-скöй указатель. Сійöс дасьтöма Коми Республикаса С.Я.Маршак нима библиотекаын уджалысь Л.Ф.Корнаухова. Любовь Фёдо-ровна вöчöма ыджыд удж. Корсьöма да öтувтöма öти кышöд

улö Пётр Столповскийлөн олём да гижан, вуджөдчан, небөгъяс лөсьөдан да редактируйтан удж йылысь пасйөдъяс, сылөн творчество серти литература, пыртöма гижөд нимъясыслысь алфавитнöй указатель.

Указательсö петкөдлём бöрын Любовь Фёдоровна сетис кывсö гижысьлы. Пётр Митрофанович медводз сёрнитис литература удж йылысь и кутшöмөн колö лоны гижысьлы. Висьталис, кыдзи босьтчöма гижнысö. Вöлөмкö, армияс служитигөн сийö лыддьöма полкса библиотекасыс уна небөг, и некымынöс — армия йылысь. Пётр Столповскийлы найö абу воöмаöсь сьölөм вылас, сы вöсна мый абу петкөдлöмаöсь збыльсö. Сылы окота лöма гижны ассьыс книга, но слöймöма тайöс вöчны газетын уджалигөн нин. Сöмын тай нелямынөд лист бокөдз воём бöрын гөгөрвоöма, мый гижö армия йывсьыс сийö книгаяссьыс оз бурджыка. И дугөдчöма тайö мөвпсьыс. А öтчыд нылыскөд гуляйтигөн искөвтöма горкасянь да вөрзьөдöма пельпомсö. Тöлысь чöж больничнöялöма, и сэк кості важ пишущöй машинка вылын шаркнитöма «Про Кешу, рядового князя» повесът. И лэдзöма книгаөн. Кор военкоматын лыддьöмаöсь сийöс, вель унаöс ньöбöмаöсь да сеталöмаöсь армияö мунысь зонъяслы.

Пётр Столповский кывсö вежлалыштöмөн вуджөдöма роч вылö коми мойдъяс да лэдзöма «Коми народные сказки», «Солнцеликие братья», «Три стрелы», «Доброе слово» да «Восьминогая собака» книгаяс. Көкъямыс кока пон йылысь мойд лыддис кывзысьяслы Мария Владимировна Карманова — С.Маршак библиотекаын уджалысь. Вöлөмкö, водзти понйыс вöлöма көкъямыс кока, но көзяевасö корсигөн нель коксö воштöма. Сийöс аддзöмаöсь пöрысь гозъя да босьтöмаöсь ас дораныс. А эз кө босьтны, колök, и нель кока понйыс öнi эз вöv.

Тайö библиографическöй указательыс петöма «Коми Республикаса челядьлы гижысьяс» серияын. С.Я.Маршак нима библиотека лэдзö татшöмсö квайтöдöс нин. Таöдз петöмаöсь Соломония Пылаева, Егор Рочев, Юрий Васютов, Елена Габова, Александр Некрасов творчество серти указательяс. Но уна экземпляр библиотекаыс сьом тырмытöм вöсна оз вермы лэдзны, и мукөд библиотекаö ыстö сöмын электроннöй вариантсö.

* * *

Октябр 3 лунö Иван Куратов Литературнöй музейын нимöдисны «Переключка» альманах. Сэтчö пырисны коми да роч том гижысьяслөн кывбур-висьтъясныс. 1966 воын петавлöма нин татшöм нима гижөд чукöрыс, а сэкся авторъясыс öнi нималöны республика пасьта. Тайö Надежда Мирошниченко, Валерий Вьюхин, Олег Чупров да мукөд.

Рытсö нуöдис Андрей Попов — Коми гижысь Котырөн веськөдлысьсö вежысь. Чолöмалис авторъясöс, сетис налы кыв. Комын квайт йöзөдöма пиысь волис сöмын öкмыс морт. Поэтъяс лыддисны кывбуръяс, прозаикъяс висьтыштисны творчество йывсьыныс. Чолöмалисны том авторъясöс и бард Анатолий Вотяков, и гижысь Григорий Спичак — «Русский мир» журналөн веськөдлысь, и поэтъяс Анжелика Елфимова да Нина Обрезкова.

«Переключкасö» отсалöма лэдзны Коми Республикаса печать да юör сетан агентство. Но вузöс вылö сійö оз ло, ставсö разöдасны библиотекаясö.

* * *

Октябр 8 лунö И.А.Куратов Литературнöй музейын нуöдсис А.Е.Ванеев паметлы сіом рыт. Рыт вылас волісны гижысьяс, коми кыв да литература велöдысьяс, велöдчысьяс.

Сыктивкарса пöшти быд школаысь велöдчысьяслы мойвиис тырвыйö тöдмасьны Альберт Ванеевлöн олöм да творчествоöн, найö лыддисны поэтлысь кывбуръяссö. И кутшöмкö здукö весиг чайтсис, мый Альберт Егорович тшöтш залас, сы вöсна мый челядьыс сэтшöм лöсьыда сяммисны поэтлöн быд строкаысь кывны сылысь ловшысö да вайöдны найöс гöсьтьяс сёлöмöдз.

* * *

Ноябр 18 лунö коми поэт Нёбдинса Витторлы 125 во тыригкежлö гижысьяс Елена Афанасьева, Алёна Шомысова, Любовь Ануфриева да Алёна Старцева ветлісны Висерö, Ыджыдвиддзö, Шойнаты библиотека-школаясö. Сэтчöс войтырыс найöс кыпыда паныдалісны, школаын велöдчысьяс петкөдлісны «Шонді петігөн дзоридз косьмис...» пьесаысь юкөнъяссö, гажöдісны Виктор Савинлöн мыла сыланкывъясöн. А Сыктивкарысь воом поэтъяс лыддисны налы ассьыныс кывбуръяссö, висьтасисны творчество йывсьыныс, петкөдлісны гижöдъяс сертиныс мультимедия презентация.

Ноябр 21 лунö Сыктивдин районса Сёська сиктса библиотекаын пасйисны нималана коми поэт Михаил Елькинысь чужан лунсö. Сиктсаяс зэв кыпыда чолöмалісны сійöс, петкөдлісны поэтлöн олöм да творчество йылысь мультимедия презентация, лыддисны сылысь кывбуръяссö, сылісны-йöктісны. Сыктивкарысь поэткөд волісны чужан муас сылöн ёртъясыс — Коми гижысь Котырöн веськөдлысь Елена Козлова, сылысь Михаил Оверин да том поэтъяс Алёна Шомысова и Люба Ануфриева. Найö пöся чолöмалісны ёртнысö гöгрöс пасöн, сылісны сыланкывъяс да лыддисны кывбуръяс.

*Дасьтісны Алёна Шомысова
да Любовь Ануфриева.*

❖ ❖ ❖

Йӱзӱдӱма «Войвыв кодзув» журналын 2013 воын

Повесьтьяс, висътьяс, пьесаяс, кывбуръяс

АНУФРИЕВА Л. Шондіыс войтыштіс вӱртас сайӱ... Кывбуръяс. 2.

АФАНАСЬЕВА Е. Лов пыр визувтысь ю. Кывбуръяс. 5.
Кад визулас. 12.

БАБИН В. Виль кывбуръяс. 5.

БЕЛЫХ И. Висътьяс. 4. Кылӱг вад. Висът. 12.

БАВИЛОВ И. Кывбур. 2.

ВАНЕЕВ А. Кывбуръяс. 7.

ВЛАСОВ А. Гӱгыля чибӱ да мукӱд. Вильвося мойд. 1.

ВУРДОВ А. Кык вьлӱ ӱтик шуд. Сиктса олӱм йылысь пьеса. 4.

Двӱйни вокъяс. Висът. 9. Кык висът. 12.

ГОНЕВ Н. Шудыс вӱлӱм дженьыд. Висът. 1.

ГОРДЕЕВА А. Дженьыдик висътьяс. 10.

ГОРЧАКОВ Г. Домӱ, Пома да Ёма. Коми фольклор серти
пьеса-мойд. 3.

ДЁМИНА Н. Кывбуръяс. 1.

ЕЛФИМОВА А. Ӗкта стрӱкаяс... Кывбуръяс. 9.

ЕЛЬКИН М. Воас на кадыс. Кывбуръяс. 11.

ЖУКОВА Ю. Кывбур. 9.

ЗАЙКОВА Т. Мӱвпъяс. 9.

ЗАРНИ ЛЮСЯ. Дзольянылӱн дзольгӱм. Челядылы повесът. 7, 8.

ЗНОБИЩЕВА М. Танька. Висът. 4.

ИВАШЕВА Н. Муса шонді, дона мамӱ! Кывбур. 1.

ИЛЛАРИОНОВ А. Кывбур. 2.

КИРПИЧЕНКО Т. Виль кывбуръяс. 3. Мыжаяс. Висът. 5.

КУШМАНОВ В. Кывбур. 2.

ЛАДАНОВ А. Дженьыдик висътьяс. 1.

ЛОДЫГИН В. Виль кывбуръяс. 1. Виль кывбуръяс. 4. Еджыд
борд. Ичӱтик поэма. 8.

МАКАРОВА Е. Кывбуръяс. 10.

МАКАРОВА Ю. Кывбур. 9.

МИШАРИН А. Чепельшъяс. Повесът. 2. Кор лӱбзӱ коляоз.
Повесът. 5, 6. Вильыд ордым. Повесът. 11, 12.

НАПАЛКОВ В. Йӱг каллян. Романысь юкӱнъяс. 6, 7, 8, 9, 10.

НОГИЕВ И. Виччысьтӱм шуд. Повесът. 3, 4.

ОДИНЦОВ А. Пӱла юсьяслӱн пиян. Висът. 2.

ОРЛОВА Р. Кывбуръяс. 6.

ПАВЛОВА Н. Содъяс енӱжӱ. Кывбуръяс. 3.

ПАНЧЕНКО Л. Ставыс артмӱ радейтчӱмӱн. Кывбуръяс. Ми-
ниатюра. 4.

ПОПОВ Ан. Кывбур. 2.

ПОПОВ Ал. Вильыш шыпас. Ёти юкёна пьеса. 5. Тешкодъ морт. Повесът. 10, 11.
 ПОПОВ Г. Тшайник. Висът. 2.
 ПОПОВА Д. Кывбур. 9.
 ПРОВОРНАЯ К. Кывбур. 9.
 САВИН В. Кывбуръяс. 11.
 САМАРИН А. Ваньё да «васа». Висът. 3. Митрей Васълён вотчём. Висът. 10.
 СЕЛИВАНОВА А. Кык висът. 3. Лисапета. Висът. 5. Воклы письмё. 10.
 СЫСКИНА В. Дженъдик висътъяс. 9.
 ТИМИН В. Виль кывбуръяс. 7. Лун да вой — век водзё. (Даньёлён олан вояс — шусьогъяс пыр). 10.
 ТОРЛОПОВ Г. Кывбуръяс. 11.
 УЛЬЯНОВ А. Олёмьдлён пыдöсыс оз тыдав. Повесът. 1.
 ФИЛИППОВА А. Кывбур. 9.
 ЦЫВУНИН В. Кывбур. 2.
 ЧУПРОВ В. Кывбуръяс. 1.
 ШАХОВ Б. Дозмёр койт. Висът. 3.
 ШЕБЫРЕВ А. Рёмпöштан. Висът. 5. Чалльöг. Висът. 9. Ку-им висът. 12.
 ЩУКИН Н. Дачникъяс. Кык юкёна комедия-водевиль. 8.

Публицистика

БЕЛЫХ И. Коми мулён бур пиён вöлі. 2.
 БЕЛЫХ И., УЛЬЯНОВ А. Шуда, мый чужи тайё шондi улас... Ёрта сёрни. 9.
 БЫЗОВА В. «Аслыссяма шуда олём...» 3. «Коми сиктысь петлём морт». 4.
 ВЫЛЬ НЕБÖГ. 2, 8, 9.
 ВЬЮХИН В. Народнöй поэт йылысь. 7.
 ГИЖЫСЪЯС ДА ГИЖНЫ БОСЪТЧЫСЪЯС ПÖВСТЫН «ЭЗЫСЪ БОРД» РЕСПУБЛИКАСА ЛИТЕРАТУРА КОНКУРС. 3.
 ЕЛФИМОВА А. Гашкö, лоасны нималана гижысьясöн. 9.
 И. БЕЛЫХЛÖН «КОЛЯС-Ö ЧУЖАН КЫВНЫМ?» ГИЖÖДЛЫ ЙÖЛÖГА. 12.
 ЙÖЗÖДÖМА «ВОЙВЫВ КОДЗУВ» ЖУРНАЛЫН 2013 ВО-ЫН. 12.
 КАЛИМОВ-УЛЯШЕВ А. Кыдзи чужис «Катшасинъяс» сы-ланкыв. 1.
 КОЗЛОВА Е. Шоныда, мича кывъясьон... 2. Ышöдiс олём-нас... 3.
 КУРАТОВА Н. «Виль пöв нуöдны сёлём пырыд». 3. «Куж-лiс кыпöдны ловтö». 4.
 КЫТШЪЯС. 12.
 ЛИМЕРОВА В. И.Тороповлөн «Шуриклы шыд» висът йы-лысь. 8. Бура да сёлёмсянь зильёмөн: Нёбдiнса Витторлөн проза йылысь. 11.
 ЛИТЕРАТУРА ОЛÖМЫСЬ. 4, 12.
 МАРТЫНОВ В. Комиясöс дорйысьяс йылысь. 1. Ивö Ёгор йылысь. 11. Войвывса тöдчана йöз. 11.

ПАНЮКОВ А. Н. С. Попова йылысь гижӧма нин кык книга. 5. Асшӧрлуныс — вот чукӧртӧм. 9. Кӧрткерӧс 1918–1927 воясӧ. 11.

ПОПОВ А. Вояс, косавлӧй вай бӧр. 8.

ТИМИН В. Енбиа уджач морт. 2. Литературасӧ съӧлӧмсяныс радейтысь. 11.

УЛЬЯНОВ А. Митерасса Ӧльӧксей. 2. Газетыд рӧмпӧштан, газетыд велӧдысь... 6, 7. «Кӧсйим лоны депутатӧн...» Документальной очерк. 9. «Петӧм вӧрысь, парма шӧрысь...» Василий Лодыгинлӧн выль кывбур чукӧр йылысь. 10. «Лыддӧй менӧ большевикӧн». Нӧбдӧнса Витторлӧн олӧмысь некымын серпас. 11.

ХОЛОПОВА Д. Энӧ вунӧдӧй... 7.

ЧОЛӦМАЛӦМ. 6, 8, 9, 11.

ЧУПРОВ Вал. Жыранса зон. Очерк. 10.

ЧУПРОВ Вас. Изъваса Ванга. 1.

ШОМЫСОВА А. Аддзысьлытӧдз, Кадам ты. 11.

«ЭЗЫСЬ БОРД» КОНКУРСЛЫ КЫВКӧРТӧД. 1.



ПЫДДИ ПУКТАНА АВТОРЯС!

Редакцияӧ гижӧдъяснытӧ ыстӧгӧн быть колӧ юртны:

1. Ассыныд ним, вич, ов; кор да кӧнӧ чужлӧмныд (лун, тӧлысь, во).
2. Паспорт юӧръяс: номер, серия, кор да кӧнӧ сетӧсны, гортса адрес (прописка серти).
3. Индивидуальной налогӧвой номер — ИНН (кодлӧн эм).
4. Страховӧй свидетельство номер.

Тайӧс юрттӧг редакция гонорар оз вешты.

*Журналын йӧзӧдтӧм гижӧдъяс
редакция оз рецензируют и авторыслы найӧс оз мӧдӧд.
Редакция оз век во ӧти кывӧй авторъяскӧд.*

Компьютерный набор **Н.Кузнецова.** Корректор **Н.Габова.**

Адрес редакции: 167982. ГСП-2, г. Сыктывкар, ул. Карла Маркса, д. 229, Дом печати, каб. 202.
Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).
E-mail: kodzuv@mail.ru; Сайт: www.komimu.com

Подписано к печати 13.12.2013. Формат 70х108¹/₁₆. Печать офсетная. Усл. печ. л. 7; усл. кр.-отт. 8,4; учётно-изд. л. 7,54. Тираж 668. Заказ № 7530. Регистр. *ПИ № ФС 3 - 0226* от 20.12.2006 г. выдано Беломорским управлением Федеральной службы по надзору за соблюдением законодательства в сфере массовых коммуникаций и охране культурного наследия. Публикация материалов, направленных на освещение реализации социально значимых проектов, осуществляется при государственной поддержке в форме субсидии Агентством Республики Коми по печати и массовым коммуникациям. Отпечатано в ООО «Коми республиканская типография», 167610, г. Сыктывкар, ул. В.Савина, д. 81. Цена свободная.